

माक्सवाद बातल आंदू?



एमिल बर्न्स

माक्सवाद बातल आंदू?

एमिल बर्न्स

पहला गोंडी संस्करण – जून 2022
ग्यारहवां हिन्दी संस्करण, 1987 तल
प्रकाशक – पीपुल्स पब्लिसिंग हाऊस नई दिल्ली
हिंदी अनुवाद – ओमप्रकाश संगल
गोंडी अनुवाद - जनी

प्रकाशक -

मूल्य -

Marxvad Batal Andu? By Emil Brans, Translation by Janee

2 माक्सवाद बातल आंदू?

इद किताब 'what is marxism' इत्तेके मार्क्सवाद बातल आंदू? किन ब्रिटिश कम्युनिस्ट पार्टी सदस्य, अर्थशास्त्री, अनुवादक ओसो लेखक कमारेड एमिल बर्न्स 1939 ते रासतोर। भारत लोप्पा इद पुस्तक पहली बेरा 1953 ते छपे मात्ता। मार्क्सवाद ता बुनियादी जानकारी काजे इद पुस्तक तक महत्व पक्काए मंता। अदेनके इंजे एवनाल इदिना बीस तुक ज्यादा संस्करण छपे मात्तद मंता। देश ते वेल्ले भाषांग लोप्पा इदिना अनुवाद वेने आत्ता। इद गोंडी संस्करण 1987 लोप्पा छपेमाता गहरवां संस्करण ता अनुवाद आंदू। इद पुस्तक ता पहला गोंडी अनुवाद मीवा मुन्ने मंता। बदे गलती मत्तेके अदिन सुधरे कियाला काजे सुझाव हियाना ओसो अदिन बेस पढ़ेमासी जनता ना सेवा कियाना।

विषय सूची

अध्याय एक	6
दुनिया ता वैज्ञानिक दृष्टिकोण.....	6
अध्याय दो.....	8
सामाजिक विकास ता नियमकु.....	8
अध्याय तीन.....	21
पूँजीवादी समाज.....	21
अध्याय चार.....	34
पूँजीवाद ता साम्राज्यवादी अवस्था.....	34
अध्याय पांच.....	46
वर्ग संघर्ष ओसो राज्य.....	46
अध्याय छह	58
समाजवादी समाज.....	58
अध्याय सात.....	72
प्रकृति ता बारे ते मार्क्सवादी दृष्टिकोण.....	72
अध्याय आठ.....	83
कार्य-क्षेत्र लोप्पा मार्गदर्शन.....	83

अध्याय एक

दुनिया ता वैज्ञानिक दृष्टिकोण

मार्क्सवाद, मनम मंदाना दुनिया ता ओसो इदिना हिस्सा मंदना मानव समाज उंदी आम सिद्धांत आंदू। मार्क्सवाद ता पोरोल कार्ल मार्क्स ना पोरोल ते अरता। कार्ल मार्क्स (1818-1883) फ्रेडरिक एंगेल्स (1820-1895) संगे कलियसी हत्त शताब्दी (इत्तेके 19 वी शताब्दी अनु.) ता नइमा ओसो आखरी ते इद सिद्धांत किन विकसित कीसि मत्तोर।

ओरू कियाना खोज ता उद्देश्य मानव, समाज ता नेटा रूप इद्रम बारांकु मंता, ताना लोप्पा बदलाव बारांकु आंता, ओसो वायना कालम ते मानव जाति ता बदलाव बद्रम आयार इंदानदु मत्ता। तन्ना अध्ययन संगे ओरू इद बदलाव - बाहरी प्रकृति लोप्पा वायना बदलाव लेक्का अचानके आयवा, इदु उचुक विशिष्ट नियमानुसार आंतांग इंजी खोज कित्तोर। इद सच्चाई ता खोज कित्ता पेरके मानव समाज ता बारे ते, मानव जाति ता वास्तविक अनुभव कुना पोरो आधार आसी मंदाना वैज्ञानिक सिद्धांतकु पुट्टतांग। इद सिद्धांत मुन्ने ने धार्मिक विश्वास, नस्ल ओसो ताना संगे जुडेमासी मत्ता वंशानुक्रम, व्यक्तिगत भावनांग, पडियोर किन मोडकना लेवेके काल्पनिक सपनांग पोरो आधार आसी समाज ता बारे ते बनेमाता अस्पष्ट मत्ता धारणांग कुनगडल अलग मत्ता।

मार्क्स इद आम विचार किन पूंजीवादी ब्रिटेन ता समाज पोरो लागू कित्तोर ओसो इद्रमे पूंजीवाद ता आर्थिक सिद्धांत ता खोज कित्तोर। मार्क्स ना सबसे ज्यादा पोरोल इदे सिद्धांत तुन खोज कीतांकु आत्ता। मति ओरू हमेशा ओरा आर्थिक सिद्धांत कुन ओरा ऐतिहासिक ओसो सामाजिक सिद्धांत कुनगडल अलग किया परमूडायो इंदाना पोल्लो पोरो जोर हित्तोर। शुद्ध आर्थिक समस्यांग ना रूप ते मुनाफा ओसो मजदूरी ता उंदी सीमा एवनले अध्ययन किया परमूडंता, मति बोरू वडिय वाता लेक्का पोल्लोंग कियवा लेवा असली पिस्वल ता अध्ययन कियाला पेस्तोर, ओरकिन वेल्ले जल्दी मुनाफा ओसो मजदूरी ता बारे ते पूरा समझेमायना इत्तेके मालिक ओसो मजदूर लोरा पोरो

कोंडा वाटा लागियर इंजी इंतोरा इत्तेके ओरू मंदाना समाज ता ऐतिहासिक मंजिल ता अध्ययन कियाना।

समाज ता विकास ता वैज्ञानिक समझदारी, विज्ञान ता बाकी सब्बे शाखांग लेक्कने अनुभव, इतिहास ता ओसो मना नालुंग बगिल मत्ता दुनिया ता सच्चाई पोरो आधार आसी मंता। ओसो मार्क्सवाद तना लोप्पा सम्पूर्ण ओसो सौ प्रतिशत तैयार मत्ता सिद्धांत आयो। बद्रम-बद्रम इतिहास ता पूना-पूना पन्ना खुलेमांता अद्रम-अद्र मानेय ओसो वेने ज्यादा अनुभव हासिल किसोर दांतोर, अद्रम-अद्रम मार्क्सवाद किन वेने विकसित कियमूड आया मंता ओसो अदिन पूना-पूना पोल्लोंग पोरो लागू कियमूडया मंता। मार्क्स ओसो एंगेल्स शहीद आत्ता पेरेके इद विकास लोप्पा सबसे महत्वपूर्ण योगदान हियाना काम कामरेड वी.आई. लेनिन (1870-1924) कित्तोर।

हर रकम ता विज्ञान ता समझदारी बद्रम बाहरी प्रकृति किन बदले कियाना काम वांता, अद्रमे समाज ता अध्ययन तिंची दोरकता वैज्ञानिक समझदारी वेने समाज किन बदले कियाना काम वाया परिंता। मति, संगेने समाज ता गति किन निर्धारित कियाना सामान्य नियम वेने अद्रमताए नियम मंदिंतांग अविनगडल प्रकृति ता संचालन आंता इंजी स्पष्ट आंता। दूसरा हिसाब ते हूडतेके इव्वे सामान्य नियम कुन - बदिना सत्ता सार्वभौमिक मंता, ओसो बद मानेय अनि चीज रेंडासी ना निर्देशन कींता - इदिन मार्क्सवादी दर्शन लेवेके दुनिया ता मार्क्सवादी दृष्टिकोण इंदा परिंतोम।

मुन्ने मंदना अध्यायकुना लोप्पा फौरी ध्यान हियाना विषय कुना बारे ते मार्क्सवादी सिद्धांत कुना चर्चा कित्ताद मंता। मति पड़ेमायनोर किन शुरूआत तिंचे मार्क्सवाद नैतिकता ता बदे वेने वडिय ते मत्ता सिद्धांत कुना पोरो आधार आसी मत्ताद हिल्ले, अदु सच्चाई पोरो आधार आसी मंता। अदिन काजे नेटा समाज लोप्पा सब्बे तोरकिन परेशान कियाना लब्बडता पोल्लोंग ओसो मुश्किल कुनगडल पूराए मुक्ति दोरकी कियाला काजे समाज ता उंदी उच्चतर रूप ता स्थापना कीसि सब्बे महिला-पुरुष किन तम्मा पूर्ण विकास कियाला मदद कियाला काजे इदिना इस्तेमाल कियमूडंता। इद्रम कियाना मना कर्तव्य आंदू।

अध्याय दो सामाजिक विकास ता नियमकु

मानव जाति ता इतिहास किन आम रूप ते राष्ट्रंग कुना नडमा ता युद्धकु ओसो राजा लोरा, सेनापतिरा, राजनेता लोरा व्यक्तिगत वीरतापूर्ण कबड कुना उंदी कहानी लेक्का तोहमूड़ाया मंता। हमेशा इद्रमता ऐतिहासिक पात्रकुना कार्य कुन विशुद्ध व्यक्तिगत रूप ते वेहमूड़ आत्ताद मंता - इत्तेके ओरू पक्काए अलस्तोनर मत्तोर अदेनके दूसरा देश पोरो जीक हासिल कित्तोर, ओरा नैतिक या अनैतिक दृष्टिकोण ओरकिन तना नीतिंग पंडिसी तानकिन लागू कियाला काजे प्रेरित कीतांगा। बस्के-बस्के ओरू देश ता सम्मान या प्रतिष्ठा ता राका काजे लेवेके बदे धार्मिक उद्देश्य काजे बेस कबड कित्तोर इंजी वेने वेहितोर।

मार्क्सवाद, इतिहास ता बारे ते इद्रम ता दृष्टिकोण कुगनडल संतुष्ट आयो आंता।

सबसे मुन्ने, मार्क्सवाद इतिहास ता वास्तविक विज्ञान पूरा जनता किन सुरता तासना इंजी वेहिंता ओसो व्यक्तिरा पोरो इत्तेके ओरू खुद बस्के एवनल जनता ना बदे बेहरा आंदोलन ता प्रतिनिधित्व कींतोरो अस्के एवनले ओना पोरो ध्यान हियाना इंजी इंता।

उदाहरण काजे, क्रॉमवेल तन्ना खुद ता दृष्टिकोण ओसो व्यक्तिगत काम कुना कारण ते महत्वपूर्ण मानेय हिल्लेर, ओरू बारांकु महत्वपूर्ण मानेय मंतोर इत्तेके, ओरू पाड़ना व्यवस्था ता खिलाफ अंग्रेजीरा उंदी वर्ग ता आंदोलन लोप्पा महत्वपूर्ण भूमिका निभे कीसि मत्तोर। ओरू ओसो ओना आंदोलन सामंतवाद ता बंधन किन देहचिता ओसो ब्रिटेन लोप्पा बेहरा स्तर ते पूंजीवाद काजे हरीं पंडिसी मत्ता। महत्व क्रॉमवेल बद-बद लड़ाई लडेमातोर, बद्रम-बद्रम ता षडयंत्र रचे कित्तोर लेवेके ओना धार्मिक दृष्टिकोण बाताल मत्ता इंदाना

पोल्लो ता हिल्लो महत्वपूर्ण पोल्लो बातल मंता, ओसो अविना अध्ययन कियाना जरूरी मत्ता इत्तेके- अवु ब्रिटेन ता उत्पादन ओसो वितरण व्यवस्था ता विकास लोप्पा क्रॉमवेल ना महत्व बाताल मत्ता, अद युग ते ओसो खासकर ब्रिटेन लोप्पा सामंती राजशाही के खिलाफ संघर्ष बारांकु आत्ता; अद कालम ते समाज लोप्पा बाता-बाता बदलावकु वातांग? इंदानदु पुंदाना जरूरी मंता। इतिहास किन विज्ञान ता रूप हीतेके इद्रम ता पोल्लोंग किने अदिना आधार बने क्रिया लागियरा। इद्रम ता अध्ययन (दूसरा युग ओसो दूसरा जाति ता अध्ययन) तिंची दोरकता ज्ञान ता इस्तेमाल कीसि माटु मना सामाजिक विकास ता सामान्य सिद्धांतकु ओसो नियमकु, रसायन विज्ञान लेवेके बदे दूसरा विज्ञान ता नियमकुनाचोने निज्जमतवु मंता या हिल्ले इंदानदु खोज क्रिया परितोमा। उंदी बेरा इव नियमकुन पुत्ता पेरके माटु अविन वेने वैज्ञानिक नियमकुन इस्तेमाल कित्ता लेक्काने इस्तेमाल क्रिया परितोमा। अविना साहयता ते माटु मुन्नेने वायना कालम ते बातल आयार इंदानदे आयवा खुद वेने बद काम पक्का पूरा आयार इंदाना गारंटी मत्ता कामे क्रिया परितोमा। लेवेके फासीवाद लोप्पा आत्ता लेक्का, बाताले आयना मुन्ने ने रोमी क्रियाला काजे इस्तेमाल क्रिया परितोमा।

अदिन काजे मार्क्सवाद इतिहास ता अध्ययन मानव इतिहास किन संचालित कियाना प्राकृतिक नियमकुना खोज क्रियाला काजे कींता ओसो व्यक्ति आयवा पूरा जनता पोरो ध्यान हींता। बस्के आदिम समाज ता युग पेरके बनेमायना जन-समूह कुना पोरो कोंडा वाटिता, अस्के समाज किन अलग-अलग दिशांग ने पिङ्गसोर मत्ता हर जन-समूह कुना उचुक हिस्सांग ने तूसिंता अद व्यक्तिगत रूप ते आयवा वर्ग कुना रूप ते इद्रम पीङ्गसोरे मंदिता।

इव वर्गकु वातांग आंदुंग? साधारण पोल्लो ते वेहाना इत्तेके बोरू तन्ना पिस्वल उंदे तरीका ते पिसिंतोरो ओराए समूह किन वर्ग इंजी इंतोरा। सामंती समाज ता उत्पादन-कब्बड अर्ध गुलाम किसान – विशेष तौर ते खेती संगे - किंदूर। सम्राट ओसो सामंत तम्मा गुलाम लोरागडल वसूल कियाना बदेन बदे रूप ता कर पोरो (अद मेहनत ता रूप ते आई, लेवेके वस्तु ता रूप ते आयी वसूल किंदूर) आधार आसि पिस्सनोरा अद्रम सामंतवादीरा उंदी वर्ग मत्ता, इदिना उचुक विशेष वर्ग-हितकु मत्तांग। इद सामंती वर्ग अर्ध-गुलाम लोरा श्रम तिंची परताचोन फायदा एतला आल्सानोर; ओरू तम्मा भूमि ओसो तम्मा काजे

काम कियाना अर्ध-गुलाम किसान लोरा संख्या ता विस्तार कियाला आल्सानोरा। दूसरा बगिल अर्ध-गुलाम किसान लोरा उंदी वर्ग मत्ता, अदिना खुद ता विशेष वर्ग-हित मत्ता। वीरू आल्सानोर - तम्मा पैदा कित्ता उत्पादन लोप्पाटल ज्यादा हिस्सा मालिक लोरकिन सौंपे कियवा लेवा तम्मा काजे ओसो तम्मा परिवार कुना काजे तासना इंजी। ओरू खुद तम्मा फायदा एतला काजे मेहनत कियाना आजादी मंदाना इंजी आल्सानोरा। ओरू तम्मा पोरो आयना मालिक लोरा उत्पीड़न तिंची मुक्ति दोरकी कियाला आल्सानोरा। सामंतवादिर ओरा काजे कानून बने कियानोर ओसो सामंतवादिरे ओरा शिकायत कुना अदालत ते केंजानोरा। तम्मा मालिक लोरा जमीन पूहना अर्ध-गुलाम किसान तमा विचार किन वरोर अंग्रेज लेखक इगा रास्त लेक्का वेहा मंतोर: “साहब, नन्ना वेल्ले कड़ी मेहनत कींताना कोर कूसेंग तेदिंतान, कोदांग रोमसोरे कड़ा तिके दांतान अनि नांगेल पूहिंताना एही ते आई पीनी (इंगम) ते आई, नावा मालिक ना वेरीं मत्तांकु नन्ना बस्केने लोन रोमा परवोन आंताना। बद्रमातेकाई, पोडदमेटे नाकिन कम से कम उंदी एकड़ जमीन पूहा लागिंता।” (आइलीन पॉवर ना मध्य-युगीन जनता लोप्पा रासीस मंता पेज नं.22)

अदिन काजे हर सामंती देश लोप्पा मालिक ओसो गुलाम लोरा नडमा लगातार संघर्ष ताकसोर मंदानदु। बस्के-बस्के इद संघर्ष व्यक्तिगत रूप ते ताकनदु ओसो बस्के-बस्के गुलाम लोरा समूह तन्ना मालिक ना खिलाफ तेदनदनदु: बस्के-बस्के गुलाम किसान लोर तम्मा परिस्थिति सुधरे कियाला काजे उंदी बेहरा संख्या ते उंदी आसी कोशिश कियानास्के इद संघर्ष वेल्ले विस्तृत रूप ते वेने मुन्ने वायनदु। इदिना उदाहण इंग्लैंड लोप्पा आयना 1681 ता विद्रोह मंता। इदिना नेतृत्व जॉन बॉल ओसो वैट टाइलर कित्तोर। अर्ध-गुलाम ओसो किसान लोरा इद्रम ता बचोनो विद्रोह जर्मनी, रूस ओस बाकी बचोनो देश कुना लोप्पा आतांगा। सुडला-बेहरा स्तर ते इद संघर्ष हर जागा ते आयनदु।

मालिक ना जमीन पोरो अर्ध-गुलाम लोरकिन काम कियालाए लागनदु। इदे आयवा चीज ता रूप ते बचोनो रकम ता कर वेने निह्हा लागनदु। इविना लोप्पा केवल फसल ता उंदी हिस्साए आयवा अर्ध-गुलाम ओसो ओरा परिवार बने कियाना दस्ताकारी (कैदे बने कित्ता सामान) चीजकु वेने मंदानवु। अद समाज लोप्पा उचुन विशेष कारिगरिर वेने मत्तोर - उदाहरण काजे हथियार ओसो

औजारकु बने कियानोरा लेक्काटोरा अदे समाज लोप्पा उचुन मुल व्यापारी लोर वेने मत्तोर, ओरू तम्मागा पिस्ता अतिरिक्त उत्पादन किन अस्सानोरा ओसो दूसरा देशकु या इलाकांग पैदावार ता बदला ते अदिन वम्मानोरा बद्रम-बद्रम व्यापार लोप्पा बढ़ोत्तरी आत्ता, अद्रम-अद्रम व्यापारिलोर किन वेल्ले सामान ता वेल्ले जरूरत आयना शुरू आत्ता। अर्ध-गुलाम किसान लोर बने कित्ता चीजकुना लोप्पाटल सामंती लोरा हिस्सा तेंडसी पिस्ता सामान व्यापारी लोरा काजे कम आयना शुरू आत्ता। अदिन काजे ओरू हाटुम लोप्पा वम्मला काजे माल तैयार कियाला संगठित-उत्पादन किन विकसित कियाना शुरू कित्तोर, इदिना काजे सामंती लोरा गुलामी तिंची मुक्त कित्ता या बद्रमाई ओरगडल तम्मा जीवा पिशी कीसि वितसी वाता अर्ध-गुलामी लोरकिन पूरा समय ता श्रम ता इस्तेमाल कीसि हाटुम काजे संगठित उत्पादन विकसित कियाना शुरू कित्तोर। उचुन अर्ध-गुलाम किसान लोर वेने, गुलामी तिंची मुक्ति दोरकी कित्ता पेरके, शहर लोप्पा वासी स्वतंत्र दस्तकार लोरा रूप ते उद्दतोर ओसो कपड़ांग, धातु ता दडियांग-गंजिंग बने कियाना लेक्काटा काम कियाना शुरू कित्तोर। इद्रमे तीरम-तीरम विकास किसोरे बचोनों सैकड़ों साल ताकना स्थानीय उपभोग काजे सामंती उत्पादन लोप्पा बढ़ोत्तरी आत्ता, हाटुम काजे उत्पादन वेने स्वतंत्र कारीगर ओसो मजदूरी-श्रम कियानोर बनेमात्तोर। इद उत्पादन किन अर्ध-गुलाम किसान लोर आयवा स्वतंत्र दस्तकार ओसो मजदूरी हीसी मेहनत कियाला वेहाना मालिक लोर ताकी कियानोर। स्वतंत्र दस्तकार लोर वेने तीरम-तीरम मजदूरी हीसी मेहनत कीसोरे मालिक बनेमात्तोर। वीरू मजदूरी कियाना पूना कारिगरगडल काम एतानोर। इद्रमे 16 वीं शताब्दी तले उंदी पूना वर्ग, इत्तेके औद्योगिक पूंजीपति वर्ग ओसो अदिना संगे-संगे अदिना “रूप” औद्योगिक मजदूर वर्ग वेने जन्म आसोर मत्ता। संगेने ग्रामीण लोप्पा वेने पाड़ना सामंती बंधनकु देगसी मत्तांग - मालिक ना जमीन पोरो खुद हंजी खुद मेहनत कियाना जागा ते किसान पैसा ता रूप ते लगान हीयाना शुरू कित्तोर। अर्ध-गुलाम किसान वेल्लेय जागा ने स्वतंत्र किसान लोरा लोप्पा बदलेमासी मत्तोर ओसो इंजे ओरू केवल तम्मा जमीन पोरोने खेती किया लागिंता। जमीन ता मालिक मजदूरी हीसी तम्मा जमीन पोरो काम कियाना शुरू आत्ता। इद्रमे पूंजीवादी

किसान न जन्म आत्ता, ताना संगेने मजदूरी एतसी काम कियाना खेत-मजदूर लोर वेने पैदा आतोर।

मति शहर ओसो ग्रामीण इलाका लोप्पा पूंजीपति वर्ग ता विकास सामंती शासक वर्ग ता पाड़ना सामंती शासक वर्ग किन खुद खत्म कित्ताद हिल्ले। इदिना उल्टा, राजशाही, पाड़ना भूस्वामी वर्ग, धनी ओसो चर्च अदिना फायदा काजे पूना पूंजीवाद ता इस्तेमाल कियाना पूरा कोशिश कित्ता। भूस्वामिरा गुलामी तिंची मुक्त आत्तास्के या जीवा पिस्सी कीसि शहर ते वित्तास्के, अर्ध-गुलाम किसान, सामंतीर किन कर (मेहनत, चीज लेवेके पैसा ता रूप ते) हियाना लोप्पाटल वेने मुक्त आसी मत्तोर। मति वीरा पिल्ला-पेकोर उचुन सम्पन्न आत्तास्के ओरू निज्जमे आजाद आत्ताद हिल्ले इंजी पुत्तोर - राजशाही ओसो सामंती शासक लोर ओरा पोरो रक-रकम ता कर वाटताद मंता इंजी, ओरा व्यापार पोरो रक-रकम ता प्रतिबंधकु वाटतोर इंजी, दस्तकारी सामान तैयार कियाना ओरा उद्योग कुन स्वतंत्र विकास आयना तुकू रोमी कित्तोर इंजी समझेमातोर।

राजशाही ओसो पाड़ना, सामंती भूस्वामीर इद्रम बारांकु क्रिया परानोर-बारांकू इत्तेके ओरा कैदे राज्य ता पूरा मशीन - फौजकु, अदालत ओसो जेलखाना मत्तांगा। कानून वेने ओरे बने कियानोर। अदिन काजे पूंजीपति वर्ग ता विकास इत्तेके वर्ग-संघर्ष ता पूना रूप वेने मुन्ने वांता। पूंजीपतिर किन राजशाही ओसो सामंती मालिक लोरा संगे संघर्ष क्रिया लागता ओसो इदु संघर्ष बचोनो शताब्दिंग एवनल ताकता। उचुक अपेक्षाकृत पेरके अरसी मत्ता देशकुना लोप्पा इदु इंजे वेने ताका मंता, मति ब्रिटेन ओसो फ्रांस लोप्पा इद संघर्ष पूरा आत्ता।

इदु बद्रम पूरा आत्ता?

इद्रम ता पूंजीपति वर्ग सशस्त्र क्रांति संगेने पाड़ना सामंती शासक लोरगडल सत्ता किन ऊंदता। ब्रिटेन लोप्पा इदु परिस्थिति दूसरा देशकिनकु वेल्ले मुन्ने पैदा आसी मत्ता। 17 वीं शताब्दी ता नडमाने अगा बेरसोर मत्ता पूंजीपति वर्ग ता कर ओसो प्रतिबंध कुना खिलाफ लगातार संघर्ष उंदी उच्च स्तर ते एवत्ता। सामंती प्रतिबंधकु उत्पादन ता पूंजीवादी रूप कुना विस्तार किन रोमी किसोर मत्तांगा। मुन्ने पूंजीपतिर शांतिपूर्ण तरीका ने अविन गुची कियाना कोशिश कित्तोर – राजा लोरकिन अर्जी (दरखास्ते) हियाना, कर हियाला काजे

मना कियाना, लेक्काटविना रूप ते। मति राज्य ता मशीनरी मुन्ने ओरा बदे वेने कोशिश कारगर रूप ते काम कीवो आत्ता। अस्के पूंजीपतिर किन ताकत ता जवाब ताकत संगे हिया लागता। ओरकिन जनता किन तेहा लागता - इत्तेके जनता राजशाही खिलाफ, मनमानी तरीका ते कर-व्यवस्था ओसो व्यापार पोरो वाटता प्रतिबंध कुना खिलाफ लडेमायाना इंजी ओसो राजशाही ता अदालतकु सामंती बंदिशकुना उल्लंघन कियानोरा पोरो थोपे कियाना गिरफ्तारिंग, जुर्मानांग, सजांग ना खिलाफ लडेमायला काजे तेदता। दूसरा पोल्लो ते वेहाना इत्तेके पूंजीपति वर्ग किन उंदी सशस्त्र क्रांति ता संगठन किया लागता। अदिन राजशाही ओसो पाडना अत्याचारी व्यवस्था ता खिलाफ कैदे हथियार पोयसी लडेमायला काजे जनता ना नेतृत्व किया लागता। पाडना शासक लोरकिन फौजी तरीका ते हारे किया लागता। इद्रम किता पेरेकेने पूंजीपति वर्ग काजे शासक बनेमायना, पूंजीवाद ता विकास ता सब्बे बाधांग किन देहना ओसो ओसो इदिना काजे जरूरीर कानूनकु बने कियाना संभव आया परता।

ज्यादातर इतिहास – ग्रंथ कुना लोप्पा इंग्लैंड ता पूंजीवादी क्रांति किन चार्ल्स सबसे मुन्ने विरुद्ध ताकना उंदी लडाई ता रूप ते पेश कीसि मत्तादु निज्जमे। अविना लोप्पा चार्ल्स वरोर प्रथम रोमन कैथोलिक धर्म लोप्पा विश्वास तासना राजाल मत्तोर, वीरू हमेशा षडयंत्र रचे कियानोर ओसो ओना विरोधी क्रॉमवेल वरोर सभ्य मानेय मत्तोर, वीरू कैथोलिक सम्प्रदाय ता विरोध कियानोर ओसो ब्रिटिश स्वतंत्रता ता महान आदर्शकुना पोरो विश्वास तासानोर इंजी वेहतोर। संक्षेप ते पूरा संघर्ष किन उंदी नैतिक ओसो धार्मिक युद्ध ता रूप हियाना आंता। मार्क्सवाद व्यक्ति पोरो नजर वाटना विडचसी ओसो वेने गहराई ते रेयला कोशिश कींता। अदु बवु नारांग किन पोयसी संघर्ष ताकसी मत्तायो अविन पोयसी गहराई ते रेयना कोशिश वेने कींता। मार्क्सवाद अद कालम ता संघर्ष ता सार किन पाडना सामंती शासक वर्ग तिंची सत्ता पोयला काजे बेरसोर मत्ता पूंजीपति वर्ग ता लडाई ता रूप ते हूडानदु। ओसो निज्जमे इद उंदी स्पष्ट मोड मत्ता। अद क्रांति पेरेके, ओसो 1689 लोप्पा अदिना दूसरा चरण पूरा आत्ता पेरेके, पूंजीपति वर्ग राज्यसत्ता ता उंदी वेल्ले बेहरा हिस्सा किन तन्ना कंट्रोल ते तासता।

इंग्लैंड ते पूंजीवादी क्रांति वेल्ले मुन्ने आत्ता, अद्रमासी अगा पूंजीपति निर्णायक ओसो पूर्ण जीत हासिल किया परवो आत्ता। इदिना कारण पाइना सामंती संबंध ज्यादातर नष्ट आसी मत्तांग, मति भूस्वामीरा वर्ग (तीना लोप्पा इंजे शहर लोप्पाटा उचुन धनी लोकुर वेने शामिल आसी मत्तोर) वेल्ले पिस्सिस मत्ता ओसो खुद पूंजीवादी भूस्वामिरा उंदी वर्ग धनी लोकुरा हित संगे तन्ना हित किन काल्पसी तासता ओसो राज्यसत्ता ता वेने उंदी बेहरा हिस्सा पोरो अधिकार तासिस मत्ता।

मति फ्रांस ते इद पूरा गतिविधी वेल्ले पेरके शुरू आत्ता ओसो पूंजीवादी क्रांति 1789 एवनल ताको आत्ता, इदिना कारण ते वेल्ले गंभीर तात्कालिक बदलाव आतांगा। मति मार्क्सवादिरा दृष्टिकोण ते इदिना कारण रूस ओसो दूसरा फ्रांसीसी लेखक लोर मानव अधिकार कुना घोषणा किसोरे बेहरा-बेहरा ग्रंथकु रासिस मत्तादु आयो, ओसो फ्रांसीसी क्रांति “स्वतंत्रता, समानता ओसो बंधुता” ता नारांग पोरो आत्तादु वेने आयो। बद हिसाब ते क्रॉमवेल ना क्रांति ता सार धार्मिक नारांग लोप्पा आयवा वर्ग संघर्ष लोप्पा दोरकिंता, अद्रमे फ्रांसीसी क्रांति ता सार वेने अदिना बैनर कुना पोरो रासिस मत्ता न्याय ता सिद्धांतकु या नारांग लोप्पा आयवा वर्ग संबंध कुना लोप्पा दोरकिंता।

मार्क्स इद्रम ता बदलाव कुना युग ता बारे ते “बद हिसाब ते माटु बोराई मानेय किन ओना राय खुद ता बारे ते बाताल मंता इंदाना पोल्लो पोरो आधार आसी आंकलन किया परवोम, अद्रमे इद्रम ता क्रांतिकारी कालम किन अदिनाए चेतना पोरो आधार आसी आंकलन किया परमूडायो।”¹ क्रांतिकारी युग कुना सही समझदारी हासिल कियाला काजे मनाकिन सत्ता काजे संघर्ष कियाना वर्ग किन हूडा लागियर। पाइना सत्तारूढ़ वर्ग कैदे मत्ता अधिकार किन ऊंदसी अदिना पोरो खुद ता अधिकार जमे कियाला कोशिश कियाना पूना वर्ग कुन चीनेमाया लागियर। इद पूना वर्ग ता नेताल पुंजी-पुंजी या पुनवा लेवाए तन्ना संघर्ष ता उद्देश्य ते उचुक वर्ग-हित ओसो वर्ग-सत्ता संगे बदे संबंध हिल्ला लेवा वेडिय ते मंदन लेक्कटा आदर्श पोल्लोंग ओसो समस्यांग कुना पोल्लोंग कींतोर।

¹ “राजनीतिक अर्थशास्त्र ता आलोचना” ता भूमिका तिंची।

इतिहास ता मार्क्सवादी दृष्टिकोण बातल इत्तेके - मानव समाज ता विकास लोप्पा मुख्य प्रेरक शक्ति परस्पर विरोधी वर्गकुना नडमा मंदना संघर्ष मंता। मति समाज ता वर्ग कुना लोप्पा विभाजन ओसो पूना वर्ग कुना जन्म अविना पिस्वल काजे जरूरी चीजकुना उत्पादन कियाला काजे इस्तेमाल कियाना उत्पादन शक्तिंग विकास बचोन आत्ता इंदाना पोल्लो पोरो आधार आसी मंता। बिजली संगे ताकना मशीन ता खोज उत्पादन लोप्पा उंदी वेल्ले बेहरा कदम मत्ता, मति केवल इद उंदे खोज हिल्ला मत्ता। भाप (उम्मा) ता ताकत ते ताकना मशीनकुना आविष्कार उत्पादन ता उन्नति ते उंदी वेल्ले बेहरा कदम मत्ता, मति अदिना असली महत्व इदिनकु बचोनो ज्यादा मत्ता। इद्रम ता मशीन समाज लोप्पा खुद ता औजारकुना पोरो आधार आसी उत्पादन कियाना वर्ग किन वेने खत्म कित्तांग। इंजे ओरू तना संगे पोटी आयना पूना मशीनकुना मुन्ने टिके माया परवो आत्ता, बारांकु इत्तेके कैदे काम कियाना दस्तकार उंदी हप्ता ते बचोन माल तैयार कियानोरो अदिनकु बचोनो ज्यादा माल इंजे वरोर मजदूर बिजली संगे ताकना मशीन संगे केवल उंदी दिव्या ते तैयार कींतोर। अदिन काजे इंजे उत्पादन-साधन कुना खुद मालिक बनेमासी अलग-अलग उत्पादन कियाना दस्ताकार लोरा जागा ते रेंडु रकम ता लोकुर वातोर - पहला मालिक मत्तोर, मति खुद मशीन पोरो काम किवोर, ओसो दूसरा औद्योगिक मजदूर, ओनगा उत्पादन कियाना साधन हिल्ला मत्तांग, मति ओरू (मजदूरी ता बदला ते) मालिक लोरा काजे काम कियानोरा।

इद बदलाव पुनवालेवा तन्ना-तन्नाए आत्ता, इदिना काजे बोरे योजना बने कित्ताद हिल्ले। इद बदलाव प्रत्यक्ष रूप ते, उचुन मुल हासिल कीसि मंजी तन्ना फायदा काजे अदिन उत्पादन लोप्पा इस्तेमाल कियाना पूना ज्ञान ता कारण ते आत्ता। मति वीर लोकुर इदिनगडल पेरके हूडला दोरकताचोन गंभीर समाजिक परिणाम आयनुंग इंजी पुनवा मत्तोर ओसो आल्सवा वेने मत्तोर। मानव समाज लोप्पाटा सब्बे बदलावकु इद्रमे आंतांग इंजी मार्क्स वेहिंतोर, मानेय हमेशा तम्मा ज्ञान ता भंडार बेरसी कीसोर दांतोर, ओसो तन्ना पूना ज्ञान ता इस्तेमाल उत्पादन लोप्पा कीसोर हत्तोर, ताना कारण ते गंभीर समाजिक बदलावकु आतांग। इवे सामाजिक बदलावकुना कारण ते वर्ग-संघर्षकु आतांग। इवे वर्ग-संघर्षकु विचारकु ओसो संस्थांग-लेक्काटा धर्म, संसद, न्याय लेक्काटविना टक्कर हीता,

बारांकु इत्तेके अद समय ते रेंडु विचारकु ओसो संस्थांग उत्पादन ता पाङना तरीकांग ओसो पाङना वर्ग-संबंध कुना भूमि पोरो पूयसी-पंडसी मत्तांग।

इव विचारकु ओसो संस्थांग किन बोरू पुट्टी कितोर ओसो बोरू अविन खत्म कितोर? मार्क्स बाताल वेहितोर इत्तेके - विचार ओसो संस्थांग सब्बे जागा ते हमेशाए मानेय ना असली काम ओसो अमल तिंची पैदा आत्ता। सबसे मुन्नेटा चीज पिस्वल ता साधन - तिंदना-उंडना, केरना कपडांग ओसो मंदाला काजे लोन बद्रम दोरकी कियाना इंदानादु मंता। इतिहास लोप्पा इंजे एवनल बचोन रकम ता समाज मत्तांग - आदिम कबीला, दास-समाज, समांती समाज ओसो आधुनिक पूंजीवादी समाज - सब्बे समाज कुना सदस्य लोरा आपसी संबंध अद कालम ता उत्पादन कियाना तरीकांग पोरो आधार आसी मत्ता। समाजिक संस्थांग ना रूप ते मुन्नेटले बोरे आल्सिस मत्ताद हिल्ले, अदु हर समाज लोप्पा ताकसोर मत्ता प्रथांग (रीत) लोप्पाटल पैदा आसी मत्ता। संस्थांग, कानून, नैतिक नियम सो दूसरा विचार समाज लोप्पा ताकसोर मत्ता प्रथांग ओसो रिवाज कुना लोप्पाटले पेसिस मंजी विकसित आसी मत्ता रूपकू मत्तांग। इव प्रथांग ओसो रिवाजकुना सीधा संबंध उत्पादन ता तरीका संगे मत्ता।

इदिना कारण ते बस्के-बस्के उत्पादन ता तरीका बदलेमाता - इत्तेके सामंती तरीका ते उत्पादन ता जागा ते पूंजीवादी उत्पादन तरीका वाता लेक्का-अस्के-अस्के संस्थांग ओसो विचारकुना लोप्पा वेने बदलाव आत्ता। बद पोल्लो किन उंदी कालम ते नैतिक समझेमायमूडायनदु, अदे पोल्लो किन दूसरा कालम, दूसरा परिस्थिति ते अनैतिक समझेमायना शुरू आत्ता। बदु पोल्लो निन्ने एवनल अनैतिक मानेमायमूडायनदु, अद पोल्लो किन इंजे नैतिक मानेमायना शुरू आत्ता। ओसो अदिन काजे स्वाभाविक रूप ते बस्केनाई वेने भौतिक परिवर्तन आत्ता - उत्पादन ता तरीका बदलेमातास्के ताना संगे-संगे हमेशा विचार कुना संघर्ष वेने शुरू आत्ता ओसो पाङना संस्थांग किन वेने चुनौती हीता।

पूंजीवाद तरीका ता उत्पादन निज्जमे बेरसतास्ते अदिना सामंती संबंधकुना संगे टक्कराव आत्ता, इदिना कारण उत्पादन ता पूना तरीकांग लोप्पा पूंजी सबसे पहला जागा दोरकी कियाला आल्सोर मत्ता। ओसो आपसी विरोधी विचारकु मुन्ने वातांग। राजा लोरा भगवान तिंची दोरकता अधिकार कुना खंडन कियाना शुरू आत्ता ओसो “प्रतिनिधि चुने कियाना अधिकार हिल्वेके बोरे कर वेने

हीवीर” इंजी घोषणा कित्तोरा स्वतंत्रपूर्वक व्यापार कियाना अधिकार ता मांग कित्ताद मत्ता ओसो व्यक्तिगत रूप ते ज्यादा अधिकार हियाना ओसो केंद्रीय सत्ता ता अधिकार कम कियाना पूना धार्मिक विचार कुना जन्म आत्ता। पोरोटल हूडतेके स्वतंत्र मानेय उचुन वेडियते वेलियाना अधिकारकु ओसो धार्मिक रीति-रिवाज कुना काजे जीवा मंदानाजोम लडेमासोर मत्ता लेक्का दिसिंता। मति असल ते इदु पुटसोरे मत्ता पूंजीवाद ओसो डोलसोरे मत्ता सामंतवाद ता संघर्ष मत्ता, विचार कुना टक्कर गौण (सैकेंडरी) मत्ता।

अदिन काजे, काल्पनिक आदर्श-समाज ता चित्र बनेकियाना लेखक लोरा लेक्का, वायना समाज ता रचना कियाला काजे मार्क्सवाद बदे वेडियते वेलियसोर मत्ता “सिद्धान्त” कुन अमल कीवो। मार्क्सवादीरा विचार इद्रम ता सब्बे “सिद्धान्त”कु इत्तेके इंजे एवनल मानव-विज्ञान लोप्पा वातांग, अविन उंदी विशेष देश ओसो कालम ता सामाजिक संगठन ता चित्र लेक्का मंतांग। अवु हर देश ओसो कालम काजे सही मन्नोंग आतांग ओसो मंदा वेने परवोंग आतांग। इदे आयवा, बवु विचारकु हमेशा ताकसोर मत्ता लेक्का दिसिंतांग- इत्तेके मानव समानता ता विचार लेक्काटविना वेने विभिन्न सामाजिक मंजिल ते उंदे लेक्का मन्नो आंतांग। यूनान ता शहरी राज्य कुना लोप्पा मानेय ना समान अधिकार कुना सिद्धान्त गुलाम लोरा पोरो लागू आयो आयनदु। महान फ्रांस क्रांति ता “स्वतंत्रता, समानता ओसो बंधुता” सिद्धान्त कुना अर्थ केवल पुटसोर मत्ता पूंजीपति वर्ग किन खुल्लम-खुल्ला व्यापार कियाना स्वतंत्रता दोरकना इंजी मत्ता, सामंती शासक लोरा संगे अद वर्ग ता समानता दोरकना ओसो आपस ते अद वर्ग ता भाईचारा मंदाना अस्केने सामंती अत्याचारकु ओसो प्रतिबंध कुना खिलाफ आपस ते सहायता दोरकना इंजी मत्ता। मति इविना लोप्पाटल बदे वेने विचार किन फ्रांसीसी उपनिवेश कुना गुलाम या खुद फ्रांस ता गरीब लोकुरा काजे लोगू कियाला काजे तैयार हिल्ला मत्तोरा।

अदिन काजे माटु इव ज्यादातर विचारकु, विशेष रूप ते समाज ता संगठन संगे संबंधित विचार, वर्ग विचार मंदितांग इंजी वेहा परिंतोम। इत्तेके अवु असल ते अद कालम ता समाज पोरो शासन कींता ओसो इव विचार कुन बाकी समाज पोरो थोपे कीसि तासना वर्ग ता विचारकु मंदितांग, बारांकु इत्तेके इदु वर्ग प्रचार ता सब्बे साधन कुना मालिक मंदिता। शिक्षा ता व्यवस्था पोरो अदिना अधिकार

मंदिता। अदिना कैदे अदालत मंदिता, तीना संगे विरोधी विचार तासनोरकिन सजा हिया परिता। ताना कैदे लोकरकिन नौकरी तिंची तेंडसियाना ताकत मंदिता। शासक वर्ग इव सब्बे साधन कुना इस्तेमाल तन्ना विचार कुन बाकी समाज पोरो थोपे कियाला काजे कींता। इत्तेके शासक वर्ग खुद पुंजी-पुंजी मंजी इगा मत्ता विचारकु सही हिल्लेंग, मति माटु बाकी लोकर किन इदिना पोरो विश्वास कियाला काजे जबरदस्ती कियाना, लेवेके कम से कम इदिन सार्वजनिक रूप ते विरोध कियानायो इंजी ओरकिन जबरदस्ती कियाना इंजी तय कीवो आंता। इद्रम आयो आंता। साधारण रूप ते शासक वर्ग इद्रम ता विचार कु पुट्टी कीवो। विचार असली पिस्वल तिंचीए पैदा आंतांग। बदे सामंती सरदार लेवेके धनी उद्योगपति किन बस्के राजाल सामंत ता पद हितोर, शासक वर्ग ता सदस्यलोर आम जनता तुक श्रेष्ठ मंतोर इंदना विचार पुट्टना तुक भौतिक आधार बनेमानता। उंदी बेरा इद विचार जन्म आतेके अद हीर पोयिता, अस्के शासक वर्ग समाज ता हर सदस्य इदिन मानेमायना इंजी सुनिश्चित किंतोर, बारांकु इत्तेके लोकर अद विचार किन मानेमायवेके ताना पोरो अमल वेने कीवोर आयनोरा उदाहरण काजे, ओरू राजाल किन भगवान तिंची अधिकार दोरकिंता इदिन चुनौती हीतेके ओसो उचुन दिव्या पेरके राजा ना तल्ला कोयसियानूरा। अदिन काजे केवल अमेरिका लोप्पाने आयवा हर कालम ते ओसो हर देश लोप्पा शासक वर्ग “खतरनाक विचारकु” फैले कियाना तुकू रोमी कियाला काजे परताचोन कोशिश कींता।

ओसो अदेनके घटना-चक्र पोरो वेने प्रभाव वाटिता। उत्पादन ता पूरी व्यवस्था पोरो आधार मंदना विचार रूढ़ि-पंथी मंदिता। अदु मनुष्य का कार्यक्षेत्र किन बेरसना तुक रोमि किंता अदेनेके हर काल लोप्पा शासक वर्ग इद्रम ता विचारकुना प्रचार किन रोमि कियाना काजे हर संभव कोशिश किंता। मति उत्पादन ता पूना परिस्थिति पोरो आधार आसी मंदना विचार प्रगतिशील मंदिता। अद्रम ता विचार समाज लोप्पा परिवर्तन कीसि पूना व्यवस्था स्थापित कियाला काजे कार्यक्षेत्र बगिल दांतोर ओसो लोकर किन प्रेरित वेने किंता। अदेनके शासक वर्ग इद्रम ता विचार किन खतरनाक समझेमांतोरा। उदाहरण काजे इद्रम वेहना - इद सामाजिक व्यवस्था लबड़ ता मंता, इदिना लोप्पा उंदि बगिल जनता कर्वीने डोलिंता ओसो दूसरा बगिल बाजार लोप्पा मोला बेरसी

कियाला काजे तिंदना सामान किन बोडसोरे मंतोर – इद्रम ता विचार किन शासक वर्ग "खतरनाक विचार" इंजी मानेमांतोरा। इदिनगडल इद विचार पूटिता - उत्पादन बाजार लोप्पा वम्मसी मुनाफा कमाई कियाला काजे आयो, लोकुरा जरूरत पूरी कियाला काजे उत्पादन मंदना। इदिनगडले समाजवादी ओसो पेरके कम्युनिस्ट पार्टी लेक्का संगठन पुट्टिता, इदे बदलाव कीसि पूना व्यवस्था बने कियाला काजे कार्य शुरू किंतांग.

अद्रमासी सामाजिक विकास ता मार्क्सवादी दृष्टिकोण (अदिन "ऐतिहासिक भौतिकवाद" इंतोर) भौतिकवादी "नियतिवाद" आयो - अदेके केवल भौतिक परिस्थितिकुए मानेय ना सब्बे कबस्कुन निर्धारित किंता इंजी वेहो, इदिना उल्टा मानेय ना काम ओसो इविना कारण ते आयना भौतिक बदलावकु, आंशिक रूप ते अदिना बाहर ता भौतिक दुनिया ता पैदावार आंदू, ओसो आंशिक रूप ते भौतिक दुनिया किन नियंत्रण कियाना खुद ता ज्ञान तिंची पुटसी मंदितांग। मति अद केवल भौतिक दुनिया ता अनुभव संगे ने तन्ना ज्ञान हासिल कींता। अदेनके पस्ट भौतिक संसार मंदिता ओसो ताना पेरके मानेना अनुभवतल पुटता-ज्ञान पेरके वांता। इदु भौतिक दुनिया ता अनुभव मानेय किन अह्हे दोरकताद हिल्ले। तन्ना पिस्वल काजे जरूरी चीज कुन उत्पादन कियानास्के ने मानेय इदु अनुभव दोरकी कींतोर। ओसो बद्रम-बद्रम ओना ज्ञान बेरसोर दांता ओसो उत्पादन ता पूना तरीकांग ना आविष्कार कीसि अविन इस्तेमाल कियाना शुरू कींतोर, अद्रम-अद्रम सामाजिक संगठन ता पाड़ना व्यवस्था रुकावट बनेमांता। अद्रमासी पूना तरीकांग पूर्ण रूप ते इस्तेमाल आया परवोंग आंतांग। शोषित वर्ग पिस्वल पिस्सना अनुभव तिंचे इद पोल्लो ता समझदारी दोरकी कींतोर, सबसे मुन्ने ओरू उचुक खास गलतिंग ना खिलाफ लडेमांतोर ओसो समाज संगठन ता पाड़ना व्यवस्था ता कारण ते पुटता उचुक खास बाधांग किन खत्म कियाना कोशिश कींतोर। मति उचुके दिव्यांग पेरके ओरू शासक वर्ग ता खिलाफ उंदी **आम लड़ाई** लोप्पा वांतोर ओसो पूरा व्यवस्था किने बदले कियाला काजे जरूरी रूप ते लडेमांतोर।

उंदी परिस्थिति एवनल, पाड़ना व्यवस्था लोप्पाटल पूना उत्पादन शक्तिंग ना विकास आंतांग: अव अचेतन ओसो अनियोजित मंदितांग अद्रमे सामाजिक संगठन ता पाड़ना रूप किन बचे कीसि तासना पाड़ना व्यवस्था ना खिलाफ

संघर्ष वेने ताकिंता। मति हमेशा उंदी इद्रम ता परिस्थिति वांता, ताना लोप्पा पाङ्गना वर्ग संबंध कुन पूना उत्पादन शक्तिंग किन पूरा इस्तेमाल आयना तुकू रोमी कियाना बाधा लेक्का हूङ्गमूङ्गता। इदु “तन्ना कैदे वायना कालम संगे वर्ग” ता सचेत कार्रवाई ताकना स्तर ते मंता।

मति उत्पादन शक्तिंग ना विकास प्रक्रिया किन इंजे अचेतन ओसो अनियोजित आयना जरूरत हिल्ले। मानेय अस्के एवनल हालनाचोन अनुभव दोरकी कींतोर। समाजिक बदलाव ता नियम कुना ओना ज्ञान वेने वेल्ले बेरसी मंदिता। इंजे अदु सचेतन ओसो सुनियोजित तरीका ते दूसरा मंजिल ते एव्वा परिंता ओसो उंदी उत्पादन सचेतन तरीका ते ओसो सुनियोजित रूप ते ताकी कियाना समाज बने किया परिंतोर। एंगेल्स अद मंजिल ता बारे ते इद्रम वेहिंतोर:

“इंजे एवनल इतिहास ता संचालन किसोर वाता बाहरी भौतिक शक्तिंग, इंजे खुद मानेय ना कैदे वायनुंग। अनि अदिन पेरके मानेय पूर्ण चेतना संगे तन्ना इतिहास खुद बने कियाना युग शुरू आयर।”

अध्याय तीन पूँजीवादी समाज

मार्क्स ना पिस्वल ता बेहरा हिस्सा पूँजीवाद ता अध्ययन कियाना लोप्पा हत्ता। ओरू ब्रिटेन लोप्पा सामंतवाद ता जागा एतना लोप्पा सफल आसी मत्ता ओसो हत्ता शताब्दी ते पूरा दुनिया लोप्पा तन्ना अस्तित्व ता स्थापना किसोर मत्ता उत्पादन ता तरीकांग ना अध्ययन कित्तोर। ओना अध्ययन ता उद्देश्य पूँजीवादी समाज ता “गति ता नियम” ता खोज कियाना मत्ता। पूँजीवाद मुन्नेटले हिल्ला मत्ता, अदु तीरम-तीरमे बेरसिस मत्ता। मार्क्स ना कालम ते वेने ब्रिटेन ते 18 वी शताब्दी ता हत्ता हिस्सा ते “ औद्योगिक क्रांति” ताकनास्के मत्ता लेक्काटा पूँजीवाद ता रूप हिल्ला मत्ता। अद्रमासी मार्क्स ना मुन्ने तन्ना कालम ता पूँजीवादी उत्पादन ता बारे ते वेहाना समस्या हिल्ला मत्ता। ओना मुन्ने इद पूँजीवाद बद दिशा ते ओसो बारांकु बदले माया मंता इंजी विश्लेषण कियाना समस्या मत्ता। इदु उंदी पूना दृष्टिकोण मत्ता। आर्थिक सवाल कुना पोरो रासना दूसरा लेखक लोर पूँजीवाद किन तम्मा मुन्ने बद्रम दिस्सनदु अद्रमे हूड़ानोर, इदु उंदी निश्चित, शाश्वत (इतेके बदले मायवा) व्यवस्था मत्ता लेक्का। मति मार्क्स ना दृष्टिकोण ते इतिहास ता दूसरा व्यवस्थांग ना लेक्काने उत्पादन ता व्यवस्था वेने बराबर बदलेमासोर मत्ता। ओसो मार्क्स ना अध्ययन तिंची पेसता विषय लोप्पा सिर्फ वेहालाए आयवा उंदी वैज्ञानिक भाविष्यवाणी वेने मत्ता, बारांकु इतेके ओरू निज्जमे पूँजीवाद बद्रम विकसित आया मंता इंजी हूड़ाला काजे सफल आसी मत्तोर।

पूँजीवादी उत्पादन सामंती कालम ता व्यक्तिगत उत्पादन तिंची पैदा आसी मत्ता। उत्पादन ता विशेष सामंती रूप स्थानीय उपभोग काजे उत्पादन मत्ता, अनाज, गेत्तेंग ओसो बाकी सामान ता उत्पादन दास लोर तन्ना काजे ओसो

तन्ना सामंती लोरा काजे कियानोर। अतिरिक्त उत्पादन आयना शुरू आत्तास्के-
इत्तेके विशेष जन-समूह ता जरूरत तुकू ज्यादा उत्पादन आयना शुरू आत्तास्के
बाकी ता पिस्ता अतिरिक्त उत्पादन किन दूसरा देशकुने लेवेके अदे देश ता दूसरा
इलाकांग लोप्पा तत्ता चीजकुना बदला ते वम्माना शुरू आत्ता। मति उत्पादन ता
मुख्य हिस्सा इंज वेने उत्पादन कियाना समूह ओसो अदिना पोरो सामंती
अधिकार मत्ता भूस्वामी लोरे इस्तेमाल कियानोर।

इद तरीका ता उत्पादन ता जागा ते मुनाफा काजे आयना उत्पादन सामंती
व्यवस्था कमजोर आयना कालम तेने तीरम-तीरम शुरू आत्ता। मुनाफा काजे
उत्पादन आयनाए पूंजीवाद ता जरूरी निशानी आंदू। मुनाफा काजे उत्पादन
लोप्प रेंडु चीजकु जरूरी मत्तांग, बोनिगाई उत्पादन साधन कुन (कढाई-बुनाई
कियाना मशीन लेक्कटवु) अस्सा परनाचोन साधन मंदाना। ओसो दूसरा, उचुन
ता कैदे तम्मा पिस्वल पिस्सला काजे कमाई कियाना लेक्काटा साधन या
उत्पादन साधन हिल्वा लेक्काटोर मंदाना। दूसरा माटा ते वेहाना इत्तेके उंदी
“पूंजीपति” मंदाना - वीरगा उत्पादन ता साधनकु मंदाना, ओसो दूसरा मजदूर
मंदाना - वीरगा तम्मा पिस्वल पिस्सला काजे केवल पूंजीपतिरा मशीनकुना संगे
काम कियाना साधने मंता।

मजदूर इंजे केवल तन्ना काजे या तन्ना पूना “मालिक” पूंजीपति ना निजी
इस्तेमाल काजे चीज तैयार कीवोर। इंजे ओरू चीज ता उत्पादन बारांकु कींतोर
इत्तेके, पूंजीपतिर ओरकिन वम्मसी पैसा कमै किया परना इंजी। इद्रमे बने कित्ता
चीज कुन “माल” इंतोमा “माल” इत्तेके हाटुम लोप्पा वम्मला काजे तैयार कित्ता
चीजकुन इंतोर। इंजे मजदूर किन मजूरी दोरकानदु ओसो मालिक किन मुनाफा।
इस्तेमाल कियानोर माल ता दाम हियानोर। पूंजीपतिर ताना लोप्पाटल मजूरी,
कच्चा माल ता दाम ओसो उत्पादन ता दूसरा खर्च चुकता कियानोर। पिस्ता
माल तिंची ओरू मुनाफ कमै कियानोर।

इद मुनाफा बेगाडल वांता? मार्क्स वेहता लेक्का पूंजीपतिर तम्मा माल
उत्पादन मूल्य तुकू ज्यादा दाम ते वम्मतांकु मुनाफा वायो; बारांकु इत्तेके सब्बे
पूंजीपति हमेशा वरोर-दूसरोर किन धोखा हीसोर मंदिंतोर। अद्रमासी वरोर
पूंजीपति बेगा इद्रम ता “मुनाफा” कमै कींतोर अस्के दूसरोर किन नुकसान
आंता। मुनाफा ओसो नुकसान ता हिसाब बराबर आंता। ओसो सब्बे पूंजीपतिर

किन काल्पिसी दोरकना आम मुनाफा लोप्पा बातालो पिस्सो आंता। इदिना कारण हाटुम लोप्पा बद चीज ता मूल्य बचोन मंताओ, ताना लोप्पा ने मुनाफा वेने शामिल मंदानदु मंता। इत्तेके मुनाफा उत्पादन आयनास्केने तना लोप्पा पुष्टिता, माल ता बिक्री आयनास्के आयो।

अदिन काजे उत्पादन लोप्पा बदे (खुद ता मूल्य) तुकू ज्यादा मूल्य जोड़े क्रियाना लेक्काटा बाताले हिल्ले बा- इंजी हूडला काजे उत्पादन ता प्रक्रिया ता जांच क्रियाना।

मति मुन्ने “मूल्य” इत्तेके बाताल इंजी पूचेमायना जरूरी मंता। आम भाषा ते मूल्य इत्तेके रेंडु अलग-अलग अर्थ मंदा परिंतांग। पहला उपयोग ता दृष्टि ते बदे चीज ता बदे मूल्य मंदा परिंता, एरू उंडा वेस्तोरा काजे एर ता वेल्ले “मूल्य” मंदिता। साधारण भाषा ते इद शब्द ता ओसो उंडी अर्थ मंता। अदिना हिसाब ते माटु मूल्य शब्द ता इस्तेमाल बदे चीज किन हाटुम ते अस्सना या वम्मना चीज किन इंतोरा। इदिन अद चीज ता “विनिमय मूल्य” इंतोरा।

पूंजीवादी व्यवस्था लोप्पा वेने उचुन विशेष चीजकुन उचुन खास खरीदार लोरा काजेने तैयार क्रियाना ओसो अदिना विशेष दाम तय क्रियाना संभव मंदानादु निज्जमे। मति मार्क्स इद्रम ता विशेष परिस्थिति पोरो आयवा आम पूंजीवादी उत्पादन पोरो विचार किसोर मत्तोरा। अदु व्यवस्था लोप्पा हर रकम ता करोड़ों किंवटल सामान आम हाटुल काजे तैयार आंता। अगा बोरे वेने अदिन अस्सा परिंतोरा। अदिन काजे, सवाल हाटुम लोप्पा चीज ता आम “विनिमय मूल्य” बद्रम तय आंता? इंजी मंता। उदाहरण काजे, उंडी मीटर कपड़ा ता विनिमय मूल्य उंडी काटापिन तुकू ज्यादा बारांकु मंता?

विनिमय मूल्य किन रुपया संगे मापे कियमूडांता। इत्तेके उंडी चीज उचुक रुपयांग ना “मूल्य” ता बराबर मंदिता। मति अलग-अलग रकम ता चीजकुना मूल्य ता उंडी-दूसरा संगे तुलना बद्रम कियमूडांता इत्तेके - रुपयांग संगे आई लेवेके सीधा अविना अदला-बदली कीसि आई? मार्क्स अलग-अलग चीजकुना उंडी-दूसरा संगे तुलना कियाला काजे अविना लोप्पा बदे उंडी सम्मान पोल्लो मत्तेके ने अविना तुलना क्रियाना संभव मंता इंजी वेहिंतोरा। उचुन सामान लोप्पा बदे पोल्लो कम मंदियर ओसो उचुन सामान लोप्पा ज्यादा मत्ता लेक्काने अविना तुलना किया परमूडायारा। स्पष्ट रूप ते हूडतेके सब्बे चीजकुना लोप्पा

मंदाना वजन, रंग लेवेके अविना बदे दूसरा शारीरिक गुण आयोए। इदे आयवा पिस्वल काजे बदे चीज ता बचोन “उपयोग मूल्य” (इत्तेके जरूरत मत्ता तिंदाना-उंडाना पदार्थ कुना तुलना मोटर कार कुना तुलना तुकू वेल्ले कम विनिमय मूल्य मंता) इंदानास्के वेने आया परवो। इदिना समान रूप सिर्फ सब्बे रकम ता पैदावार लोप्पाने दोरकींतांग। इत्तेके सब्बे चीजकु मानेय ना मेहनत तिंचीए पुटिंतांग। बदे चीज किन पुट्टी कियाना लोप्पा ज्यादा टाईम लागिंता इत्तेके अदिना विनिमय मूल्य वेने ज्यादाए मंदिंता। **विनिमय मूल्य - बदे चीद किन बने कियाला काजे बचोन मेहनत लागता लेवेके बचोन “श्रम-काल” लागता इंदाना पोल्लो पोरो आधार आसी तय आंता।**

मति अद्रम इत्तेके हर मानेयना अलग-अलग मेहनत इंजी आयो। बदे चीज आम हाटुम लोप्पा वम्मना लेवेके अस्सना आयनास्के अलग-अलग चीज कुना रूप ते अविना विनिमय मूल्य ता औसत तेंडमूडांता। ताना पेरेके उंदी विशेष रकमता विशेष वजन वाले कपड़ा ता उंदी मीटर मेंड मत्ता उंदी तुकड़ा ता विनिमय मूल्य - इद्रम ता कपड़ा तैयार कियाला काजे **“सामाजिक रूप ते जरूरी मत्ता औसत श्रम-काल”** बचोन लागता इंदाना पोल्लो पोरो आधार आसी तय आंता।

पूंजीवादी समाज लोप्पा पैदा आयना सब्बे चीज कुना विनिमय मूल्य इदिना पोरोने आधार आसी तय आंता इत्तेके इविन पैदा कियाना असली मानेय इत्तेके मजदूर लोरकिन बचोन मजदूरी दोरकना इंदानदु बद्रम तय आंता? मार्क्स वेने इद सवाल किन इद्रमे पेश कीसि मत्तोर, माटु पूंजीवादी समाज लोप्पा श्रम-शक्ति लेवेके मानेय ना मेहनत कियाना ताकत ता वेने हाटुम लोप्पा उंदी विनिमय मूल्य मंता इंजा पुत्तोमे, अदिन काजे पूंजीवादी समाज लोप्पा पुट्टना दूसरा चीजकुना ओसो श्रम-शक्ति लोप्पा समान रूप बाताल मंता? इंदाना सवाल मुन्ने वांता। दूसरा बदे आयवा पोरो वेहता लेक्काने आम चीजकुना विनिमय मूल्य तय आंता। इत्तेके अविन बने कियाला काजे बचोन श्रम-काल लागता इंदानदु। श्रम-शक्ति उत्पादन कियाला काजे लागना श्रम-काल इत्तेके बाताल? इद्रम इत्तेके मजदूर किन पिस्वल पिस्सला काजे जरूरी मत्ताचोने तिंदाल हियाना, कपड़ा हियाना ओसो लोन पंडसी हियाला काजे बचोन टाईम (“सामाजिक रूप ते जरूरी” औसत टाईम) लागता इंदानदु। सामान्य

पूँजीवादी समाज लोप्या मजदूर परिवार कुना पिस्वल काजे जरूरी मत्ता सब्बे सामान किन सुरता तासा लागिता। इव सब्बे चीज कुना उत्पादन कियाला लोप्या श्रम-काल जरूरी मंदिता, अदिनगडले मजदूर ना श्रम-शक्ति ता विनिमय मूल्य तय आंता, अदिन ओरू मजदूरी ता बदला ते पूँजीपतिर किन वम्मिंतोर।

आधुनिक पूँजीवादी समाज लोप्या मजदूर ना श्रम-शक्ति किन बद्रम मंता अद्रमे तासला काजे रोज नालुंग घंटांग ना मेहनत हालना लेक्का मंता, मति ओरा मेहनत कियाना ताकत रोज आठ-दस घंटांग लेवेके अदिनकु वेने ज्यादा मंदिता। अद्रमासी मजदूर हर रोज मुन्ने नालुंग घंटांग तन्ना मेहनत संगे तन्ना मजदूरी ता मूल्य ता बराबर सामान तैयार कितोर; पेरके पिस्ता कालम ते ओरू “अतिरिक्त मूल्य” तैयार कींतोर, इदे अतिरिक्त मूल्य किन मालिक लोर लूटे कींतोर। इदे पूँजीपतिरा मुनाफा कमै कियाना स्रोत आंदू। मजदूर लोपा पिस्वल काजे जरूरी मत्ताचोन इत्तेके ओनकिन बचोन मजदूरी दोरकितायो, अदिनकु ज्यादा मूल्य ओरू पैदा कींतोरो अदु सब्बे पूँजीपतिरा मुनाफा आंता।

मार्क्स मूल्य ओसो अतिरिक्त मूल्य ता विश्लेषण कितोर, अदिन माटु वेल्ले संक्षिप्त रूप ते इगा तास्ताद मंता। इदु संक्षिप्त विवरण सब्बे रकम ता दृष्टिकोण ते मंता इंजी लेवेके एकदम सही मंता इंजी आयो। इदिन बचोनो रकम ते स्पष्ट कियाना जरूरत मंता, मति अद विश्लेषण ता सब्बे पॉईंटकु, सब्बे पोल्लोंग किन पोयना लेक्काट जागा इदु आयो। अदिन काजे उचुक आम पोल्लोंग बगिले इशारा कियमूझायर।

माटु “विनिमय मूल्य” पोरोल ता इस्तेमाल कीतोम बारांकु इत्तेके पूरा विश्लेषण इदिना पोरो ने आधार आसी मंता। मति असली पिस्वल ते चीजकुना सही विनिमय मूल्य दोरको आंता बहे। अदु प्राकृतिक उत्पादन मत्तेकाई लेवेके मानेय ना श्रम-शक्ति मत्तेकाई, हर चीज हाटुम लोप्या उंदे रेट ते वम्मना ओसो अस्सना आंता। इदू रेट सही विनिमय मूल्य तुकू कम वेने ओसो ज्यादा वेने मंदा परिंता। बदे चीज हाटुम लोप्या अतिरिक्त आयात आसोर मत्तास्के अदिना रेट सही विनिमय मूल्य तुकू वेल्ले कम आंता। ओसो हाटुम लोप्या अद चीज कमी मत्तेके अदिना रेट अदिना सही विनिमय मूल्य तुकू वेने ज्यादा बेरसिंता। रेटकुना परिवर्तन “सप्लाई ओसो मांग” ता आपसी संबंध तिंचे प्रभावित आसी

मंदितांग। इदिनगडल बचोनो पूंजीवादी अर्थशास्त्रि लोर रेट सिर्फ सप्लाई ओसो मांग ता संबंध संगेने निर्धारित आंतांग इंजी वेहतोरा। मति सपलाई ओसो मांग ता संबंध रेट किन घटे कियाना-बेरसी कियाना कींता, मति इद्रम ता घटाना-बेरसी कियाना ता प्रभाव रेटकुना गेरे-गेरे ने मंदिता इंदानदु स्पष्ट मंता। इद निश्चित हंदी 6 पैसा मत्तेकाई 100 रुपया मत्तेकाई सप्लाई ओसो मांग ता संबंध ते तय आयो आंता। अदु सिर्फ अद चीज ता उत्पादन पोरो खर्च आत्ता श्रम-काल संगेने तय आया पर्रिता।

श्रम-शक्ति ता असली रेट इत्तेके मजदूर किन निज्जमते दोरकना मजदूरी वेने सप्लाई ओसो मांग ता संबंध संगे प्रभावित आंता। मति इदिना संगे-संगे ताना पोरो उचुक दूसरांग पोल्लोंग ना वेने प्रभाव आंता। विशेष रूप ते मजदूर यूनियन कुना संगठन शक्तिना। इद्रम आतेकाई, आम पूंजीवादी समाज लोप्पा श्रम-शक्ति ता रेट हमेशा उंदी निश्चित हंदी गेरे-गेरे ने घटोमासोर-बेरसोर मंदिता। इदु हंदी मजदूर लोरा पिस्वल काजे जरूरी मत्ता खर्च संगे तय आंता। इद्रम आयानास्के अलग-अलग रकम ता, अलग-अलग ग्रेड कुना मजदूर लोरा जरूरतकु मंदितांग, इदु ज्यादातर मजदूर यूनियनकुना पाड़ना संघर्ष कुना कारण तेने मंदितांग, बारांकु इत्तेके इव संघर्षकु ताकसोर मत्तास्के मजदूर लोर किन समाज लोप्पा पिसी कीसि तासना स्तर तुकू उचुन पोरोटा पिस्वल-स्तर दोरकसी मंदानादिना पोरो वेने प्रभाव अर्रिता।

अलग-अलग ग्रेड कुना मजदूर लोरा श्रम-शक्ति ता मूल्य उंदी लेक्का मन्नो आंता। वरोर अनुभव मत्ता इंजीनियर ना उंदी घंटा ता मेहनत वरोर अनपढ़ मजदूर ना उंदी घंटा ता मेहनत तुकू बचोनो ज्यादा मूल्य पैदा कींता। इदिना बारे मार्क्स इद्रम वेहा मंतोर - चीजता हाटुम लोप्पा बिक्री आंता अस्के इद अंतर किन सुरता तासमूड़ांता। वरोर साधारण मजदूर उंदी घंटा ते बचोन उत्पादन कींतोर ओसो वरोर कुशल मजदूर उंदी घंटा लोप्पा बचोन चीज कुना उत्पादन कींतोर, हाटुम लोप्पा अविना नड़मा उंदी निश्चित संबंध बनेमांता।

मूल्य ता अंतर बद्रम पुट्टिता? मार्क्स ना जवाब: इद अंतर ता आधार सामाजिक आचार-विचार ता “सिद्धान्त” अनुभव मत्ता मजदूर ना काम तुकू, अनुभव हिल्वा मजदूर किनकु ज्यादा बेस मंता इंजी आयो। साधारण मजदूर किनकले अनुभव मंदाना कारिगर ना श्रम-शक्ति ता मूल्य ज्यादा मत्तेके अदिना

कारण भाप संगे ताकना एर जहाज ता मूल्य मामूली नाव तुकू बचोनो ज्यादा मत्ता लेक्का मंता। इत्तेके उंदी किन तैयार कियाला काजे दूसरा तुकू बचोनो ज्यादा मेहनत लागता। अनुभव मत्ता कारिगर ना शिक्षा-दीक्षा ते वेल्ले मेहनत लागिंता ओसो संगेने ओना काम कियाना अनुभव किन मत्ता लेक्का तासला काजे उचुन पोरो स्तर ता पिस्वल जरूरी मंदिता।

श्रम ता तीव्रता पाडना औसत तुकू ज्यादा बेरसी कीतेके श्रम-काल बेरसी कियाना लेक्का आंता इंदाना पोल्लोंग बगिल वेने ध्यान हियाना जरूरी मंता। वेल्ले तीव्र श्रम आठ घंटांग लोप्पा आम श्रम ता दस-बारह घंटांग ना बराबर मूल्य पैदा किया परमूडांता।

मुनाफा ता स्रोत तोहला काजे मार्क्स कित्ता विश्लेषण ता महत्व बाताल मंता? अदिना महत्व इद विश्लेषण तिंची पूंजीवाद काल ता वर्ग-संघर्ष पोरो वेडच वाटिंता। हर कारखाना लेवेके दूसरा उद्योग कुना लोप्पा मजदूर लोर किन हियाना मजदूरी, ओरू पैदा कित्ता मूल्य ता बराबर हिल्वा अदिना आधा लेवेके अदिनकु वेने कम मंदिता। काम कियाना दिव्या ते मजदूर बाकी मूल्य पैदा कींतोर (इत्तेके तन्ना मजदूरी ता बराबर मूल्य पैदा कियाना आयवा अतिरिक्त मूल्य पैदा कींतोर), अदिन मालिक लूटे कींतोर। मालिक हमेशा मजदूर ना हिस्सा ऊंदला, अदिन परताचोन बेरसी कियाला कोशिश कींतोर। इद्रम ओरू बचोनो रकम ते किया परितोर। उदाहरण काजे, ओरू मजदूर ना मजदूरी कम किया परितोर। इत्तेके मजदूर इंजे उंदी दिया ते तन्ना काजे कम ओसो मालिक ना काजे ज्यादा काम कींतोर। काम कियाना स्पीड किन बेरसी कींतोर, दूसरा माटा ते वेहाना इत्तेके श्रम तीव्रता बेरसी कीसि वेने किया परितोर। इद्रम कीतेके मजदूर तन्ना पिस्वल काजे जरूरी मत्ता मूल्य मुन्ने ने कम समय ते तैयार कींतोर, अदिन काजे ओना दिव्या ता मुन्नेटा बेहरा हिस्सा मालिक ना काजे काम कियाला काजे खर्च आंता। पेरके काम ता घंटांग बेरसी कीसि वेने इद उद्देश्य किन पूरा परमूडांता। इद्रम कीतेके मालिक लोरा काजे खर्च आयना दिव्या ता हिस्सा बेरसिंता। दूसरा बगिल मजदूर तन्ना परिस्थिति सुधरे कियाला काजे मजदूरी बेरसी कियाना ओसो काम ता घंटांग कम कियाना मांग कींतोर ओसो काम कियाना स्पीड किन बेरसी कियाना ता विरोध कींतोर।

अदिन काजे पूंजीपतिर ओसो मजदूर लोरा नडमा लगातार संघर्ष ताकसोर मंदिता। बस्के एवनल उत्पादन ता पूंजीवादी व्यवस्था मंदिता, अस्के एवनल इद संघर्ष ताकसोरे मंदिता। मुन्ने मजदूर अलग-अलग लेवेके सुडला-सुडला गोहडी बनेमासी मुख्य रूप ते मालिक लोरा संगे निजी संघर्ष कींतोर। पेरके तीरम-तीरम इद संघर्ष फैलेमासोर दांता। उंदी बगिल मजदूर लोरा यूनियनकु ओसो दूसरा बगिल मालिक लोरा संघ, रेंडासी तन्ना-तन्ना वर्ग कुना बेहरा-बेहरा हिस्सा किन मैदान ते तच्ची निल्पी कीतांगा। आखरी ते मजदूर लोरा राजनीतिक संगठन बनेमांतांग, इवु विस्तार आतेके सब्बे उद्योगिक मजदूर ओसो जनता ना बाकी ता हिस्सांग लोप्पा पूंजीपति वर्ग खिलाफ कार्रवाई कियाला काजे तच्ची निल्पी किया परिंतांग। इदु संघर्ष तन्ना बेहरा स्तर ते एविंता अस्के उंदी क्रांति ता रूप एतिंता। पूंजीपति वर्ग किन पलटे किंसींता अनि उत्पादन ता उंदी पूना व्यवस्था बने कींता, ताना लोप्पा मजदूर लोरकिन दिव्या ता उंदी हिस्सा ते उंदी दूसरा वर्ग काजे काम किया लागो आंता। इद पोल्लो पोरों मुन्ने वायना अध्ययन लोप्पा ओसो ज्यादा विस्तार ते वेहत्ताद मंता। इगा पूंजीवादी उत्पादन ता रूप ता कारण ते पूंजीवाद लोप्पा लगातार वर्ग-संघर्ष ताकसोर मंदिता इंदाना पोल्लो पोरो जोर हियाना जरूरी मंता। इद व्यवस्था लोप्पा, रेंडासी वर्गकु हमेशाए उंदी दूसरा ता विरोधी बनेमासी मंदितांग अद्रमासी उत्पादन कियानास्के अविना नडमा बराबर टक्करेमायना पक्का संभावना मंदिता।

मजदूरी ओसो मुनाफा ता विश्लेषण कित्ता पेरके, इंजे माटु पूंजी ता अध्ययन कियाकाल मुन्ने, उत्पादन कियानास्के मजदूर लोर पैदा कियाना “अतिरिक्त मूल्य” सब्बे पूंजीपतिरा कीसा ते हन्नो आंता इंदाना पोल्लो पोरो ध्यान जरूरी मंता। अदु उंदी रकम ता फंड लेक्का काम कींता, ताना लोप्पाटल पूंजीपतिरा अलग-अलग दलकु तम्मा-तम्मा हिस्सा तेंडिंतांग - इत्तेके जमीन ता मालिक लगान एतिंतोर, महाजन सूद पोयंतोर, बिचौलिया लोर ‘व्यापार लोप्पा मुनाफा’ कम्पै कींतोर ओसो तीनगडल पिस्तेके मुनाफा ता रूप ते उद्योगपति किन दोरकिंता। मति तीनकु पोरों हीता विश्लेषण लोप्पा बदे अंतर हिल्ले। बारांकु इत्तेके पूंजीपति वर्ग ता इव अलग-अलग हिस्सांग लोप्पा वेने लूट ता बाटांग कियाला काजे उंदी रकम ता सुडला स्तर ता संघर्ष ताकसोरे मंदिता। मति मजदूर वर्ग ता नेतुर उंडाला काजे परताचोन वीर सब्बेतोर उंदी आसी मंतोर।

पूजी इत्तेके बातल?

पूजी ता रूपकु बचोको मंतांग, मशीन, बिलिडंग, कच्चा माल, ईंधन ओसो उत्पादन काजे जरूरी बाकी चीजकु पूजी लोप्पा शामिल मंतांग। उत्पादन काजे मजदूरी हियाला काजे बचोन पैसा लागिंतायो अद वेने पूजी ताए हिस्सा आंदू। मति सब्बे मशीनकु, बिलिडंगकु लेवेके पैसा किन पूजी इंदा परवोमा उदाहरण काजे आयरलैंड ता पश्चिम बगिल समुद्र ओदा बोरे किसान निगा उंदी सुडला लोन मंता, ताना नालुंग बगिल बित्तामेंड जमीन मंता, उचुक कोंदांग-हेंरिंग मंतांग ओसो उंदी ओडा मंदा परिंता। उचुक पैसांग वेने मंदा परिंतांग मति ओरू खुद किन विडचसी बोनाए मालिक हिल्लेर, इंदानास्के ओना बदे वेने संपत्ती किन पूजी इंदा परवोमा। सोवियत रूस ता किसान लोरा नेटा परिस्थिति वेने इद्रमे मंता।

आर्थिक रूप ते, संपत्ती (अदिना भौतिक रूप बदे वेने मत्तेकाई) ता इस्तेमाल अतिरिक्त मूल्य पैदा कियाला काजे आत्तास्केने अदु पूजी बनेमांता। इत्तेके मजदूर लोरकिन नौकरी कियाला काजे तासला इस्तेमाल कीतेके ओसो चीजकु पैदा कियानास्के अतिरिक्त मूल्य पैदा कींता अस्के अदु पूजी बनेमांता।

इद्रम ता पूजी बद्रम पुटता?

पाइना इतिहास पोरो कोंडा वाटतेके शुरू ते पूजी बद्रम जमा आत्तायो अदु खुल्लम-खुल्ला लूट-पाट कीसि जमा कियाना तरीका मत्तादु दिसिंता। उचुन दुस्साहसवादी लोकर अमेरिका, हिन्दुस्तान ओसो अफ्रीका तिंची सोना लेक्का बहुमूल्य चीजकु लूटे कीसि मंजी बेहरा स्तर ते पूजी जमा कीसि मत्तोर। मति लूट-पाट कीसि पूजी जमा कियाना उंदे तरीका हिल्ला मत्ता। खुद ब्रिटेन लोप्पा, सार्वजनिक जमीनकुन ऊंदसी मंजी अविन पूजीवादी फार्म कुना मालिक लोरकिन हियाला काजे “हदबंदी कानून” कु बनेकियमूडाता। इद्रम कीसि किसान लोरगडल ओरा पिस्वल ता साधनकुन ऊंदमूडाता पेरके ओरू साधनहीन आसी सर्वहारा बनेमातोर। इंजे ओरगा तम्मा हत्ता जमीन पोरो पूना मालिक लोरा काजे काम कियाना विडचसी, पिस्वल पिस्सला काजे दूसरा बदे तरीका हिल्ले। मार्क्स वेहता लेक्का पूजी ता उत्पत्ति (“शुरूआती एकीकरण”) इदे तरीका ते आत्ता, उचुकर लोर वेत्ता कहानिंग लेक्का लोकरा कमाई तिंची

उचुन-उचुन बचे कित्ता पूंजी तिंची आयो। दोड रास्ता माटा लोप्पा मार्क्स इद्रम इंजी मजाक उडे कीतोर:

“अर्थशास्त्र लोप्पा इद्र शुरूआती एकीकरण ता भूमिका धर्मशास्त्र लोप्पा शुरूआती पाप ता भूमिका मत्ता लेक्काने मंता। आदम सेब किन तित्तोर, अदिन काजे मानेय जाति किन पाप भोगे माया लागता। मुन्ने, वेल्ले कालम मुन्ने रेंडु रकम ता लोकर मत्तोर। उंदी रकम ता मानेय वेल्ले मेहनत कियानोर, हुशियार मत्तोर ओसो वेल्ले कम खर्च कियानोर वेने मत्तोर। दूसरा लम्पट, बदमाश लोर वीरू तम्मा संपत्ती ऐशो-आराम ते पोहहानोर मत्तोर। अद्रमासी पहली रकमता लोकर संपत्ती जमा कित्तोर ओसो दूसरा रकम ता लोकरगा वम्मला काजे तम्मा तोला विडचसी दूसरा बाताले पिस्सो आत्ता। इदे शुरूआती पाप ता दिव्या तिंची दुनिया ता ज्यादातर आबादी नरका-पिय्यल मेहनत कितेकाई नेंडु वेने ओरगा वम्मला काजे सिर्फ तम्मा शरीर ता तोलाए मंता ओसो उचुन लोकर इचोन धनी आतोर इत्तेके, उंदी बेरा ओरू तम्मा कै-काल मलिहवेकाई ओरा संपत्ति बराबर बेरसोर दांता।” (पूंजी, खंड 1, अध्याय 26)

मति पूंजी शुरूआती एकीकरण ता स्तर ते रोमसी मन्नो आंता। अदु लगातार बेरसोर हत्ता। शुरूआत ते पूंजी खुल्लम-खुल्ला लूट-पाट कीसि जमा कित्ताद मंता इंजी मानेमातेकाई वेने ताना पेरके इद्र पूंजी बद्रम बेरसता ओसो अस्केटल इंजे एवनल बेरसोर बद्रम दाया मंता? इंदाना सवाल हल आयवा लेवा अद्रमे मंदिता।

लोप्पा-लोप्पा आयना लूट ता बारे ते मार्क्स इद्रम वेहितोर। मजदूर ना पिस्वल काजे जरूरत तुकू ज्यादा काम एतना ओसो बाकी टाईम ते ओरू तैयार कित्ता मूल्य किन तन्ना कीसा ते निहना इत्तेके “अतिरिक्त मूल्य” कब्जा कियाना आंता, पूंजी किन बेरसी कियाना तरीका इदे आंद। इद्र अतिरिक्त मूल्य ता उंदी हिस्सा पूंजीपति तन्ना पिस्वल पिस्सना पोरों खर्च कींतोर, बाकी पिस्ता हिस्सा किन तन्ना पूना पूंजी ता रूप ते इस्तेमाल कींतोर। इत्तेके अदिन किन तन्ना पाडना पूंजी लोप्पा जोडे किसिंतोर अनि ताना मदद ते मुन्ने तुकू ज्यादा मजदूर लोर किन नौकरी ते तासिंतोर। इद्रम कीसि ओरू उत्पादन लोप्पा मुन्ने तुकू

ज्यादा “अतिरिक्त मूल्य” लूटे कियाला सफल आंतोरा इदिनगडल ओसो वेने पूना पूंजी तैयार आंता, अद्रमासी इदु बस्केने मारवा लेवा मंदांना चक्र ताकसोरे मंदिता।

लेवेके दूसरा आर्थिक ओसो सामाजिक नियमकु काम कीवेके इदु चक्र बस्केने खत्म आयो आसी मनवड इंजी वेने इनमूंझांता। आखरी ते बस्के बेहरा बाधा वर्ग-संघर्ष तिंचिए पुट्टिता। इदु बस्के-बस्के पूरा प्रक्रिया किने रोमी कीसि पूंजीवादी उत्पादन किने खत्म कीसिंता। इदे आयवा ओसो उचुक बाधांग वेने मंतांग अवु पूंजीवाद ता विकास हल्कोए आयला हीवोंग आंतांग। इवु बाधांग वेने पूंजीवाद ता विशेष प्रकृति तिंचिए पुट्टितांग।

बस्के-बस्के आर्थिक संकट वांतांग, अविना कारण ते पूंजी ता विस्तार रोमिता ओसो अविना लोप्पा हत्ता सालकुने जमा कित्ता पूना पूंजी ता उंदी हिस्सा नष्ट आंता। मार्क्स ना माटा ते “संकट ता रूप ते उंदी महामारी आंदू - अति उत्पादन ता महामारी फैलेमासोर दाय्या मंता। हत्ता सब्बे युग लोप्पा मत्ता अंगडम मत्ता - अति उत्पादन ता महामारी लेक्का मंता।” (कम्युनिस्ट घोषणापत्र, 1848)। सामंती समाज लोप्पा बेसता फसल इत्तेके सब्बेतोरकिन ज्यादा तिंदला-उंडला दोरकना आंदू। पूंजीवादी समाज लोप्पा बेसता फसल इत्तेके मजदूर लोर अंगडम आसी करविने डोल्ला मंतोर बारांकु इत्तेके गोहकु हाटुम ते बोरे अससोर हिल्लेर अदिन काजे वायना साल ते गोहकुना फसल कम वीतला लागियर इंजी वेने आया परिंता। पूंजीवादी संकट लोप्पा बाताल आंता इंदानदु मनम सब्बेतोरम वेल्ले बेस पुत्तोमे। अति-उत्पादन आतांकु उत्पादन कियाना कम कियमूंझांता अद्रमासी मजदूर लोर अंगडम आंतोरा। ओरा बेगारी ता कारण ते हाटुम लोप्पा मांग ओसो वेने कम आंता, अदिन काजे कारखान तन्ना उत्पादन तीरम कींता, पूना कारखाना बनेकियमूंझायो, उचुक पाडनांग किन नष्ट वेने किसिंतोर (ब्रिटेन लोप्पा उत्तर-पूर्वी समुद्र-ओदा मत्ता एर जहाज बने कियाना कारखानांग, लंकाशायर ते कपडा कारखानांग संगे कित्ता लेक्का)। गोहकु ओसो बाकी फसल नष्ट किसिंतोर, अस्केने अंगडम मजदूर ओसो ओरा परिवार अदे कालम ते करविने ओसो बीमारी ता शिकार आंतोरा। दुनिया पूराए बेय्यल आत्ता लेक्का। मति आखरी ते स्टॉक खत्म आंता लेवेके नष्ट आंता। उत्पादन ओसो बेरसना शुरू आंता, व्यापार विकसित आसोर दांता, रोजगार

बेरसिंता- उंदी लेवेके रेंडु साल काजे स्थिर वसूली आंता, अद्रमासी उत्पादन ता असीमित विस्तार आंता। बस्के एवनल अचानक ओसो उंदी बरा अति-उत्पादन ओसो संकट वायो, पूरा प्रक्रिया ओसो उंदी बेरा शुरू आयो अस्के एवनल इद्रमे विस्तार आसोर दांता।

इद्रम ता आर्थिक संकटकु बारांकु वांतांग? मार्क्स ना जवाब: इदु पूंजीवादी उत्पादन ता उंदी नियम आंदू। इत्तेके बचोन ज्यादा पूंजी मंदिता, अचोने ज्यादा से ज्यादा मुनाफा कमै कियाला काजे ज्यादा से ज्यादा माल तैयार कीसि वम्मला कोशिश कींता। बचोन ज्यादा पूंजी मंदिता, अचोने ज्यादा उत्पादन आंता। संगेने बचोन ज्यादा पूंजी मंदितायो अचोने कम मजदूर लोरकिन नौकरी ते तासिंतोर। मानेय ना जागा मशीनकु एतिंतांग (इस्सल इदिन “रेशनलाईजेशन” उद्योग इंतोर)। दूसरा माटा ते बचोन पूंजी बेरसिंता, अचोने उत्पादन बेरसिंता अनि अचोने मजदूरी घटेमांता अदिन काजे अचोने माल ता मांग कम आंता। (इगा मजदूरी पूराए कम आयनायो इंजी वेहतेके बेस आयर बहे। बस्के-बस्के संकट सापेक्ष तिंची पुट्टिंता, इत्तेके व्यापार स्पीड ते आसोर मत्तांकु मजदूरी निज्जमे बेरसा परिंता, मति कुल उत्पादन तुकू अदु कमीए बेरसिंता, ताना कारण ते मांग उत्पादन तुकू पेरेकेए मंदिता)।

पूंजी ता विस्तार ओसो मजदूर लोरा मांग ता सापेक्ष ठहराव नइमा असमानता पैदा आंता, अदिनगडले आर्थिक संकटकु पैदा आंतांग। मति, आर्थिक संकट बस्के ओसो बद्रम प्रकट आंता, इदु ओसो उचुक दूसरा पोल्लोंग पोरो निर्भर आसी मंदा परिंता। 1939 ते ब्रिटेन ता सबसे स्पष्ट उदाहरण हूइतेके उंदी बेहरा हथियार उत्पादन (इदिना कारण ते सामान्य पूंजीवादी प्रक्रिया तुकू हिनपडे बाहर मत्ता माल ता सरकारी “मांग” पैदा आत्ता)। अद्रमासी इदु अनिवार्य आर्थिक संकट उचुन कालम काजे रोमिंता ओसो आंशिक रूप ते ताना पोरो पड्डा पाटा परमूडांता।

इदिना अतिरिक्त पूंजीवाद ता विकास लोप्पा ओसो उंदी पोल्लो ता वेल्ले बेहरा महत्व मंता। अदु प्रतियोगिता (होड़, प्रतिस्पर्धा)। पूंजीवादी उत्पादन ता बाकी अंग कुना लेक्काने प्रतियोगिता ता वेने रेंडु विरोधी परिणामकु मंदितांग। उंदी बगिल, ज्यादा माल वम्मला परना प्रतियोगिता ता कारण ते हर पूंजीवादी कारखाना उत्पादन ता खर्च कम कियाना कोशिश कींता। ताना काजे मजदूरी

घटे कीसि लेवेके काम ता स्पीड बेरसी कीसि लेवेके बदे दूसरा तरीका ते रेशनलाईजेशन कीसि मजदूरी ते लागना खर्चा कम कींता। दूसरा बगिल, उचुक कारखानांग वेल्ले पूंजी जमा कीसि पूना मशीनकु वाटिंतांग ओसो मजदूर लोरगडल ज्यादा माल तैयार कियाला सफल आंतांग, इद्रम कीसि तम्मा कुल मजदूरी कम कीसींतांग अदिन काजे माल ता खपत घटेमांता।

इद्रम आतेकाई बुव कारखानांग पूना मशीनकु वाटिंतांग, अविना मुनाफा ता दर पक्का बेरसिंता-कम से कम अविना प्रतिद्वंद्वी वेने अदिना पालन क्रियाना शुरू किवोर अस्के एवनला मति, सब्बे प्रतिद्वंद्वी इद्रम क्रिया परवोरा बद्रम-बद्रम औसत कारखानांग बेहरा आंतांग, अद्रम-अद्रम पूना आधुनिक मशीनकु वाटना खर्चा वेने बेरसिंता। अनि इद प्रतिस्पर्धा लोप्पा संगे-संगे ताकना कम्पनिंग ना संख्या घटेमासोर दांता। दूसरा कम्पनिंग प्रतिद्वंद्वी लोरा कैदे दांतांग लेवेके बंद आंतांग। “वरोर पूंजीपति बचोनो हड़पे कींतोरा।” इद्रमे उद्योग-धंधांग ना हर शाखा लोप्पा अलग-अलग कारखानंग ना संख्या बराबर घटेमासोर दांता। बेहरा-बेहरा इजारेदार ट्रस्ट बनेमांतांग, इवु उद्योग कुना बदे विशेष शाखा पोरो एकाधिकार जमे कींतांग। इद्रम, पूंजीवादी प्रतियोगिता लोप्पा अदिना विरोधी वस्तु पैदा आंता इत्तेके पूंजावादी एकाधिकार। इदिना कारण ते उचुक पूना पोल्लोंग पैदा आंतांग, अविना बारे ते मुन्ने वायना अध्ययन लोप्पा वेहत्ताद मंता।

अध्याय चार

पूँजीवाद ता साम्राज्यवादी अवस्था

बोलचाल ता भाषा ते साम्राज्यवाद, साम्राज्य-विस्तार लेवके पेरके अरत्ता देशकुन जीइसी उंदी साम्राज्य स्थापित कियाना नीति किन इंतोर। इदु नीति केवल दूसरा देशकुना पोरो तन्ना झंडा उंगनादु हूइना विचार तासनादु आयो इंदाना पोल्लो स्पष्ट मंता। इद नीति तुकू बचोन ज्यादा गम्भीर कारणकु वेने मंदाना परिंतांग। अदिन काजे साम्राज्य-विस्तार ता नीति पेरके उचुक आर्थिक कारणकु मंदिंतांग इंजी वेने स्वीकार किया मंतोर। उदाहरण तुकू बस्के-बस्के इदिना कारण हाटुम ओसो कच्चा माल ओसो तिंदाना-उंडाना पदार्थ कुना तलाश कियाना संगे तम्मा देश ते मत्ता अतिरिक्त आबादी उदी कियाला काजे जमीन खोज कियाना वेने आंता।

मति विदेश कुना हाटुम दोरका परिंतांग। कच्चा माल ओसो तिंदाना-उंडाना सामान वेने हमेशा ओसो वेल्ले हल्कोए विदेश तिंची वाया परिंता। ओसो अतिरिक्त आबादी किन उदी कियाला काजे जमीन सवाल हूइतेके पूँजीवाद ताए कारनामा आंदू इत्तेके अदु इद्रम ता परिस्थितिंग पैदा कींता, अद्रमासी लोकर तम्मा देश विडचसी विदेश ते हंजी रोजी-रोटी तलाश कियाला मजबूर कींता। ओसो साम्राज्यवादी विस्तार ता असली कारण बाताल आंदू?

आधुनिक साम्राज्यवाद ता पहला मार्क्सवादी विश्लेषण लेनिन कीसि मत्तोर। ओरू साम्राज्यवाद ता उंदी विशेष गुण ताना लोप्पा साधारण माल ता आयवा पूँजी ता निर्यात वेने आंता इंजी वेहतोर। ओरू खुद पूँजीवाद लोप्पा उचुन बदलावकु आतांग अविना कारण ते इव शुरू आतांग इंजी वेने तोहतोर। अदिन काजे लेनिन साम्राज्यवाद किन पूँजीवाद ता उंदी विशेष अवस्था इंजी वेहतोर। इद्रम ता अवस्था मुख्य पूँजीवादी देशकुना लोप्पा बेहरा स्तर ते एकाधिकार स्थापना कित्तास्के आंता।

औद्योगिक पूंजीवाद ता शुरू ते कारखानांग, खदानकु ओसो बाकी उद्योग धंधांग वेल्ले सुडलांग मत्तांग। नियमानुसार अवु उंदी परिवार या भागीदार मंदानोरा उंदी सुडला संख्या मत्ता। अद कालम ता सुडला कारखानांग किन शुरू क्रियामा लोप्पा ज्यादा पूंजी वेने लागो आयनदु। उचुन भागीदार लोर हल्कोए सुडला पूंजी जमा कीयानोरा। बद्रम-बद्रम पूना मशीनकु वातांग, अद्रम-अद्रम कारखानांग खोलो क्रियाला काजे ज्यादा पूंजी ता जरूरत आत्ता। ताना संगेने दूसरा बगिल कारखानांग लोप्पा बनेमाता माल ता मांग वेल्ले ओसो लगातार बेरसोर हत्ता, दस्तकारीरा माल ता खपत अचोने घटेमासोर हत्ता। मुन्ने ब्रिटेन ते इद्रम आसी मत्ता, पेरके बाकी देशकुना लोप्पा, अदिन काजे कारखानांग ना आकार वेने वेल्ले स्पीड ते बेरसता। दिव्या-दिव्या तुकू ज्यादा से ज्यादा बेहरा कारखानांग बनेक्रियाना शुरू आत्ता। रेल ओसो समुद्री जहाज कुना आविष्कार आत्ता अस्के सबसे मुन्ने लोहा ताना पेरके इस्पात ता उद्योग बेरस्तांग। अविना काजे ओसो वेने बेहरा कारखानांग बने क्रिया लागता। बदे उद्योग बेहरा आकार ता कारखानांग लोप्पा उत्पादन-खर्च कम लागता, अदिना मुनाफा ज्यादा बनेमांता ओसो अदिना विस्तार वेने ज्यादा स्पीड ते आंता। होड लोप्पा वेल्ले सुडला कारखानांग टिके माया परवोंग आतांग। अवु बंद आतांग लेवेके खुद तुकू ज्यादा शक्तिशाली प्रतिद्वंद्वी लोरा कैदे हत्तांग।

इद्रम उंदी दोहरी प्रक्रिया बराबर ताकसोर मत्तांग: उत्पादन ज्यादा से ज्यादा बेहरा कारखानांग लोप्पा केंद्रित आया मंतांग, ओसो ज्यादा ज्यादा धनी लोकुरा उंदी सुडला संख्या दिव्या-दिव्या तुकू उत्पादन ता बेहरा हिस्सा पोरो कब्जा कीसोरे मंता।

मार्क्स ना कालम ते वेने इदे प्रक्रिया शुरू आसी मत्ता, इदु ओना कोंडा तल बचेमाया परवो आत्ता। मार्क्स दिव्या-दिव्या तुकू यांत्रिक केंद्रिकरण बेरसा मंता, इत्तेके उत्पादन ज्यादातर बेहरा शाखांग लोप्पाने केंद्रित आंता इंजी वेहतोरा। संगेने मार्क्स दिव्या-दिव्या ते पूंजी वेने सुडला आसोर दायना मालिकाना ते लेवेके अदिना अधिकार लोप्पा केंद्रित आसोर दांता इंजी लोकुर किन वेहतोरा। मार्क्स इद प्रक्रिया ता अनिवार्य परिणाम स्वतंत्र प्रतियोगिता ता जागा, एकाधिकार एतंता अद्रमासी पूंजीवाद लोप्पा मकसी मत्ता मुश्किलकु ओसो वेने तीव्र रूप ते मुन्ने वांतांग।

इद शताब्दी ता शुरुआत ते आर्थिक सवाल कुना पोर्रो रासना (विशेष रूप ते ब्रिटेन ते जेए. हौब्सन) इद पोल्लो इत्तेके वेल्ले उद्योग कुना लोप्पा एकाधिकार ता रुझान वेल्ले बेरसता इंजी वेहतोरा। एकाधिकार ता विकास ता बारे ते मुन्ने वासी मत्ता तथ्य कुना बारे ते लेनिन युद्ध ताकनास्केने (साम्राज्यवादः पूंजीवाद ता चरम अवस्था पोररोल ता पुस्तक ते) जमा कीसि मत्तोरा। ओरू एकाधिकार ता आर्थिक विशेषतांग ना संगे-संगे अदिना राजनीतिक ओसो सामाजिक विशेषतांग ना बगिल वेने ध्यान हीतोरा। मार्क्स डोलता पेरके आत्ता घटनांग पोर्रो आधार आसी लेनिन मार्क्स ना स्थापनांग कुना विकास ओसो विस्तार कितोरा। ओरू पूंजीवाद ता साम्राज्यवादी अवस्था लोप्पा (ओना हिसाब ते इदु लगभग सन 1900 ते शुरु आसी मत्ता) 5 आर्थिक विशेषतांग ध्यान हियाना लेक्का मत्तांग। अवु दोड़ रास्ता लेक्का मत्तांग।

1. उत्पादन ओसो पूंजी ता केंद्रीकरण वेल्ले विकसित आसी मत्ता, इदु एकाधिकार पैदा कीसि मत्ता, अद्रमासी आर्थिक पिस्वल लोप्पा उंदी महत्वपूर्ण भूमिका निभे कित्ता।

इदु हर उन्नत पूंजीवादी देश लोप्पा आत्ता मति विशेष रूप ते जर्मनी ओसो संयुक्त राज्य अमेरिका लोप्पा। अस्केटल इंजे एवनल इद प्रक्रिया उंदी बराबर तेज आसोरे दाया मंता। ब्रिटेन लोप्पा एकाधिकार युद्ध पेरकेटल वेल्ले बेरस्ता। लंडन ट्रांसपोर्ट बोर्ड, इंपीरियल केमिकल इंडस्ट्रीज ओसो यूनिलीवर लेक्काटा कम्पनिंग मत्तांग, इविना लोप्पा हर उंदी कम्पनी ता पूंजी लगभग दस-दस करोड़ तुकू ज्यादा मंता-इदिना उदाहरण वेने मंता। (मार्क्सवादी लंडन ट्रांसपोर्ट बोर्ड लेवेके इद्रम ता बदे वेने सार्वजनिक निकाय किन बदे वेने रकम ते समाजवादी मानेमायमूडायो, बारांकु इत्तेके अवु निजी पूंजीपतिरा स्वामित्व ते मंदितांग। अवु केवल एकाधिकार आंदुंग, इविन संसद ता समर्थन दोरकसी मंदिता।) नेंडु हर उद्योग लोप्पा कुल व्यापार ता उंदी बेहरा हिस्सा उचुक बेहरा कम्पनिंग ना कैदे मंता। इव मुट्टामेंड

कम्पनिंग लोप्पा वेने आपस ते बचोन माल पैदा कियाना, ओसो अदिना रेट बचोन तासना, बेगा वम्मना इंदाना समझोतांग मंदितांग। इत्तेके उंदी हिसाब ते उंदी संयुक्त एकाधिकार कम्पनी ता रूप ते काम कींतांग।

2. बैंक कुना पूंजी कारखानांग ना पूंजी लोप्पा कलियसी मत्ता, अदिनगडल “वित्तीय-पूंजी” ता मालिक लोरा सुडला वर्ग पैदा आत्ता। इदु लगभग हर देश लोप्पा शासन कित्ता।

इदु पोल्लो किन उचुन स्पष्ट कियाना जरूरत मंता। शुरू ते, औद्योगिक पूंजीपति ओसो कारखाना ता मालिक, साहुकार लेवेके बैंक ता मालिक लोरगडल अलग मत्तोर। साहुकार लोरा कारखाना संगे सीधा संबंध हिल्ला मत्ता। इंगो, ओरु कारखानांग ना मालिक लोर किन उधार जरूर हियानोर, अनि सूद ता रूप ते मुनाफा कमाई कियानोर। मति उद्योग-धंधाना विकास आत्तास्के हिस्सेदारी वाले कम्पनिंग वेल्ले फैलेमातांग अद्रमासी बैंक कुना मालिक लोर वेने औद्योगिक कम्पनिंग ना हिस्सा अस्सना शुरू कित्तोर। दूसरा बगिल, ज्यादा धनी उद्योगपतिर बैंक कुना हिस्सा अस्सतोर। इद्रमे सबसे धनी पूंजीपति, शुरू ते ओरु कारखाना ना मालिक मत्तेकाई लेवेके साहुकार मत्तेकाई, आखरी ते ओरु साहुकार-उद्योगपति बनेमातोर। इद्रम रेंडु पूंजीवादी प्रक्रियांग उंदे जागा कलियतांकु इदु दल ता ताकत वेल्ले बेरसता (विशेष रूप ते ब्रिटेन लोप्पा बडे जमींदार वेने इदे दल ते शामिल आतोर)। बैंक कुना संबंध कारखाना संगे आत्तास्के अदु अविना रक-रकम ता मदद कियाना शुरू कित्ता। कर्ज हियाना शुरू आत्ता। दूसरा कम्पनिंग किन उधार हियानास्के अदु बद कम्पनी लोप्पा अदिना पूंजी लागता अदिना माल अस्सना इंजी शर्त तासिता। इद्रमे वित्तीय-पूंजी ता मालिक लोरा दल वेल्ले स्पीड ते तन्ना सम्पती बेरसी कित्ता ओसो उंदी पेरेके दूसरा उद्योग पोरीं अविना एकाधिकार बनेमासोर हत्ता। दिव्या-दिव्या तुकू सरकार लोप्पा वेने ओराए बारे ते पोल्लो केंजा वाया मंतांग इंजी जरूरत हिल्ले।

बैंक कु उद्योग-धंधा संगे कलियना सबसे बेसता उदाहरण - बैंक कुना मैनेजर ज्यादा से ज्यादा दूसरा कम्पनिंग लोप्पा वेने मैनेजर बनमासोर हत्तोर। इत्तेके दूसरा कम्पनिंग बैंक कुना सम्पत्ति आंता इंजी आयो। असल इत्तेक बैंककुना दुनिया ते मुट्टामेंड लोकरा कैदेने ताकत मंता, ओरे उद्योग-धंधांग ओसो

व्यापार कुना दुनिया लोप्पा वेने ताकतवर मंदिंतोरा इंजे मुट्टामेंड अमीर लोराए पूंजी पूरा ब्रिटिश पूंजीवाद संगे ताका मंता। 1870 ते बैक ऑफ इंग्लैंड ओसो “पांच बेहरा” इंदाना बैककुना मैनेजर लोर कुल मिले कीसि 157 पद मत्तांगा। 1913 ते इदु संख्या 229 आत्ता अनि 1939 ते इदु संख्या 1150 आत्ता। इव संख्या ना पेरके बचोन बेहरा ताकत मकसी मंता इंदानदिना अंदाजा वाटला काजे 1939 ता संख्या लोप्पा युनिलीवर ओसो आई.सी.आई लेक्काटा खुद बचोनो सुडला-सुडला कारखानांग किन लोपसी मत्ताचोन बेहरा कम्पनिंग वेने शामिल मंतांग इंजी पुंदाना जरूरी मंता।

3. वस्तु निर्यात तुकू अलग पूंजी निर्यात ता महत्व बेरस्ता। पूंजीवाद ता शुरूआत ते ब्रिटेन कपड़ा ओसो कारखानांग लोप्पा बनेमाता दूसरा माल विदेश लोहनदु ओसो तानगडल दोरकता पैसा संगे स्थानीय उपज अस्सनदु। इद्रमे असल ते अदु तन्ना कारखानांग बने कित्ता माल किन ब्रिटिश उद्योग काजे जरूरत मत्ता कच्चा माल ओसो तिंदना-उंडना सामान संगे बदले कियानदु। मति हत्ता शताब्दी ता उत्तरार्ध ते ओसो विशेष रूप ते ताना आखरी ते, वित्तीय पूंजी गिर्दा ज्यादा से ज्यादा पूंजी निर्यात कियाना लोप्पा बेरसता। इदिना उद्देश्य व्यापारिक अदला-बदली आयवा पूंजी पोरो हर साल सूद वसूल कियाना मंदानदु। इदु पूंजी विदेशी सरकारकु लेवेके विदेशी कम्पनिंग किन उधार हियमूडायनदु, लेवेके अंग्रेजी साम्राज्य लोप्पा शामिल दूसरा देशकुना रेल, एर जहाज रोमना अड्ढा ओसो खदान कुना लोप्पा वाटमूडानु। ताना संगेने बोर उधार पोयंतोर ओरू सब्बे सामान उधार हियाना बैक कुना संगे संबंध मत्ता ब्रिटिश औद्योगिक कम्पनिंग नगडल अस्सना इंजी शर्त मंदानदु। इद्रमे वित्तीय पूंजी ता रेंडासी अंग संगेने काम कियानवु। इद्रम सब्बेतोर वेल्ले मुनाफा कमई कियानोर अनि तम्मा प्रतिद्वंद्वी लोर किन गरे वायाला हीवो आयनवु।
4. पूंजीपतिरा अंतरराष्ट्रीय एकाधिकार गुट बनमासी मत्तांगा ओरू दुनिया किन तम्मा नडमा तूसीस मत्तोरा।

इस्पात, निर्य्य ओसो बाकी उद्योग कुना लोप्पा वेने इद्रमे आत्ता। विभिन्न देशकुना एकाधिकार गुटकुना नडमा कुल विदेशी व्यापार ता बचोन हिस्सा बोना

कैदे मंदाना इंजी समझौतांग आसी मत्तांग। हमेशा मेन-मेन हाटुम भी तूसिस मत्तोर ओसो रेट वेने तय किताद मत्ता। इव समझौतांग ना हंदिंग पोरो माटु पेरके आल्सकाला।

5. सबसे बेहरा ताकत कुना नड़मा दुनिया ता बटवारा लगभग पूरा आसी मत्ता। (1876 ते अफ्रीका ता 11 प्रतिशत हिस्सा यूरोपीय शक्तिना कब्जा ते हत्ता, ओसो 1900 एवलन 90 प्रतिशत ओरा अधिकार ते हत्ता)।

इद पोल्लो ता महत्व दुनिया ता बटवारा पूरा आत्ता पेरके खाली कै ओसो कमजोर देशकुना पिस्वल हिल्वा लेक्का आसी मत्ता। सबसे ज्यादा धनी देशकुना वित्तीय पूंजी ता मालिक लोरा मुन्ने तम्मा साम्राज्य किन बेरसी कियाना अविनगा सिर्फ उंदे तरीका मत्ता। उंदी दूसरा ता गुडंगा कोय्यदना, इत्तेके ओसो उंदी बेरा दुनिया ता बटवारा आयना इंजी बेहरा-बेहरा युद्ध आयना ओसो राज्य जीड़ना ओसो दूसरोरा साम्राज्य किन ऊंदना।

इदिना बारे ते लेनिन ना वेहता उंदी विशेष पोल्लो ता नेंडु वेल्ले महत्व मंता। साधारण रूप ते हर साम्राज्यवादी देश तम्मा साम्राज्य-विस्तार कियाना कोशिश ते सिर्फ उपनिवेश लेवेके गुलाम देशकुने तम्मा अधिकार ते तत्ताना कोशिश कींता। लेनिन इंतोर इदु जरूरी हिल्ले इंजी। साम्राज्य-विस्तार ता कर्वु सब्बे लोपना लेक्का मंदिता, आवश्यक परिस्थितिंग पैदा आतेके योरोप ता दूसरा राज्य वेने इदिना शिकार आयनुंगा। नात्सी कालम ते जर्मन वित्तीय पूंजी ता इदे दिशा ते कोशिश कियानदु, इदिना स्पष्ट उदाहरण मंता।

इद पूरा विश्लेषण पोरो आधार आसी लेनिन पूंजीवाद ता साम्राज्यवादी अवस्था, अनिवार्य रूप ते तन्ना संगे उंदी बगिल बेहरा-बेहरा आर्थिक संकट ओसो विश्वव्यापी युद्ध तत्तिता, ओसो दूसरा बगिल मजदूर-क्रांतिंग तत्तिता अनि साम्राज्यवादी शोषण ता खिलाफ उपनिवेश-अर्धउपनिवेश देश कुना शोषित जनता ना विद्रोह किन जन्म हींता, इंदाना निष्कर्ष तेंडतोर, इदु पोल्लो पेरकेटा सब्बे अनुभव कुना लोप्पा सही साबित आत्ता।

पूंजीपतिरा सुडला-सुडला समूह कुना कैदे पूंजी जमा आंता इत्तेके अदिना उंदी कारण इव समूह कुना सरकारी मशीन पोरो मालिकाना बेरसना वेने आंता।

अदिन काजे विभिन्न देश कुना सरकारी नीति इव समूह कुना हित ते ज्यादा जुडेमासी मंता। इदिना कारण ते ने हर देश लोप्पा वित्तीय पूंजी समूह काजे बाहर तिंची वायाना माल पोरो कर वाटना, कोटा ओसो बाकी सरकारी आदेश कुना संगे तम्मा विदेशी प्रतिद्वंद्वी लोरा संगे लडेमायना लेवेके युद्ध शुरू कियाना संभव किसिंता।

प्रतिद्वंद्वी समूह लोप्पा संघर्ष बारांकु जरूरी मंता? ओरू आपस ते समझौता कीसि दुनिया ता बटवारा बारांकु कीवोर?

पोरो माटु विभिन्न देश कुना एकाधिकार गुट दुनिया ता हाटुमकु तम्मा नडमा तूसना समझौता कींता इंदाना पोल्लो वेहतोमा। पोरोटल हूडतेके इदिनगल इद्रम आतेके प्रतियोगिता, पूंजीपतिरा होइ पूराए खत्म आयार ओसो उंद हिसाब ते ओरा स्थायी हितकु अंतरराष्ट्रीय स्तर ते शामिल आयनुंग इंजी इनमूडांता। मति लेनिन तथ्य ओसो आंकडांग पेश कीसि अन्तरराष्ट्रीय समझौतांग बस्के वेने स्थायी मन्नोंग इंजी वेहतोरा। इंजे 1905 ते बदे समझौता आसी मत्तेके, अदिना आधार 1905 ते विभिन्न समूह ना इत्तेके ब्रिटिश, फ्रांस, जर्मन ओसो अमरीकी समूह ता उत्पादन शक्ति बचोन मत्तायो अदिना अनुसारे अविना नडमा हाटुम ता बटवारा कियाना आयार। मति पूंजी ता नियम अदु हमेशा असमान गति तेने बेरसनदु मंता, अदिन काजे इद्रम ता समझौतांग उचुन सालकु पेरके जर्मन समूह, अमरीकी समूह लेवेके बदे दूसरा समूह ता उत्पादन शक्ति बेरसियर ओसो पाडना बटवारा कारण ते परेशान आयार। दूसरा समूह अदे कालम ते लचीलापन तोहवेके, ओसो उंदी बेरा शुरू तिंची ओसो मुन्ने तूक वेने ज्यादा स्पीड ते हाटुम कुना काजे संघर्ष शुरू आयार। असल ते इद्रम ता सब्बे समझौतांग इद्रमे खत्म आंतांग। असमान विकास ता नियम केवल विशेष औद्योगिक समूह कुना पोरो ने आयवा विभिन्न देशकुना सम्पूर्ण पूंजी पोरो वेने लागू आंता, अदिन काजे आर्थिक समझौतांग किन विभिन्न देशकुना वित्तीय पूंजीपतिरा समूह नडमा लगातार ताकसोर मंदाना व्यापारिक युद्ध किन रोमी कियाना समझौतांग लेक्काने समझेमायना।

सिर्फ आर्थिक युद्ध संगे बदे वेने समाधान आया परवो। विभिन्न वित्तीय पूंजीवादी समूह तन्ना-तन्ना देश ता सरकारी मशीन संगे प्रतिद्वंद्वी लोर किन रोमी कियाला काजे टैक्स ओसो कर वाटिंतांग। विदेश तिंची वायाना माल ता कोटा

तय किसिंतांग दूसरा देशकुनगडल विशेष सुविधा हियाना व्यापारिक समझौतांग कींतांग, तम्मा एकाधिकार तासा परना लेक्काटा इलाका किन बेरसी कियाला कोशिश कींतांग, इद्रम कीसि अबु कम से कम उचुन कालम काजे तम्मा प्रतिद्वंद्वी लोरा पोरो दबाव वाटला काजे युद्ध ता तैयारी कींतांग।

देश-देश लोप्पा वित्तीय साहुकार लोरा समूह कैदे सम्पत्ती जमा आसी मत्ता कारण ते हमेशाए बेहरा-बेहरा ताकतकु ना नडमा बेहरा स्तर ते युद्ध शुरू आंता, अनि भयानक रूप एतिंतांग। पोरो-पोरो हूडतेके शुद्ध आर्थिक प्रक्रिया दिसिंता, इत्तेके उत्पादन ता ओसो पूंजी ता केंद्रीकरण दिसिंतायो, अदिना सीधा परिणाम उंदी भयानक सामाजिक विपत्ति, इत्तेके युद्ध मंदिंता।

युद्ध ता बारे ते मार्क्सवादी दृष्टिकोण निराकरणवादी शांति ता दृष्टिकोण हिल्ले। मार्क्सवाद स्वतंत्रता काजे जूझेमासोर मत्ता राष्ट्रियताकुन खत्म कियाला काजे ताकना साम्राज्यवादी युद्ध कुना निंदा कींता। इद्रम ता युद्ध कुन मार्क्सवाद अन्याय ता युद्ध मानेमांता। मति राष्ट्र, साम्राज्यवादी आक्रमण कुना प्रतिरोध कियाला काजे लेवेके साम्राज्यवादी शासन तिंची मुक्ति दोरकी कियाला काजे युद्ध कींता ओसो जनता शोषण किन खत्म कियाला काजे गृह-युद्ध शुरू कींता अस्के मार्क्सवाद इव युद्ध कुन सच्चाई काजे ताकना युद्ध इंजी मानेमांता। बारांकु इत्तेके शोषक लोरा पोरो जनता ना जीत संगेने युद्ध पैदा आयाना परिस्थितिंग किन खत्म किया परमूडांता।

बदे साम्राज्यवादी देश ता सरकार अन्याय ता युद्ध किया मंता, इंदानास्के अद देश ता मजदूर वर्ग ता कर्तव्य अद युद्ध ता हर संभव तरीका ते विरोध कियाना मंदिंता ओसो ताना लोप्पा ताकत मत्तेके सरकार किन मुटी कीसि ताकत पोरो कब्जा कियाना, युद्ध खत्म कियाना ओसो समाजवाद बगिल मुन्ने दायना कर्तव्य मंदिंता।

प्रतिद्वंद्वी साम्राज्यवादी समूह नडमा प्रतिगोगिता ता संघर्ष ताकिंता, साधारण रूप ते इदिना कारण ते परिस्थिति बिगडेमांता। यांत्रिक रेशनलाईजेश आंता, इत्तेके कम समय ते ओसो कम मजदूर लोरा संगे ज्यादा उत्पादन पैदा कियाना पूना मशीनकु वाटितोर, अद्रमासी मजदूर किन वेल्ले स्पीड ते काम किया लागिंता। उत्पादन ता खर्च कम कियाना ओसो इद्रम ता पूना हाटुम किन कब्जा कियाना लेवेके पाइना हाटुम कुन प्रतिद्वंद्वीरगडल बचे कियाला काजे,

मजदूरी काटे कियाना आंता। बेहरा-बेहरा एकधिकार कम्पनिंग खेती ता पैदावार (कच्चा माल) ता रेट घटे किसिंता। हथियार अस्सना ओसो युद्ध ता बाकी तैयारिग कियाला काजे पैसा बचे कियाना उद्देश्य ते सरकार समाज सेवा ता काम पोरो खर्च कींता। आर्थिक संकट मुन्ने तुकू बचोनो ज्यादा गंभीर आंता, ओसो मुन्ने तुकू बचोनो ज्यादा दिव्यांग एवनल ताकिंतांग।

इव सब्बे ना कारण ते वर्ग संघर्ष ओसो साम्राज्यवादीरा विरुद्ध औपनिवेशिक जनता ना संघर्ष ओसो वेने तीव्र आंता पूंजीवाद ता साम्राज्यवादी चरण ता कालम केवल युद्ध कुनाए आयवा क्रांतिंग ना युग वेने मंदिता।

मति पूंजीवादी-साम्राज्यवादी चरण ता ओसो उंदी विशेष ता मंता, अदिन लेनिन तन्ना विश्लेषण लोप्पा पेश कींतोरा। साम्राज्यवादी देश कुना एकाधिकारी गुट पेरके अरता जातिंग ना शोषण कीसि औसत ज्यादा मुनाफा कमई कींतांग। इदिना कारण इव राष्ट्र कुना उत्पादन कियाना तरीका पाड़ना कालम ता मंदियर, अदिन काजे ओरा पिस्वल ता स्तर वेल्ले पेरके अरसी मंता। दूसरा ओरा जीवा हिल्वा लेक्काटा शासक ओसो पूंजीपतिर ओरकिन जबरदस्ती जानवर कुना लेक्काटा परिस्थिति ते तासिंतोरा। तीसरा, मशीन कुना संगे बनेमाता माल ता कैदे बने कित्ता माल संगे अदल-बदली कियानास्के विनिमय मूल्य वेल्ले ज्यादा तासमूडांता। इगा माटु माल ता कोटा ता बारे वेहा मंतोम। पढेमायनोर किन बदे वेने चीज ता विनिमय मूल्य अदिन तैयार कियाला काजे सामाजिक दृष्टि ते जरूरी औसत मेहनत बचोन लागता इंदाना पोल्लो पोरो आधार आसी तय आंता इंजी सुरता मंदियर। हूडाटू, ब्रिटेन लोप्पा मशीन संगे उंदी मीटर कपड़ा तैयार कियाला काजे सामाजिक दृष्टि ते जरूरी मेहनत बचोन लागिंतायो, कैदे ताकना कपड़ा मशीन (हथकरघा) ते उंदी मीटर कपड़ा तैयार कियाला काजे अदिनकु दस गुना लेवेके बीस गुना ज्यादा मेहनत लागिंता। मति मशीन ते बने कित्ता कपड़ा हिंदुस्तान लोप्पा वाता अस्के अदिना विनिमय मूल्य उंदी मीटर हिंदुस्तानी (कैदे बनेमाता) कपड़ा ता बराबर मत्ता। इत्तेके हिंदुस्तान ते अदिना ब्रिटेन तुकू बचोनो ज्यादा मूल्य मत्ता। इदु बेरस्ता मूल्य ता बराबर कीमत ता हिंदुस्तानी सामान-कच्चा माल लेक्कटवु ब्रिटेन लोप्पा वम्ममूडांता अस्के इद पूरा प्रक्रिया ता परिणाम ब्रिटेन लोप्पाने अदु उंदी मीटर कपड़ा वम्मतेके मुनाफा दोरकिंता ओसो हिंदुस्तान ओसी वम्मतेके अदिनकु बचोनो ज्यादा मुनाफा

दोरकिता। मशीनकु उंदी लेक्का मत्तेकाई वेने कारीगर लोरा निपुणता ता वेल्ले प्रभाव मंदिता ओसो अदिना कारण ते वेने अतिरिक्त मुनाफा दोरका परिता। इद पोल्लो केवल कपड़ा पोर्रो ने आयावा इद्रम ता सब्बे सामान लोप्पाटल अतिरिक्त मुनाफा दोरकिता। बारांकु इत्तेके वित्तीय पूंजी वाले समूह हंदी हिल्लाचोन सम्पत्ति जमा कींतांग। एलेरमैन ना लगभग 55 करोड़ ओसो युल ना लगभग साढ़े 26 करोड़ रुपयाना सम्पत्ति ज्यादातर अतिरिक्त मुनाफा तिंचिए जमा आत्ता।

गुलाम लेवेके औपनिवेशिक देश कुना जनता ना शोषण संगे पैदा आयना अतिरिक्त मुनाफा ता मजदूर आंदोलन काजे विशेष महत्व मंदिता। मार्क्स इदिना बारे ते इद्रम वेहंतोर-ब्रिटिश पूंजीपति वर्ग सबसे मुन्ने दुनिया मेंड मशीनकुना संगे बनेमाता माल वम्मला शुरु कित्ता, अदिन काजे ब्रिटिश मजदूर वर्ग तन्ना परिस्थिति सुधरे कियाला काजे पूंजीपतिरा पोर्रो दबाव वाटतास्के पूंजीपति वर्ग ब्रिटेन ता निपुण मजदूर लोरा पोर्रोटा हिस्सा किन उचुन सुविधांग हींता। इद्रमे ब्रिटेन ता इंजीनीयर ओसो कपड़ा मील कुना लोप्पा काम कियाना निपुण मजदूर लोरा लोप्पाडल उचुन मुल तम्मा पिस्वल स्तर किन दूसरा देशकुना मजदूर लोरकिनकु पोरो तेहा परतोर। अद्रमासी उचुन मुल उपनिवेश ता पूंजीवादी शोषण लोप्पाने तम्मा हित हूडालातोर। लेनिन औद्योगिक दृष्टि ते उन्नत हर देश लोप्पा साम्राज्यवादी अवस्था वातास्के बाकी मजदूर लोरकिनकु बेसता परिस्थिति ते मंदाना मजदूर लोरा हिस्सा, विशेष रूप ते अदिना नेता लोर “अवसरवादी” बनेमांतोर। इत्तेके वीरू देश ता आम मजदूर लोरा पेरके अरता परिस्थिति ता बारे आल्सवा लेवा उचुन बेसता परिस्थिति तुके खुश आसी तम्मा बगिल तल पूंजीपति वर्ग संगे समझौता कींतोर। साम्राज्यवादी अवस्था ता विकास संगे-संगे इद रुझान वेने तेज आत्ता। अद्रमासी मजदूर ओसो समाज वादी आंदोलन ता प्रमुख लोकुर, तम्मा देश ता वित्तीय पूंजी ता गुट का साम्राज्यवादी नीति किन मानेमायलातोर। मुन्नेटा युद्ध लोप्पा हर जागा ते (रूस किन विडचिसी, बेगाटा बोल्शेविक मार्क्सवादी बनेमासी मत्तोर) मजदूर आंदोलन ता नेता लोर युद्ध तिंची दोरकना मौका ता फायदा एतसी पूंजीपति वर्ग तिंची ताकत पिडंगला काजे आयवा ओरकिन “तम्मा देश ता” साम्राज्यवादिरा लड़ाई ते साथ हीतोर।

वेल्ले देशकुना लोप्पा मजदूर वर्ग ता पार्टिंग ना नेता लोर “अवसरवादी” दृष्टिकोण (शासक वर्ग ता हित कुना संगे तम्मा हित काल्पसियाना रुझान) ता कारण ते 1914-18 ता लडाईं पेरके, मजदूर वर्ग ता मार्क्सवादी दृष्टिकोण पोरो दृढ मंदांना ओसो मजदूर आंदोलन किन मार्क्सवाद हर्दे ताकी कियाना कोशिश किया परना इंजी कम्युनिस्ट पार्टिंग ना स्थापना आवश्यक आत्ता।

साम्राज्यवादी अवस्था ते औपनिवेशिक जनता ना स्वतंत्र ता संग्राम वेने मुन्ने तुकू ज्यादा विस्तार आत्ता, वेल्ले तेज आत्ता। बदे औपनिवेशिक देश पोरो साम्राज्यवाद ता कब्जा आंता ओसो पूंजीवाद ताना लोप्पा नेंगना शुरू कींता, अस्के उत्पादन ता पाडना व्यवस्था तितर-बितर आंता अनि मुन्नेटले ज्यादातर लोकर बदिना पोरो आधार आसी पिस्सा मंतोरो अद आधार नष्ट आंता। लंकाशायर ता मील संग प्रतियोगिता शुरू आत्तास्के हिंदुस्तानी बुनकर लोरा रोजगार नष्ट आत्ता, ओरू तम्मा हथकरघा विडचसी खेती कियाना शुरू कितोरा। अद्रमासी भूमि पोरो आबादी ता बोजा ओसो वेने बेरसता। साम्राज्यवादी अवस्था ते सरकारी कर्जा ता ब्याज निहना ओसो साम्राज्यवादी शासन ता गैरफौजी ओसो फौजी मशीन कुना खर्चा चले कियाला काजे पूना-पूना कर वाटानोरा। इविना कारण ते सब्बे जनता पोरो आर्थिक बोजा बेरसता। उंदी बगिल इदु दोहरी जत्ता उपनिवेश कुना जनता किन पीसे कींता। दूसरा बगिल बेहरा-बेहरा एकाधिकारी कम्पनिंग जबरदस्ती उपनिवेश कुना पैदावार ता मूल्य घटे कींता। अदिन काजे गरीबी वेल्ले बेरसिंता ओसो लोकर निज्जमे कर्विने डोलिंतोरा। इदिनगडल किसान संघर्ष कुना काजे जमीन तैयार आंता, अनि उपनिवेश लोप्पा बराबर ताकसोर मंदिता। शहरी कारखानांग ना उत्पादन वेल्ले मुश्किल परिस्थिति ते ताकी किंतोरा। मजदूर लोर किन संगठित कियाना हर्दे रकरकम ता बाधांग वाटितोर, ओसो संभव आत्तास्के ओरकिन हौकसिंतोर वेने। मध्यम वर्ग ता लोकर, विशेष रूप ते बुद्धिजीवी, साम्राज्यवादी शासन ता बंधन कुना दोड तिप्पल ते पिसिंतोरा। उपनिवेश कुना मोड्यसोर मत्ता पूंजीपति, साम्राज्यवाद ता कारण ते तन्ना विकास आया परवोर आंतोरा। इद्रमे उंदी विशाल ओसो व्यापक स्वतंत्रता आंदोलन नित्तिंता। हर औपनिवेशिक देश लोप्पा विभन्न परिस्थितिंग लोप्पा इदे प्रक्रिया दिसिंता।

मार्क्सवाद इव संघर्ष कुन पूंजीवादी शोषण ता अनिवार्य परिणाम रूप ते हूडिंता। ओसो इविन साम्राज्यवादी गुट कुना तख्ता पलट कीसिए इवना अंत आयार इंजी समझेमांता। अदिन काजे तन्ना लेक्काटा दुश्मन साम्राज्यवादी देश ता वित्तीय-पूंजीवादी गुट ता खिलाफ औपनिवेशिक जनता संगे संयुक्त मोर्चा बने कींता।

बेहरा शक्तिंग ना वित्तीय-पूंजीवादी गुट कुना आपसी संघर्ष ता कारण ते ताकता मुन्नेटा युद्ध कालम ते ने पूंजीवाद ता आम संकट शुरू आसी मत्ता। 1917 ते रूस ता मजदूर वर्ग लेनिन ओसो स्तालिन ना नेतृत्व ते बोल्शेविक पार्टी ता नेतृत्व ते पूंजीपतिर ओसो जमींदार लोरा शासन पलटे कीसि इतिहास लोप्पा पहली समाजवादी राज्य ता स्थापना कित्तोर। अस्केटल दुनिया रेंडु हिस्सा ने बटेमाता। उंदी समाजवादी हिस्सा ताकत ओसो असर बेरसोरे दांता, ओसो दूसरा पूंजीवादी हिस्सा तीना लोप्पा साम्राज्यवादी अवस्था वाले पूंजीवाद ता सब्बे अंदरूनी विरोधकु बेरसोर मत्तांग ओसो पूंजीवादी समाज ता राजनीतिक ओसो आर्थिक नींव कमजोर आया किया मत्तांग

अध्याय पांच वर्ग संघर्ष ओसो राज्य

दूसरा अध्याय लोप्पा माटु मार्क्स ना वर्ग संघर्ष ता आम सिद्धांत ता बारे ते वेहतोमा समाज किन वर्ग कुना लोप्पा अलग-अलग तूसियाना उत्पादन व्यवस्था तिंची वर्ग संघर्ष पैदा आंता - तीना लोप्पा उंदी वर्ग निज्जमे उत्पादन कींता (गुलाम, अर्ध-गुलाम, किसान-मजदूर) ओसो दूसरा वर्ग उत्पादन काजे बिना कै-काल मलिहवाए उत्पादन ता उंदी हिस्सा ता इस्तेमाल कींता (गुलाम लोरा मालिक, सामंती भूस्वामिर, पूंजीवादी मिल-मालिक लोर)। मति हर युग ते इव वर्ग कु आयवा दूसरा वर्गकु वेने मंतांग। पेरके अरता (“औपनिवेशिक” ओसो “अर्ध-औपनिवेशिक”) देशकुना लोप्पा नेंडु वेने पैदा आसोर मत्ता पूंजीपति वर्ग (विदेशी पूंजीपतिर आयवा) ओसो उंदी बेरसोरे मत्ता मजदूर वर्ग संगे-संगे सामंती भूस्वामी ओसो अर्ध-गुलामी तुकू उचून बेस स्थिति ते मंदाना किसान वेने दोरकितोर।

उत्पादन तुन उच्च स्तर ते ओयला काजे वर्ग संघर्ष मानेय ना मदद कींता। बदे वेने क्रांति सफल आत्तास्के उत्पादन ता उच्च रूप वांता लेवेके व्यापक रूप ते विस्तार कियाना आंता। ब्रिटेन लोप्पा पूंजीवादी विकास ता हरीं क्रॉमवेल ना क्रांति ओसो 1689 ता “महान क्रांति” तेरियता। फ्रांस काजे इद काम 1789 ता महान फ्रांसीसी क्रांति ओसो ताना पेरके ताकता क्रांतिंग हरीं पंडतांग।

मति मार्क्स सामान्य माटा ने वेहसी संतुष्ट आत्ताद हिल्ले। ओरु वर्ग संघर्ष कुना नियम ता बारे ते पुंदाना इंजी तन्ना कालम ता संघर्ष कुना गंभीर रूप ते अध्ययन कितोर।

इद लडई ता डावपेच ता सवाल आयोए। मार्क्स सामाजिक विकास किन समझेमायला काजे निज्जमे इद्रम ता क्रांतिकारी आंदोलन कुना लोप्पा शामिल

आयाना ओसो उंदी पूना तरीका ते उत्पादन किन बेरसी कियाना वर्ग-शक्तिंग ना विश्लेषण किया लागियर इंदाना पोल्लो किन चीनेमातोर। यूरोप ता बचोनो देश कुना विशेष रूप ते 1848 ता क्रांतिकारी घटनांग ना अध्ययन कित्ता पेरके मार्क्स उचुक सब्बे पोरो लागू आयना आम पोल्लॉंग ना बारे ते जानकारी दोरकी कित्तोर।

सब्बे क्रांतिंग लोप्पा दिसना पोल्लॉंग लेवेके नियमकु बातांग आंदुंग?

पहली पोल्लो, क्रांतिकारी संघर्ष किन हमेशाए उत्पादन ता पूना व्यवस्था लोप्पा ताकत ओसो अधिकार दोरकी कियाना वर्गे ताकी कीता। मति अदु वरीए इद काम किवो आंता। उदाहरण काजे, 1789 ता महान फ्रांसीसी क्रांति लोप्पा पैदा आयना पूंजीपति वर्ग संगे-संगे, सामंतवादी युग ता उत्पादक वर्ग इत्तेके किसान, सुडला व्यापारी, स्वतंत्र दस्तकार ओसो पूना पुटना मजदूर वर्ग ता पाड़ना वर्ग वेने शामिल मंता। आबादी ता इव सब्बे हिस्सांग पाड़ना व्यवस्था ता शासक वर्ग ता खिलाफ क्रांतिकारी संघर्ष लोप्पा शामिल आतांग, बारांकु इत्तेके अलग-अलग रूप ते स्वार्थ मतेकाई वेने अवु सब्बे पड़ना व्यवस्था लोप्पा ओरा काजे दमन, पूना मुश्किलकु मंतांग इंजी बेसे समझेमातांग।

यूरोप ता दूसरा क्रांतिंग लोप्पा वेने इद्रमे आत्ता। इव क्रांतिंग पेरके ताकतांग। इवु बचोनो देशकुना लोप्पा सामंती शासक लोरा निरंकुश सत्ता किन पलटे कितांग ओसो पूंजीवादी उत्पादन काजे हरी पंडतांग। जनता ना लगभग सब्बे दूसरा हिस्सांग, पाड़ना शासक वर्ग ता खिलाफ उंदी मत्तांग। शुरू ते हमेशाए पूना शासक वर्गे पैदा आसोर मत्ता पूंजीपति वर्गे क्रांति ता नेतृत्व कित्ता। संघर्ष ताकनास्के, विशेषकर बेगा-बेगा मजदूर वर्ग उंदी निश्चित अवस्था एवनल विकसित आसी मत्ता, अगा पूना-पूना गठबंधन कुना स्थापना आत्ता। तन्ना अधिकार काजे संघर्ष लोप्पा शामिल आसी मत्ता जनता ना मेहनतकश हिस्सा, पूना पूंजीवादी शासक वर्ग मानेमायला तैयार हिल्ला मत्ता मांग कुन बुलंद कित्ता।

इद्रम ता परिस्थिति ते जनता ना मेहनतकश हिस्सा तन्ना मांग कु जबरदस्ती माने कियाला कोशिश कियानदु, पूंजीपति वर्ग मजदूर लोरा खिलाफ ज्यादा प्रतिक्रियावादी हिस्सांग ना मदद तालकनदु। क्रॉमवेल ना काल ते वेने उचुक इद्रम ता पोल्लॉंग ताकतांग। फ्रांस ते इत्तेके 1848 एवनल बार-बार इद्रमे आत्ता।

जून 1848 ते, पेरिस ता मजदूर लोर तम्मा पूना अधिकार कुना रक्षा कियाना कोशिश कित्तोर। मति फरवरी क्रांति लोप्पा स्थापना आत्ता पूना पूंजीवादी सरकार ओरकिन हारे कीसिता। मति मार्क्स पेरिस ता मजदूर वर्ग वायना क्रांति लोप्पा अदु पूंजीपतिरा पेरके-पेरके आयवा खुद नेतृत्व कियाना अचोन विकसित आत्ता इंजी वेहतोर। 1871 ते इदे पोल्लो निज्जमे हूडला दोरकता, अस्के पेरिस ता मजदूर लोर कम्यून स्थापित कियाला नेतृत्व कित्ता ओसो दस हसांग एवनल पेरिस पोरो अधिकार तास्ता। इतिहास लोप्पा पहली बेरा मजदूर वर्ग क्रांतिकारी संघर्ष ता नेतृत्व कित्ता मति ताना लोप्पा मजदूर वर्ग वर्गए लडेमायवा मत्ता। ओरू बडे जमींदार ओसो पूंजीपतिरा सरकार खिलाफ तेदतोर अनि फ्रांस किन युद्ध लोप्पा मुडंडी कित्तोर। पेरिस ता लोकुर हार ओसो करवु तल कुद समृद्ध कियाला कोशिश कित्तोर। बडे जमींदार ओसो पूंजीपतिरा खिलाफ लडाई लोप्पा संगे नितसी मत्तोर, सुडला व्यापारी लोर, वीरकिन कर्ज ओसो किराया पोरो रोक लगे कियाला काजे सरकार मानेमायो आथार इंदाना खतरा मंता। सब्बे वर्ग कुना देशभक्त लोर, वीरू युद्ध लोप्पा जर्मनी ता जीत ओसो सरकार मानेमाता शर्तकुना विरोध ते लडेमांतोर। प्रजातंत्र लोप्पा विश्वास तासना पूंजीपतिर वेने मजदूर लोरा संगे मत्तोर, वीरू सरकार ओसो उंदी बेरा सम्राट ना बोजा ओरा पोरो वाटियर इंजी वेरींसि मत्तोर। वीर सब्बेतोर मजदूर लोरा समर्थन कियनोर। तीना लोप्पा पेरिस ता मजदूर लोरा उंदी मुख्य कमजोरी, किसान लोर किन तम्मा संगे तत्तना बद गंभीर कोशिश कित्ताद हिल्ले।

मति मुख्य पोल्लो इगा वेने मंता। इत्तेके वर्तमान शासक वर्ग किन पलटे कियाना कोशिश कियाना हर वास्तविक क्रांति केवल ताकत पोरो अधिकार कियाना वर्ग ता क्रांति आयवा वर्तमान शासक वर्ग ता दबाव ते मंदाना सब्बे लोकुरा क्रांति आंदू। क्रांति ता विकास उंदी अवस्था ते, पूंजीवादीर अदिना नेतृत्व कींतोर ओसो सामंती बादशाह ओसो भूस्वामिरा खिलाफ लडेमांतोर। मति मजदूर वर्ग ता विकास आंता अस्के अदु क्रांति लोप्पा शामिल आयना सब्बे हिस्सांग ना नेतृत्व कियाल तैयार मंदिता। दूसरा माटा ते, हर क्रांति लोप्पा जनता ना विशाल हिस्सा मुख्य दुश्मन खिलाफ मोर्चा बने कींता इंजी इतिहास वेहिंता। तीना लोप्पा पूना पोल्लो बेहरा-बेहरा जमींदार ओसो पूंजीपतिरा खिलाफ आयना क्रांति ता संयुक्त मोर्चा ता नेतृत्व मजदूर वर्ग किसोर मंदिता।

उत्पादन ता पूना व्यवस्था चालू आयना इंजी क्रांति उंदी पूना वर्ग कैदे सत्ता सौंपे किंता। उत्पादन लोप्पा आपसी विरोधी हितकुना करण तेने वर्ग कुना नडमा लगातार संघर्ष ताकसोर मंदिता। औद्योगिक पूंजीवाद ता शुरूआत ता चरण लोप्पा संघर्ष बिखरेमासी मत्तांग, बदे विशेष कारखानांग लोप्पा दोरकना मजदूरी ओसो अगाटा दूसरा परिस्थितिंग किन पोयसी आंता। “मति उद्योग-धंधा ना विकास संगे-संगे, मजदूर वर्ग ते केवल संख्याए आयवा बेहरा समूह ते केंद्रित आत्ता अदिना ताकत बेरसिंता ओसो अदु तन्ना ताकत ज्यादा अनुभव दोरकी कींता।” (मार्क्स, कम्युनिस्ट घोषणापत्र, 1848)। मजदूर तम्मा यूनिशन बने किर्सीतोर, अवु राष्ट्रीय स्तर ते संघर्ष कियाना अधिकार संगे सम्पन्न आसी विशाल संगठन कुना रूप धारण कींतांग। अवु सहयोगी समितिंग बने कींतांग अनि अविना संगे अस्सनोरा रूप ते तम्मा हित कुना रक्षा कींतांग। ओसो ज्यादा उच्च अवस्था ते अवु उंदी ता रूप ते अविना हितकुना प्रतिनिधित्व कियाना ओसो अविना काजे लडेमायना तम्मा राजनीतिक पार्टी बने कींतांग।

इद लड़ाई बद्रम ताकी कियमूडांता?

मार्क्स ना अनुसार मजदूर वर्ग ता पार्टी ता उद्देश्य क्रांति काजे इत्तेके पूंजीपतिरा शासक वर्ग किन पलटे कियाना तैयारा कीयाना ओसो क्रांति ता संगठन कियाना, उत्पादन ता उंदी पूना व्यवस्था इत्तेके समाजवाद ता रचना कियाना मंदिता।

क्रांति ता तैयारी कियाना इत्तेके सब्बे रकम ता मजदूर संगठनकुन विकसित आयला मदद हियाना, विशेष रूप ते मजदूर यूनिशन कुना मदद कियाना बारांकु इत्तेके ओरा कारण ते ने मजदूर वर्ग ता ताकत बेरसिंता, ओरू “अद ताकत ता ज्यादा अनुभव कींतोरा।” तैयारी ता काम ते, तम्मा फौरी हितकु इत्तेके मजदूरी बेरसी कियाना, काम ता बेसता शर्तकु दोरकी कियाना लेक्काटविना काजे लडेमासोरे मत्ता मजदूर लोरा सब्बे हिस्सांग ना मदद कियाना काम वेने शामिल मंता। इव संघर्ष कुना संगे मजदूर वर्ग बचोनो सुविधांग दोरकी कींतांग, मति अविन स्थायी समझेमाया परवोमा। “अविन संघर्ष कुना वास्तविक फायदा मजदूर लोरा लगातार ओसो व्यापाक बने मासी मत्ता एकता लोप्पा मंदिता। अव संघर्ष कुना फौरी सफलतांग लोप्पा हिल्ले।” इव संघर्ष कुना संगे मजदूर लोरा लोप्पा ओरा तम्मा वर्ग मंता, तन्ना हितकु मंतांग, ओसो पूंजीपति वर्ग ता

48 मार्क्सवाद बातल आंदु?

हितकुना खिलाफ मंतांग इंदाना चेतना बेरसिंता। मजदूर वर्ग ता राजनीतिक पार्टी इद प्रक्रिया लोप्पा सहायता कींता। अदु मजदूर लोरकिन बस्के एवनल पूंजीवादी उत्पादन मंदिंता, अस्के एवनल आर्थिक संकटन ओसो युद्ध मजदूर लोरा पोरो लगातार मुशिकल वासोरे मंदियार अदिन काजे अस्के एवनल वर्ग संघर्ष वेने ताकसोरे मंदियार इंजी समझे कींता। ओसो इव मुशिकलकु ओसो इद संघर्ष किन उत्पादन व्यवस्था किन बदले कीसिए खत्म क्रिया परमूडांता, इत्तेके जबरदस्ती पूंजीपति वर्ग ता तख्ता पलट कियाना जरूरी मंता।

पाइना कालम ता इतिहास तिंची आम निष्कर्ष इदे पेसिंता। इदिन विडचसी मार्क्स राज्य ता अध्ययन वेने कितोर तीना लोप्पा वेने इवे पोल्लोंग साबित आंतांग।

राज्य इत्तेके लोकर बस्के-बस्के आमसभा लेवेके पार्लमेंट किन वेहितोर। मति राज्यसत्ता ता ऐतिहासिक विकास ता संबंध बदे प्रतिनिधिनि संस्थांग संगे हिल्ले इंजी मार्क्स वेहतोर। इदिना उल्टा, राज्य उंदी शासक वर्ग तन्ना इच्छा किन जबरदस्ती लोकरा पोरो लागू कियाना चीज आंदू। आदिम समाज लोप्पा राज्यसत्ता हिल्ला मत्ता। मति मानव समाज लोप्पा वर्ग वातास्के वर्ग कुना हित ते टक्कर आत्ता, अदिना कारण ते बद्दु वर्ग किन ज्यादा अधिकार दोरकता अदिना काजे बिना सशस्त्र शक्ति लेवा तन्ना विशेषाधिकार कुना रक्षा कियाना असंभव आत्ता। तन्ना हित कुना रक्षा कियाला काजे, इदु सशस्त्र शक्ति अदु वर्ग ता नियंत्रण ते मंदाना जरूरी मत्ता। एंगेल्स वेहितोर - “इद्रमे सार्वजनिक शक्ति हर राज्य लोप्पा मंदिंता। ताना लोप्पा केवल हथियारबंद मानेये आयवा रक-रकम ता साजो-सामान, जेलखाना ओसो दमन कियाना बाकी संस्थांग वेने शामिल मंतांग।” (लेनिन ना राज्यसत्ता ओसो क्रांति लोप्पा मत्ता, अध्याय 1)। इद सार्वजनिक शक्ति ता उद्देश्य हमेशाए वर्तमान व्यवस्था किन बचे कीसि तासना मंता। इत्तेके वर्तमान वर्ग-भेद ओसो वर्ग-अधिकार किन निल्पी कीसि तासना। मति पोरो-पोरो हमेशाए “निष्पक्ष” शक्ति लेक्का तोहना कोशिश कींता। इदिना जागा पोरो मंता ओसो इदिना उद्देश्य केवल “कानून ओसो व्यवस्था ता रक्षा कियाना मंता।” मति कानून ओसो व्यवस्था किन निल्पी कीसि तासना इत्तेके असल ते वर्तमान व्यवस्था किन निल्पी कीसि तासना आंता। समाज किन बदले कियाना उचुन वेने कोशिश मत्तेके इदु शक्ति तुरंत अदिना पोरोए अरिंता। तन्ना

रोज ता काम लोप्पा “राजद्रोही” लोकर किन गिरफ्तार कियानास्के लेवेके “राजद्रोही” साहित्य किन रोमी कियानास्के, सरकारी मशीन पोरो-पोरो शांतिपूर्ण दिस्ना तरीकांग लागू कींता। मति आंदोलन फैलेमासी वेल्ले तेज आत्तास्के पुलिस ओसो जरूरत आतेके फौज वेने खुल्लमखुल्ला ताकता ता इस्तेमाल कींता। शासक वर्ग ता हितकुना लोप्पा काम कियाना ताकत इस्तेमाल कियाना मशीन असल इत्तेके राजसत्ता ता मुख्य ओसो सबसे जरूरी विशेषता आंदू।

पार्लमेंट लेवेके देश ता बदे दूसरा प्रतिनिधिन संस्था, सरकारी मशीन पोरो वेने नियंत्रण कींता या? बस्के एवनल देश ता प्रतिनिधि संस्था केवल शासक वर्ग ता प्रतिनिधित्व कींता, अस्के एवनल अदिना सरकारी मशीन पोरो वेने नियंत्रण हूडला दोरकिंता। मति पार्लमेंट लोप्पा लेवेके बदे दूसरा प्रतिनिधि संस्था लोप्पा शासक वर्ग ता पूरा-पूरा प्रतिनिधित्व मनो आंता। अदु शासक वर्ग किन देब्बा दोरकना लेक्कटा काम कियाला कोशिश कींता, अद्रमासी सरकारी मशीन निज्जमे अदिना कब्जा ते हिल्लेंग इंजी जल्दिए स्पष्ट आंता। प्रतिनिधि संस्थांग शासक वर्ग तुकू अलग बदे वर्ग ता हित ते काम कियाना कोशिश कित्ता उदाहरणकु इतिहास लोप्पा बचोनों मंतांग। इद्रम ता सब्बे प्रतिनिधि संस्थांग किन जरूरत आत्तास्के हथियार कुना ताकत ते तोड़फोड़ कित्ताद मंता। ब्रिटेन लोप्पा क्रॉमवेल ना कालम ते आत्ता लेक्का बेगानाई पूना पुडुना वर्ग पाड़ना व्यवस्था पोरो जीत हासिल कित्ता, अगा सिर्फ पार्लमेंट लोप्पा वोट संगेने आयवा पूना वर्ग राज्य ता खिलाफ पाड़ना शासक वर्ग ता सशस्त्र शक्ति ता खिलाफ पूना सशस्त्र शक्ति ता संगठन कित्ता, अस्केने अदिन किन सफलता दोरकता। प्रतिनिधि संस्था लोप्पा बाताल आतेकाई, उत्पादन ता व्यवस्था पोरो मालिकाना हक तासना वर्ग हमेशाए सरकारी मशीन तना नियंत्रण तासिस मंदिता। समाज ता व्यवस्था किन बदले कियाना कोशिश कियाना वर्ग ता खिलाफ पाड़ना सरकारी मशीन तन्ना पूरा ताकत वाटसिंता। अदिन काजे असली ताकत ते बदली कियाला काजे पाड़ना सरकारी मशीन ता खिलाफ ताकत ता इस्तेमाल कियाना जरूरी मंदिता।

मार्क्स ना पोरो वेहता निष्कर्ष किन इंजेटा बचोना ऐतिहासिक घटनांग सही साबित कीसितांग। फासीवाद ता पूरा आधार, सब्बे प्रतिनिधि संस्थांग सशस्त्र बल संगे नष्ट कित्ता पोरो मंता। इद पोल्लो तल मूल विश्लेषण इत्तेके फासीवादी

संगठन राज्य ता शक्ति पाड़ना रूप आयवा उंदी पूना रूप मत्ता इंदाना विश्लेषण लोप्पा बदे अंतर हिल्लो। 1936 ते कानूनी रूप ते चुनेकित्ता स्पेन ता पार्लमेंटरी सरकार ता खिलाफ, फ्रांको ता विद्रोह फौज कुना पोरो प्रतिनिधि संस्थांग ना बचोन कम नियंत्रण मंदिता इंजी वेहिंता।

मति पोरोटल हूडतेके ओसो “कानून ता अनुसार” बद सरकारी मशीन ओसो विशेष रूप ते सशस्त्र बल पोरो पार्लमेंट ता नियंत्रण समझेमायमूडांतायो ताना पोरो शासक वर्ग तन्ना नियंत्र अलग से बद्रम तासिंता? इद सवाल ता जवाब खुद सरकारी मशीन ता स्वरूप ते दोरकिंता। हर देश लोप्पा फौज, पुलिस, अदालतकु ओसो साधारण रूप ते सब्बे सरकारी विभाग कुना बेहरा-बेहरा पद कुने खुद शासक वर्ग ता सदस्य मंदितोर लेवेके अदिना विश्वासनीय नौकर लोर मंदितोर। सरकारी पद कुना लोप्पा लोकर किन चुने कियाना ओसो विकास कियाना व्यवस्थाए बोरे वेने तानगा एव्वा परवा लेक्का मंता। प्रतिनिधि संस्था लोप्पा जनवाद ता असर बचोन बेरस्तेकाई, सरकारी मशीनकु एवनल नेंगाए परवो आंता। बस्के एवनल उचुक गंभीर समस्थांग पैदा आयोंग, अस्के एवनल इदु जनवादी पार्लमेंट तिंची सरकारी मशीन अलग मंता इंजी साबित आयो। मति मना मुन्ने ब्रिटेन ता 1914 ता कुराघ विद्रोह ता उदाहरण वेने मंता। अदु कालम ते उत्तरी आयरलैंड किन स्वराज्य हियाना कानून ता विरुद्ध प्रतिक्रियावादी गुट विद्रोह कियाना धमकी हीसोर मत्ता। अस्के ओरकिन रोमी कियाला काजे उत्तरी आयरलैंड लोप्पा फौज तैनात कीतेके अफसर लोर सरकारी हुक्म किन मानेमायला इनकार कित्तोर।

अदिन काजे सरकारी मशीन सिर्फ तत्कालिन व्यवस्था किन निल्पी कीसि तासना कोशिश कींता ओसो बस्केने अदिना खिलाफ कै तेहो आंता, अस्के बदे वेने प्रतिनिधि संस्था आई, उत्पादन ता पूना उच्च व्यवस्था बगिल दायना काम सरकारी मशीन कुन हारे कियवा लेवा आया परवो इंजी साबित आंता।

इद्रम आतेकाई मार्क्स हमेशाए जनवादी संस्थांग ना समर्थन कित्तोर। ओना दृष्टि ते इव संस्थांग इतिहास लोप्पा वर्ग संघर्ष ता बचोनो युद्धभूमिंग ने उंदी युद्धभूमि ता काम कीतांग। चार्ल्स प्रथम ना कालम ते पार्लमेंट पुटसोरे मत्ता पूंजीवादी वर्ग ता प्रचार-मंत ता काम कित्ता। पूंजीपति वर्ग अदिन संगे पूना सुविधांग दोरकी कीता अनि संगेने अद मंच तिंची लोकर किन सामंती बादशाह

संगे लड़ेमायाला केयता। इद्रमे नेटा पार्लमेंट कुना संगे वेने पूना सुविधांग दोरकी कियामूडांता, संगेने सत्ता काजे निर्णायक संघर्ष कियाला काजे मजदूर लोर किन जागृत किया परमूडांता। अदिनके संसदीय लोकतंत्र काजे संघर्ष उदेश्यपूर्ण मन्नो आंता, अदु खुद पूरा संघर्ष उंदी हिस्सा मत्तेकाई समाज ता पूना व्यवस्था तत्ताला परवो। इद पोल्लो महत्वपूर्ण मंता - (पार्लमेंटरी संस्थांग लोकर किन विरोध प्रदर्शन कियाना मौका हींतांग, अदिन काजे फासीवाद हर जागा इविन किन नष्ट किसिंता।

अदिन काजे, हत्ता शताब्दी ते यूरोप लोप्पा रक-रकम ता निरंकुश सरकारकु मत्तांग, अविना खिलाफ पार्लमेंटरी जनतंत्र निल्पी कायना लडाई किन ओसो बद देश लोप्पा निरंकुश सरकारकु पलटे कित्ताद मंता, अगा पूना जनवादी अधिकार दोरकी कियाना संघर्ष किन मार्क्स हमेशाए वेल्ले महत्व हीतोर। संगेने ओना विचार, राज्य बस्के एवनल निरंकुश सामंती लेवेके पूंजीपति वर्ग ता (पोरो वेहता लेक्का) कब्जा ते मंता, अस्के एवनल जनतंत्र सुरक्षित हिल्ले ओसो कारगर वेने हिल्ले इंजी मत्ता। मजदूर वर्ग पूंजीवादी सरकारी मशीन किन हारे कियाना ओसो नष्ट कियाना लोप्पा बस्के सफल आयर अस्केने खुद किन शासक वर्ग ता पद पोरो उदा परिंता ओसो अस्केने “अदु जनतंत्र ता लडाई ते जीडा परिंता।” दूसरा माटा ते, जनता ना विचार ते अदु हथियारबंद बाधा ओसो पूंजीवादी सरकारी मशीन कुना नष्ट कित्तास्केने पूरा अमल आयारा।

मति पाडना शासक वर्ग ता सरकारी मशीन किन हारे कियाना ओसो नष्ट कियानाए आयो मजदूर वर्ग काजे तन्ना सरकारी मशीन बने कियाना, सत्ता ता तन्ना केंद्रित यंत्र बने कियाना जरूरी मंता। पूंजीपति वर्ग ता हार किन पूरा कियाला काजे ओसो अंदरूनी अनि बाहरी हमलांग निगडल पूना व्यवस्थांग ना रक्षा कियाला काजे आवश्यक मंता।

इदे आयवाना पूंजीवादी समाज लोप्पा बद रकम ता सरकारकु दोरकिंतांग, अविनकु बचोनो खास पोल्लोंग अलग मत्ता उंदी सरकार बने कियाना जरूरी मंता। बारांकु इत्तेके मजदूर वर्ग ता मूल उदेश्याए अलग मंता। मार्क्स किन इदु पोल्लो स्पष्ट रूप ते 1871 ता पेरिस कम्यून ता अनुभव पेरके समझेमाता। पेरिस कम्यून ता मुख्य विशेषता बाताल मत्ता इत्तेके, अदु “उंदी पार्लमेंटरी संस्था आयवा काम कियाना वर्ग मत्ता, अदु कानून वेने बने कींता ओसो खुद अदिन

लागू वेने कींता।” चुनेमायना सदस्य लोरकिन अदु बस्के वेने बदले किया परनादु। “पेरिस कम्यून ता सदस्य लोरगडल पोयसी दोड़ एवनल सब्बे सार्वजनिक कर्मचारि किन साधारण मजदूर लोरा वेतन ते काम किया लागनदु।” मजिस्ट्रेट ओसो जज चुनेमातेके ओसो चुने कियानोर बस्के वेने ओरकिन बदले किया परानोर। पाड़ना स्थायी सेना ता जागा ते उंदी “राष्ट्रीय दल बने कीसि मत्ता, ताना लोप्पा ज्यादातर मेहनतकश लोकर शामिल मत्तोर।” इद विशेषता ता ओसो कम्यून ता दूसरा गुण कुना मूल तत्व शासन यंत्र ओसो सत्ता, दमन ता यंत्र मजदूर वर्ग ता नियंत्रण ते वासी मत्तादु मत्ता। मुन्ने ओरा पोरो पूंजीपति वर्ग ता नियंत्रण मंदानदु। राज्यसत्ता ता पूना स्वरूप बने कियाना “जनतंत्र ता लड़ाई किन जीड़ना” मत्ता। बारांकु इत्तेके अदिना संगे आम जनता किन तन्ना पिस्वल ता नियंत्रण खुद कियाना वेल्ले अधिकारकु दोरकसी मत्तांग।

इद्रम मत्तेकाई, एंगेल्स पेरिस कम्यून ता बारे ते इद्रम रासिस मत्तोर:- “अदु मजदूर वर्ग ता अधिनायकत्व मत्ता।” उंदी बगिल कम्यून लोप्पा पूंजीवादी पार्लिमेंटरी जनतंत्र ता तुलना ते ज्यादा जनवादी नियंत्रण मत्त इंजी इंतोर। दूसरा बगिल अदु मजदूर वर्ग ता अधिनायकत्व मत्ता इंजी इंतोर। इव रेंडासी पोल्लोंग लोप्पा बदे विरोध हिल्ले या? हिल्ले, इव रेंडासी पोल्लोंग उंदे तथ्य ता रेंडु पहलुंग किन प्रकट कींतांग। ज्यादातर जनता ना विचार किन लागू कियाला काजे “उंदी पूना ओसो निज्जम जनवादी राज्य” ता स्थापना कित्ताद मत्ता। मति इदु राज्य सिर्फ अधिनायकत्व ता रूप तेने इत्तेके बल प्रयोग कीसिए जनता ना विचार किन लागू किया परमूड़ांता। बारांकु इत्तेके मुन्ने तन्ना अधिनायकत्व निल्पी कीसि मत्ता वर्ग अल्पसंख्यक वर्ग मत्ता ओसो इंजे आर्थिक तोड़-फोड़ तल पोयसी प्रतिरोध एवनल हर तरीका ते जनता ना विचार ता विरोध कीसोरे मत्ता। अदिना विरुद्ध बल प्रयोग कियवा लेवा जनता विचार लागू आया परवो आसी मनवड़।

1871 ते पेरिस कम्यून ता अनुभव तिंचि मार्क्स-एंगेल्स तेंडता निष्कर्षकु वेने मजदूर क्रांति पेरकेटा अनुभवकुगडल सही साबित आतांग। रूस लोप्पा 1905 ता क्रांति कालम ते जार ना खिलाफ लड़ाई कियाना ओसो संगठित कियाला काजे मजदूर संगठन कुना प्रतिनिधिर ‘सोवियतकु’ बनेकित्तोर। 1917 ता मार्च क्रांति ते वेने क्रांति ता परिस्थिति तैयार आत्ता इत्तेकेने ओसो उंदी बेरा

मुन्ने लेक्काने 'सोवियतकु' (रूसी भाषा ते पंचायत कुन सोवियतकु इंतोर) बने कियाना शुरू कितोर। प्रतिनिधिरा इव संगठन कुना लोप्पा साधारण रूप ते कारखानांग ना लोकर किन पोयतोर (पेरके संघर्ष तेज आत्तास्के फौजी सिपाहिर ओसो किसान लोरा प्रतिनिधि वेने ताना लोप्पा शामिल आसी मत्तोर)। लेनिन पेरिस कम्यून पेरके मजदूर-वर्ग वेल्ले विकसित आत्ता ओसो इंजे सोवियतकुना रूप ते मजदूर वर्ग ता काम ताकी कियाना पूना राज्य ता स्वरूप पेश कीता इंदाना पोल्लो किन चीनेमातोर। वीर प्रतिनिधिर मजदूर लोरा लोप्पाटल वासी मत्तोर ओसो ओरकिन चुने कियानोर ओरकिन बस्केने वेने वापिस केया परितोर। इत्तेके ओरा फैसला ते पूंजीपतिरा बदे प्रभाव अर्रा परवो, अदिन काजे ओरू निज्जमे मजदूर वर्ग ता हितकुना रक्षा कियाना परितोर ओसो मुन्ने ओया परितोर। संगेने पाड़ना शासक वर्ग पूना सोवियत सरकार किन तेहकसी वाटला कोशिश किया मंता इंदाना पोल्लो वेने निज्जमे। अदिना इव कोशिश कुन बल प्रयोग कीसि मजदूर वर्ग ता हितकुन मुन्ने ओयना काम उंदी अधिनायकत्वपूर्ण राज्यए पूरा किया परितोर।

मजदूर वर्ग ता अधिकानायकत्व बारांकु निज्जमे सही जनतंत्र राज्य मंदिता, अदु पोल्लो किन मार्क्स 1848 ते छपेमाता कम्युनिस्ट घोषणापत्र लोप्पा इगा रास्ता लेक्का समझे कीसि मत्तोर। "इतिहास लोप्पा इदिनकु मुन्ने बचोन आंदोलनकु आतांगो अवु सब्बे अल्पसंख्यक आंदोलनकु मत्तांग, मुद्रामेंड लोकरा हितकुना काजे ताकना आंदोलनकु मत्तांग। मजदूर आंदोलन विशाल बहुसंख्या ता ओसो बहुसंख्यक लोरा हित ते ताकना स्वतंत्र ओसो सचेतन आंदोलन मत्ता।"

पोरो वेहता पोल्लो तल मजदूर क्रांति ता जीत पेरके वर्ग-संघर्ष एकदम समाप्त आयार इंजी मार्क्स ना विचार हिल्ला मत्ता इंजी स्पष्ट आंता। इदिना उल्टा ओरू मजदूर-क्रांति सिर्फ सरकारी मशीन मजदूर वर्ग ता खिलाफ आयवा पहली बेरा अदिना पक्ष ते वायना बेहरा बदलाव ते बारेते वेहिंता। जनवरी 1918 ते सोवियत कुना कांग्रेस मुन्ने लेने उंदी घटना ता बारे ते वेहतोर, अदु मावा पोल्लो ता उदाहरण मंता। उंदी बेरा लेनिन रेलगाड़ी ते हंजोर मत्तोर। डब्बा ते उचुन पोल्लोग ताकसोर मत्तांग। लेनिन किन अवु समझेमासोर हिल्ला मत्तांग। अस्के ने वरोर मानाय ओना बगिल मलतोर अनि इत्तोर, "निम्मा केंजतिना, इद डोकरी

बद्रम तांग पोल्लोंग किया मंता? इंदा मंता 'इंजे बंदुकवाले मानेय नगडल वेरियाना जरूरत हिल्लो। उंदी दिय्या नन्ना गेड़ा ते हत्तान अस्के नाकिन वरोर बंदूक वाले मानेय कलियतोर, ओरू नावा जमा कित्ता वर्किंग ऊंदवा लेवा ओसो ज्यादा वर्किंग जमा कियाला मदद कित्तोर' इंजी इंता।" ताकत ता यंत्र इंजे मजदूर लोरा खिलाफ हिलवा ओरा मदद काजे मंता। इंजे अदु सिर्फ मजदूर लोरकिन मुन्ने दायाला रोमी कियाना कोशिश कियाना लोकरा खिलाफ मत्ता।

मजदूर वर्ग सत्ता पोरो कब्जा कित्ता पेरेके वेने, इद्रम ता लोकर पिंसितोरो। पाइना शासक वर्ग, दूसरा देश कुना शासक वर्ग ता मदद ते ज्यादा से ज्यादा फौज जमा कीसि मजदूर वर्ग ता राज्य खिलाफ खुल्लमखुल्ला लड़ाई शुरू कींता। 1871 ते पेरिस कम्यून ता हार वेने इद्रमे आत्ता। जर्मनी लोर हजारो फ्रांसीसी युद्धबिदिर किन मुक्त कीसि ओरकिन पेरिस ता बाहर मत्ता फ्रांसीसी प्रतिक्रियावादीरा मदद काजे वासाई लोहतोरा। प्रतिक्रियावादी फौज पेरिस कम्यून किन ऊंदता अनि ओसो उंदी बेरा कम्यून ता समर्थक लोरकिन भयानक रूप ते हौकता। 1918 ओसो 1920 नडमा सोवियत सरकार किन केवल जार समर्थक सेनांग संगेने आयवा ब्रिटेन, फ्रांस, अमेरिका लेक्काटा विदेशी ताकत कुना आक्रमणकारी सेनांग संगे वेने लड़ेमाया लागता। अदिन काजे इतिहास मार्क्स ना इद मजदूर वर्ग सत्ता पोरो कब्जा कित्ता पेरेके वेने वेल्ले दिय्यांग एवनल राज्य ता संगठन किन निल्पी कीसि तासा लागियार, अस्केने अदु अदिना रक्षा किया परियर ओसो समाजवाद पोरो आधार आसी उत्पादन-व्यवस्था ता पुनर्गठन कियाना कालम ते नियंत्रण तन्ना कैदे तासा परिंता इंदाना निष्कर्ष ता समर्थन कींता।

1871 ता पेरिस कम्यून ओसो 1917 ते स्थापना आत्ता रूस सोवियत राज्य, मजदूर वर्ग ता राज्य ता मुन्नेटा स्वरूप मत्ता। दूसरा महायुद्ध पेरेके मजदूर वर्ग ता ताकत ओसो शक्तिशाली सोवियत राज्य ता अस्तित्व ता कारण ते मजदूर राज्य ता उंदी पूना स्वरूप कायम आया परता। अदु स्वरूप-जनवादी जनतंत्र ता मत्ता। इदिना बारे ते आखरी ता अध्याय लोप्पा वेहत्ताद मंता।

समाजवाद ओसो अदिना उच्च अवस्था-कम्युनिज्म ता बारे मार्क्स बाताल वेहतोरो मुन्ने वायना अध्याय लोप्पा समझे कित्ताद मंता। मति वर्ग संघर्ष ओसो राज्य ता विषय किन मारी कियाना मुन्ने मार्क्सवादी दृष्टिकोण तिंची वर्ग

संघर्ष ता प्रक्रिया ता आखरी परिणाम बाताल आयार इंदानदु वेहतेके बेस आयार। वर्ग संघर्ष ओसो शासक वर्ग ता हितकुना रक्षा कियाला काजे उंदी राजसत्ता ता स्थापना लेक्काटवु मानव समाज लोप्पा वर्ग वातांकु वातांग, इविना हितकु उत्पादन संगे टकरेमांतांगा। वर्ग संघर्ष, राजसत्ता इतिहास लोप्पा बस्के एवनल मानव समाज लोप्पा वर्ग मंदिता अस्के एवनले दिसिंता। मति मजदूर वर्ग सत्ता पोरो कब्जा कींता - वर्ग-भेद खत्म कियाला काजे बदे वेने वर्ग दूसरा वर्ग ता मेहनत पोरो पिस्वल पिस्सना वर्ग मन्नो आयोर, अद्रम ता उत्पादन-व्यवस्था बने कीयार। दूसरा माटा ते इदिन वर्गविहीन समाज बने कियाला काजे सत्ता पोरो अधिकार कींता। तीना लोप्पा सब्बेतोर कलियसी-मिलियसी समाज ता सेवा कींतोरा। इद प्रक्रिया पूरा दुनिया लोप्पा पूरा आयार, अस्केने वर्ग-विरोध मन्नो आयार बारांकु इत्तेके अस्के अलग-लग हित मंदाना वर्ग मन्नोंग आयनुंगा। अदिन काजे अद कालम ते उंदी रकम ता हितकुनगडल रक्षा कियाला काजे बल प्रयोग ता यंत्र ता जरूरत वेने मन्नो आयार। आस्के राज्य “कावसी मंजी खत्म आया।” उंदी पेरके दूसरा इलाका लोप्पा अदिना जरूरत खत्म आसोर दायार अनि उंदी केंद्रीय मशीन ता रूप ते बाताल पिसिंतायो अदु सिर्फ उत्पादन ओसो वितरण ता संगठन कियाला काजेए मंदियर। एंगेल्स ना माटा ते अस्के “व्यक्ति पोरो शासन आयो आयार अदिना जागा ते चीजकु ना व्यवस्था ओसो उत्पादन क्रिया ता संचालन वायार।”

अध्याय छह समाजवादी समाज

मार्क्स ना रचनांग लोप्पा बेगाने पूंजीवाद पेरके वायना सामाजिक व्यवस्था ता विस्तृत विवरण दोरको। ओनकिनकु मुन्नेटा बचोनो लेखक लोर वायना समाज ता काल्पनिक चित्र पंडसी मत्तोर। तन्ना-तन्ना कालम ता समाज ता वेल्ले स्पष्ट आत्ता लबड़ ता पोल्लोंग (बुराई) किन विड़चसी वीरू वायना समाज ता उंदी कच्चा ड्राफ्ट तैयार कित्तोर। मार्क्स इद्रम ता बदे काल्पनिक चित्र पंडोर। मति सामाजिक विकास ता साधारण नियम कुना पोरो आधार आसी मार्क्स पूना समाज ता विशेषतांग किन ठोस रूप वेहा परना ओसो इद समाज बद्रम विकसित आयार इंदानदिना रूपरेखा तैयार किया परतोर।

मार्क्स स्पष्ट रूप ते पूना समाज ता संगठन एकदम पूना जमीन पोरो आयो आयार इंजी वेहतोर। अदिन काजे इद्रम “खुद तन्ना नींव ते तेदसी” बदे समाज ता बारे ते आल्सना अंगडम आयार। ओसो बदे साधन हिल्वा ज्यादा से ज्यादा बेसता पोल्लोंग आस्लिनी मंजी अविन काल्पसी समाजवादी समाज ता खिचड़ी तैयार कीतेके अदु तन्ना-तन्नाए तैयार आयार इंजी आल्सना अंगडम आंता। इद्रम कियानादु अवैज्ञानिक दृष्टिकोण लागू कियाना आंता, अदिना संबंध वास्तविकता संगे बिल्कुले मन्नो आंता।

इदिना उल्टा, उंदी निज्जम ता समाजवादी समाज वेने, मुन्नेटा सब्बे सामाजिक व्यवस्थांग लेक्काने तन्ना मुन्नेटा व्यवस्था पोरो आधार आसी तेदियर। इतेके अदु “इंजे पूंजीवादी समाज ता पोट्टो तले पेसोर मत्ता समाज मंदिता, अदिन काजे अदिना पोरो आर्थिक, नैतिक ओसो बौद्धिक रूप ते पाड़ना समाज ता इतेके बदिना पोट्टा तल पेस्तायो अदिनाए चिन्हा मंदियर।”

असल इत्तेके पूंजीवादी समाज लोप्पाटा वास्तविक विकासे समाजवाद काजे हरीं पंडिता ओसो बदलाव बद्रम आयार इंजी वेहिंता। इद विकास आयनास्के उत्पादन वेल्ले सामाजिक आसोर दांता, इत्तेके हर चीज किन बने क्रियाला काजे बेहरा संख्या ते लोकरु शामिल आयना शुरू आंता। कारखानांग बेरसिंतांग, कच्चा माल किन तैयार माल ते बदले क्रियाना उत्पादन क्रिया, वेल्ले बेहरा संख्या ते लोकरु किन वरोनकु-वरोना संगे जोड़े किसिंता। ज्यादा से ज्यादा लोकरु वरोर-दूसरोना पोरो आधार आसी पिस्सना शुरू आंता। पाड़ना स्थानीय सामंती संबंध किन पूंजीवादी वेल्ले दिव्या मुन्ने ने खत्म कीसि मत्ता, मति तन्ना विकास आयनास्के मुन्नेटले बचोनो ज्यादा विस्तृत ओसो पूना संबंध बने कीसि मंता। इव संबंधकु वेल्ले विस्तृत मंतांग, अद्रमासी इंजे हर मानेय लगभग पूरा समाज ता किस्मत पोरो आधार आसी मंदिंतोर।

पूंजीवाद ता इदु उंदी स्थाई रुझान आंदू, मति तीना संगे माटु समाज ता सामूहिक मेहनत ते आयना पैदावार (उत्पादन) समाज ता सम्पत्ति आयवा बोरे मानेय लेवेके दल अदिना मालिक मंदिंता। अदिन काजे समाजवादी समाज ता रचना क्रियाला काजे पहला स्टेप, समाज लोप्पा बचोन उत्पादन मत्तेकाई अदिना पोरो समाज ताए अधिकार मंदांना इंजी मंदांना। इत्तेके उत्पादन ता साधन कुना पोरो - कारखाना, खदान, मशीनकु, जहाज लेक्काटव पूंजीवाद लोप्पा वायना मुट्टामेंड लोकरु नीजि सम्पत्ति मंदिंतांग, समाजवाद लोप्पा इविना पोरो पूरा समाज ता अधिकार मंदांना।

मति पाड़ना समाज तिंची पूना समाज किन विरासत ते दोरकना बदे सम्पत्ति पोरो आधार आसी उत्पादन साधन कुना समाजीकरण आंता। सिर्फ बेहला-बेहरा कम्पनिंगे समाज ता कैदे वायना स्थिति ते मंदिंतांग। पूंजीवादी विकासे अविन किन इद स्थिति ते वायाना लेक्का तैयार कींता। इव कारखानांग लोप्पा मालिक ओसो उत्पादन-क्रिया नइमा कम्पनी हिस्सेदार लोर किन मुनाफा लेवेके सूद किन विडचसी बदे वेने संबंध मन्नो आंता। उत्पादन किन मजदूर ओसो कर्मचारीर ताकी कींतोर। कारखानांग ना मालिकना हक समाज ता कैदे दांता अस्के इदिना कारण ते ओरा काम लोप्पा बदे अंतर वायो आंता। अदिन काजे इव बेहरा-बेहरा कम्पनिंग किन तुरंत समाज तन्ना कैदे पोय्य परिंता।

सुडला कारखानांग लोप्पा विशेष रूप ते मालिक खुद उत्पादन लोप्पा महत्वपूर्ण भूमिका निभे किया मंतोर इंदानास्के स्थिति अलग मंदिता। बेहरा संख्या ते सुडला कारखानांग किन ताकी कियाना वेल्ले मुश्किल मंता। असल इत्तेके मजदूर-राज्य ता शुरूआत ते इद काम किन असंभवे समझेमायना। इद्रम ता परिस्थिति ते सुडला-सुडला कारखानांग किन इत्तेके अविन लोप्पा शहरकुना उद्योग-धंधांग ओसो सुडला खेती रेंडासी शामिल मंतांग अस्के केंद्रीय तरीका ते ताकी कियाला काजे मुन्ने वेल्ले तैयारी किया लागियारा।

इद दिशा ते बद्रम ता ठोस कदम तेहा परमूडांता? इदिना आम तरीका-मुन्ने सुडला-सुडला उत्पादक लोर कलियसी मंजी उत्पादन कियला करियाना ओसो उत्पादन ता बचोनो सुडला-सुडला इकाइंग ना जागा ते उंदी बेहरा इकाई बने कियाला काजे लोकर किन सहयोग कियला काजे प्रोत्साहित कियाना। सुडला किसान लोरा लोप्पा इदु बदलाव बद्रम तत्ताना इंदनदिना बारे ते एंगेल्स इद्रम रास्तोर:-

“मावा काम सबसे मुन्ने व्यक्तिगत उत्पादन ओसो व्यक्तिगत मालिकाना किन सहयोगी उत्पादन ओसो सहयोगी मालिकाना लोप्पा बदले कियाना। इदु काम जबरदस्ती आयवा इद उद्देश्य किन सामाजिक सहायता कीसिए कियाना।”

(लेनिन, कार्ल मार्क्स ओसो ओना सिद्धांत लोप्पा रास्तोर)

इद बदलाव “जबरन आयवा उदाहरण ता रूप ते ओसो सामाजिक सहायता कीसिए” समाजवादी समाज ता निर्माण कियाला काजे मार्क्सवादी दृष्टिकोण ता आधार जरूरी मंता। माटु पोरोटा अध्याय लोप्पा वेहता लेक्का, मार्क्स पाड़ना शासक वर्ग बदलेमासोर मंदाना परिस्थिति किन कुस्कने मानेमायवा लेवा पाड़ना व्यवस्था किन ओसो उंदी बेरा निल्पी कियाला काजे बस्के संभव आयार अस्के वर्ग-संघर्ष कियार इंजी मानेमायनोरा। अदिन काजे अदिना हमला ना मुकाबला कियाना ओसो अविन हारे कियाला काजे मजदूर-वर्ग किन उंदी शक्तिशाली राज्य-तंत्र ता जरूरत आयारा। पूना समाज बने कियाना प्रक्रिया उंदी आर्थिक ओसो सामाजिक प्रक्रिया आंदू, अदु बल-प्रयोग पोरोने आधार आसी मन्नो आंता।

अदिनके माटु पाइना शासक-वर्ग ता प्रतिरोध किन नष्ट कीसि अधिकार बने कित्ता पेरके मजदूर-वर्ग बेहरा-बेहरा कारखानंग, बेंक, रेल, उद्योग अनि व्यापार ता दूसरा “बेहरा साधान” पोरो कब्जा कीतोम मति, पूरा उत्पादन ओसो व्यापार किन तुरंत कैदे पोय्योम आंतोमा। अदिन काजे अद क्रांति ता दूसरा दिथ्याए हर मानेय समाजवाद किने मानेमायना इंजी जबरदस्ती कीवो आयरा। अदिन काजे क्रांति ता तात्कालिक परिणाम समाजवाद मन्नो आंता ओसो इद्रम आयना संभव वेने मन्नो आंता। इदिनगडल मजदूर वर्ग किन समाजवाद ता निर्माण कियाना ताकत जरूर दोरका पर्रिता। बचोनो साल पेरके समाजवाद ता निर्माण पूरा आंता ओसो पूरा उत्पादन अनि वितरण समाजवाद पोरो आधार आसी आंता।

समाजवाद ता पहली प्रधान विशेषता-उत्पादन साधन कुना पोरो निजी अधिकार आयवा पूरा समाजिक इस्तेमाल काजे मंदियारा। मति इदु मार्क्सवादी दृष्टिकोण ता आधार बदे नैतिक सिद्धांत आयोए। उत्पादन साधन कुना पोरो निजी अधिकार मत्तेके उत्पादन रोमिंता। ताना कारण ते मानेय ना पंडता पूरा उत्पादन शक्ति ता पूरा इस्तेमाल आया परवो आंता। अदिन काजे पूरा समाज कैदे मालिकाना हक सौंपे कियाना सिर्फ जमीन तैयार कियाना आंदू। दूसरा स्टेप-उत्पादन शक्तिंग ना विकास ता सचेतन, सुनियोजित तरीका ते व्यवस्था कियाना आंदू।

1917 ता रूस इत्तेके सिर्फ औद्योगिक रूप तेने पेरके अरसी मत्ता देश तेने इव विकास आयना जरूरी मत्ता इंजी समझेमायना गलत आयारा। मार्क्स, सत्ता कब्जा कित्ता पेरके “मजदूर वर्ग तन्ना राजनीतिक प्रभुत्व ता इस्तेमाल सब्बे उत्पादन शक्तिंग किन जल्दी-जल्दी बेरसी कियाला काजे कियार”, अस्के असल ते औद्योगिक रूप ते विकसित देश कुना बारे ते ने आल्ससोर मत्तोर। मार्क्स ना कालम ते उत्पादन साधन कु ब्रिटेन लोप्पा वेल्ले बेरसिस मत्तांग, मति असल इत्तेके अवु नेंडु वेने वैज्ञानिक ज्ञान किन संभव बने कियाना लोप्पा पेरके अरसी मत्तांग। अवु पूंजीवादी व्यवस्था ता कारण ते पेरके अरतांग, बारांकु इत्तेके आर्थिक संकट लगातार उत्पादन लोप्पा बाधा वाटसोर मंदिंतांग। उत्पादन ता उद्देश्य हाटुम लोप्पा वम्मला काजे माल पैदा कियाना मंदिंता, पूंजीवाद लोप्पा हाटुम वेल्ले सीमित आसी मत्ता, अदिन काजे उत्पादन शक्तिंग ना विकास वेने

सीमित आसी मंदिता। इद व्यवस्था लोप्पा एकाधिकारी पूंजीपति पूना यांत्रिक आविष्कार कुन अस्सिंतो ओसो अविना इस्तेमाल बेहरा स्तर आयाला हीवोर आंतोर। इद व्यवस्था लोप्पा उत्पादन ता बदे योजना बने किया परमूडायो। अदिन काजे अदिना बदे सुनियोजित विकास आत्ताद हिल्ले। अदिन काजेए पूंजीवाद कृषि किन अलग ओसो पेरेके अरहची तास्ता: बारांकु इत्तेके पूंजीवाद किन प्रतिद्वंद्वी समूह नडमा, औपनिवेशिक लोकुरा खिलाफ युद्ध कियाना लोप्पा खर्च कींता। इद व्यवस्था शारीरिक ओसो मानसिक श्रम किन उंदी-दूसरा तल लग कीसि तासिंता, इदिना कारण ते बेहरा स्तर ते आविष्कारकु आया परवोंग आतांग। तीना लोप्पा मंदापरवा मानव शक्ति वर्ग-संघर्ष, लोप्पा नष्ट आंता। इद व्यवस्था करोड़ों लोकुर किन बेरोजगार किसिंता। इव सब्बे कारण कुना कारण ते पूंजीवादी व्यवस्था लोप्पा उत्पादन-शक्तिंग ना पूराए विकास आया परवो आंता।

अदिन काजे मुन्नेटले बचोनो ज्यादा उत्पादन दोरकना इंजी कारखामांग, खदानकु, रेल, बिजली लोन, खेती ओसो कीकेंग (मीनकु) हौकना व्यवसाय कुना आधुनिक तरीका ते जरूर पुनर्गठन कियाना। इदिना उद्देश्य बाताल मंता? इदिना उद्देश्य जनताना पिस्वल-स्तर किन पोरो तेहना मंता।

समाजवाद ता विरोधिरा उंदी तर्क - ब्रिटेन ता पूरा सम्पत्ति पूरा आबादी लोरा बराबर-बराबर तूस्तेकाई वेने मजदूर लोरा पिस्वल-स्तर वेल्ले अंतर वायो आया इंजी वेहिंता। सबसे मुन्ने इत्तेके इद पोल्लो सही हिल्ले, इदु पोल्लो सही मत्तेकाई मार्क्स ना समाजवाद ता दृष्टिकोण ते अदिना बदे संबंघ हिल्ले। मार्क्स समाजवाद उत्पादन ता स्तर किन माटु आल्सा परवाचोन पोरो तेहियर इंजी वेहची मत्तोर। 1950 ते सोवयत संघ ता उत्पादन 1913 तुकु 15 गुना बेरस्तेके जार ना कालम ते रूस वेल्ले पेरेके अरसी मत्ता। औद्योगिक ब्रिटेन लोप्पा वेने उत्पादन लोप्पा वेल्ले बढ़ोत्तरी किया परमूडंता ओसो कियमूडायार।

उत्पादन स्तर ओसो पिस्वल-स्तर किन पोरो तेहतेके इदिना सहारा ते जनता ना बौद्धिक, सांस्कृतिक स्तर पोरो तेहा परना लेक्काटा भौतिक आधार तैयार आया। मति इदु सम्पूर्ण विकास काजे उत्पादन उंदी योजना अनुसार आयना जरूरी मंदिता। पूंजीवादी समाज लोप्पा पूना कारखानांग लेवेके बदे वस्तु उत्पादन किन ज्यादा मुनाफा कमै कियाना आशा मंदानस्केने बेरसी

क्रियामूडांता। ज्यादा मुनाफा ता आशा इत्तेके अवु चीज कुना जनता ज्यादा मांग मंदाना आंदू। इविना मांग केवल मुट्टामेंड धनी लोकुरा वेने मंदाना परिंता, लेवेके बदे विशेष कारण ते बदे चीज ता कीमत वेत्ले बेरसिस मंदा परिंता। अगा मुनाफाए मुख्य उद्देश्य मंदिता अगा उत्पादन लोप्प सिर्फ अराजकता ताए राज मंदा परिंता। इद्रम आतेके उंदी इलाका लोप्पा बराबर अति-उत्पादन आसोर मंदिंयार ओसो दूसरा इलाका लोप्पा कम।

समाजावादी समाज लोप्पा मुनाफ कमई क्रियाला काजे आयवा इस्तेमाल क्रियाला काजे उत्पादन आयार। अदिन काजे ताना लोप्पा उत्पादन ता संगठन उंदी योजना अनुसार क्रियाना। असल इत्तेके उद्योग-धंधा ना पूर्ण रूप ते समाजीकरण आयना मुन्ने वेने इद्रम क्रिया परमूडांता। मुख्य उद्योग कुना समाजीकरण आसी बाकी पोरो लगभग नियंत्रण मत्तेके उत्पादन ता योजना बनेमाया परिंता, ताना पेरके हर साल योजना किन ज्यादा से ज्यादा पूर्ण रूप ते सही बने क्रिया परमूडांता।

इद्रमे माटु मार्क्स ना दृष्टि ते समाजवाद ता इत्तेके आर्थिक क्षेत्र ते उत्पादन ता साधन कुना पोरो पूरा समाज ता मालिकाना हक स्थापित आयना, उत्पादन शक्तिंग ना स्पीड ते विकसित क्रियाना ओसो उत्पादन ता उंदी योजना अनुसार संगठित क्रियाना इंजी मत्ता। उत्पादन ता योजना ता स्वरूप मत्तेकेने समाजवादी समाज लोप्पा उत्पादन साधनकु लगातार बढ़ोतरी आतेकाई बस्केने अति-उत्पादन आयो आयार।

उत्पादन ता राष्ट्रीय योजना ता रेंडु हिस्सांग मंदितांग। उंदी, उत्पादन ता पूना साधनकु - बिल्डिंग, मशीकु, कच्चा माल लेक्काटवु। दूसरा, इस्तेमाल क्रियाना योजना - स्वास्थ्य, मनोरंजन, खेल-कूद लेक्काटव वेने शामिल मंतांग। बस्के एवनल सैनिक शक्ति ता जरूरत मंता अस्के एवनल अदिन काजे वेने योजना लोप्पा जागा तासा लागिता।

इदु व्यवस्था लोप्पा अति-उत्पादन बस्केने आया परवो, बारांकु इत्तेके इस्तेमाल ता चीजकु ना कुल पैदावार आबादी लोप्पा तूस्मूडायार, इत्तेके कुल मजूरी, तीना लोप्पा हर रकम ता भत्ता वेने शामिल मंदिंयार, इस्तेमाल क्रियाना सामान कुल कीमत ता बराबर तय क्रियमूडांता। योजना लोप्पा कमी मंदा परिंतांग - उदाहरण तुकू बदे साल ते साइकिलकु लोकुरा जरूरत तुकू ज्यादा

बनेमांतांग ओसो जूतांग कम। मति दूसरा योजना ते इव कमिंग वेल्ले हल्कोए दूर वेने क्रिया परमूडांता। समस्या हमेशाए बद चीज ता बचोन उत्पादन क्रियाना इंजीए मंदिता। पूरा उत्पादन किन घटे क्रियाना सवाल बस्केने तेदो, बारांकु इत्तेके इस्तेमाल ता चीजकु ना पूरा खपत इस्तेमाल ता चीज कुना उत्पादन तुकू बस्केने कम आयो आंता। बद्रम-बद्रम इवु चीजकुना सही योजना अनुसार उत्पादन बेरसिंता, अद्रम-अद्रम अविन सही योजना अनुसार वितरण वेने बेरसोर दांता।

मति इस्तेमाल क्रियाना चीजकु सीधा जनता लोप्पा तूस्मूडायो। वितरण ता यंत्र ता काम मजूरी, वेतन लेवेके भत्ता रूप ते हीता पैसा कींता। इस्तेमाल ता समान ता कीमत तय कित्ताद मंता, अदिन काजे मजदूरी, वेतन ओसो भत्ता ना कुल कीमत इस्तेमाल क्रियाना सामान कुना कीमत ता बराबर तास्तेके बातालायो। इद्रमे उत्पादन ओसो खपत ते बस्केने बदे अंतर वायो आंता, बचोन उत्पादन आत्ता अचोने लोकर किन दोरकिंता। उत्पादन बेरस्तेके मुन्ने ज्यादा माल आबादी काजे तैयार आंता ओसो लोकर मुन्नेटले चीज कुना इस्तेमाल कींतोरा।

समाजवादी समाज लोप्पा मत्ता कीमत कुना बारे ते हमेशाए गलत समझदारी बनेमांता। पूंजीवादी व्यवस्था लोप्पा, कीमत कु घटेमायन-बेरस्ना सप्लाई ओसो मांग ता संबंध किन तोहिंता। कीमत बेरस्तेके हाटुम लोप्पा माल ता सप्लाई वेल्ले कम आया मंता इंजी आल्सना। ओसो कीमत कम आतेके हाटुम लोप्पा माल ता सप्लाई वेल्ले आया मंता इंजी आल्सना। इद्रमे कीमतकु उत्पादन किन नियंत्रण क्रियानोरा लेक्का काम कींता। मति समाजवादी समाज लोपा कीमतकु सिर्फ उपभोग ओसो खपत ता नियंत्रकर्ता मंदिता। उत्पादन, योजना अनुसार आंता ओसो तैयार कित्ता सामान सब्बे अस्सी मारियर इंजी कीमत ताना अनुसार तय कियमूडांता।

इस्तेमाल क्रियाना माल ता कुल पैदावार किन आबादी लोप्पा बद्रम तूस्मूडांता? बस्केने, मार्क्स ना राय चीज कुन बराबर-बराबर तूसना इंजी मत्ता, इंदाना पोल्लो बिल्कुले गलत मंता। ओना राय इदु बारांकु हिल्ला मत्ता? बारांकु इत्तेके समाजवादी समाज ता निर्माण एकदम पूना बुनियाद पोरों आयव पाडना बुनियादी पोरोंने आंता ओसो इदु अदिन किन पूंजीवाद तिंची विरासत ते दोरकसी मंदिता। बराबर तूसना इत्तेके पाडना व्यवस्था लोप्पा बोना पिस्वल-स्तर

औसत तुकू पोरो मत्ता, ओरकिन दोड़ तत्ताना इंजी मत्ता। इत्तेके उत्पादन बेरसी कियाना लोप्पा अनिपुण मजदूर लोरकिनकु बचोनो ज्यादा महत्वपूर्ण हिस्सा निपुण मजदूर लोरकिन दोड़ रेहना लेक्का आंता। असमान परिस्थितिंग विडचसी हत्ता पूंजीवाद पोरो आधार आसी बदे वेने समानता बने कीतेके, अदु अन्यायपूर्ण आयारा। मार्क्स ना राय इदिना बारे ते बिल्कुले स्पष्ट मत्ता। ओरू “लोकुरा अधिकार समान आयवा, असमान मंदाना...न्याय बस्के वेने समाज ता आर्थिक परिस्थितिंग ओसो अविना सांस्कृतिक विकास तगडल पोरो लेवेके जेक मन्नो आंता इंजी रास्तोरा”

बोर मानेय इंजेटा परिस्थिति ते पूंजीवादी समाज तल पेसितोर, ओरे असल इत्तेके असमान मंदितोर, अदिन काजे समाज ओरा संगे न्यायपूर्ण व्यवहार कियाला आल्सिंता, इत्तेके ओरा संगे असमान व्यवहारे कियाना लेक्का आंता। दूसरा बगिल ओरू समाज ते सेवा कीतेके, समाज वेने ओरा जिम्मेदारी एतित्ता। अदिन काजे “बोर काम किवोर, ओरकिन तिंदला वेने दोरको आयारा।” इद पोल्लो तल समाज ता सेवा कीतोर, ओना पिस्वल-स्तर अचोने पोरोर मंदियारा। इद्रमे इस्तेमाल ता चीजकुना कुल पैदावार ता बटवारा, हर मानेय तन्ना क्षमता ता मुताबिक कियाना ओसो तन्ना काम ता मुताबिक एतना इंदाना सिद्धांत ता अनुसारे आयरा।

मति समाजवादी समाज अदिन पूंजीवाद तिंची विरासत ते दोरकता स्तर पोरोने स्थिर आसी मन्नो आंता। हर साल अदु उत्पादन किन ओसो अदिन संगे लोकुरा कार्य-निपुणता ओसो सांस्कृतिक विकास किन बेरसिकिसोर दांता। मजदूरी ता असमानता-कार्य-निपुणता ओसो सांस्कृतिक दृष्टि ते विकसित लोकुरा अनिपुण लोकुरा किनकु ज्यादा मजदूरी हियाना व्यवस्था हर मानेय किन तम्मा कार्य-निपुणता बेरसी कियाला प्रेरण हींता। लोकुरा कार्य-निपुणता बेरस्तेके उत्पादन बेने बेरसिंता। हर मानेय किन मुन्ने तुकू ज्यादा दोरका परिंता। अद्रमासी हर मानेय ना पिस्वल-स्तर पोरो तेदसोर दांता। असमानता पूंजीवाद ता मुट्टामेंड लोकुरा सम्पत्ति ओसो ज्यादातर लोकुरा गरीबी बेरसी कियाला काजे लीवर ता काम कींता, अद्रमे समाजवादी समाज लोप्पा पूरा समाज ता स्तर किन पोरो तेहना साधन बनेमांता।

मार्क्स इद वायना समाज लोप्पा हमेशाए असमानता टीके मासी मदियार इंजी समझेमांतोरा? हिल्ले, असमानता स्थाई मनो आयार बारांकु इत्तेके उंदी अवस्था इद्रमता वेन आयर कि लोकुर समाज ता बचोन सेवा कित्तोर, अचोने हिस्सा हिया लागो आयार।

बारांकु इत्तेके लोकुरा काम ता बराबर लेवेके बदे दूसरा सिद्धांत ता अनुसार तूसना इत्तेके हर मानेय ना जरूरत पूरा कियाला काजे हालनाचोन सामग्री हिल्ले इंजी मानेमायना आंता। पूंजीवादी समाज लोप्पा वेने बदे परिवार ते सब्बे सदस्य लोरा जरूरत अनुसार तिंदला-उंडला जमा किया परतेके बदे सिद्धांत अनुसार तिंदाला-उंडला तूसवा लेवा परिवार ता हर सदस्य तन्ना जरूरत अनुसार एतसी मंदिता। समाजवादी समाज लोप्पा सब्बे नागरिक तन्ना जरूरत अनुसार चीज पोथ्या परनाचोन उत्पान बेरसिंता ओसो बोनकिने बदे चीज ता कमी आयो आंता, अस्के लग-अलग मानेय बचोन पोथिंतोर इंजी नापे कियाना, तुले कियाना ओसो सीमित कियाना जरूरत मनो आयार। इदु अवस्था वातास्के उत्पादन ओसो वितरण हर मानेय तन्ना क्षमता अनुसार काम कियाना ओसो तन्ना जरूरत अनुसार एतना सिद्धांत पोरो आधार आसी आयार।

इदु संभव आत्तास्केने समाजवाद कम्युनिज्म लोप्पा बदले मायार। मार्क्स ना अनुसार समाजवाद, उत्पादन साधन कुना पोरो जनता ना अधिकार मंदाना पहली मंजिल आंदू। अदिन काजे मानेय कियाना मानेय ना शोषण खत्म आयार, मति सही योजना समाजवादी उत्पादन संगे देश ता पैदावार हर मानेय किन ओना जरूरत अनुसार दोरकनाचोर बेरस्तार हिल्ले।

मति कम्युनिज्म ता मंजिल इत्तेके सिर्फ चीजकु हालनाचोन दोरकानुंग इंजी आयो। मजदूर वर्ग सत्ता पोरो कब्जा कित्तास्के ओसो समाजवाद बगिल दायना शुरू आत्तास्के लोकुरा दृष्टिकोण ते वेने बदलाव शुरू आंता। पूंजीवाद लोप्पा मत्ता रक-रकम ता बाधांग कमजोर आंतांग अनि आखरी ते खत्म आंतांग। शिक्षा ओसो विकास ता सब्बे मौकांग सब्बे पिल्ला-पेकोरा काजे समान रूप ते दोरकानुंग, ओरा यायल-बाबाल सामाजिक हैसियत (समाज लोप्पा बचो इज्जत मंता) लेवेके ओरा आमदनी बचोन मंता इंदाना लोप्पा बदे अंतर मनो आयार। “जातिपाती” ता अंतर गायब आयार। पिल्ला-पेकोरा दिमाग संगे-संगे कै संगे काम कियाना वेने करियांतोर। शारिरीक ओसो मानसिक श्रम ता बेरसोर मत्ता

समानता तीरम-तीरम पूरा आबादी लोप्पा फैलेमायारा। हर मानेय “बुद्धिजीवी” बनेमांतोर ओसो बुद्धिजीवी शारिरीक श्रम तिंची जेक-जेक वित्तना रोमी कींतोर।

महिला लोर किन उडला हूडमूडायो आयारा। ओसो अवु समाज हर क्षेत्र लोप्पा तन्ना योगदान हिया परवोंग इंजी वेने समझेमायमूडायो आयारा। अवु बदे तिप्पल हिल्वा काम किया परना इंजी विशेष व्यवस्था कियमूडायारा। महिला लोर किन ओसो ज्यादा स्वतंत्रता मंदाना इंजी कारखानांग लोप्पा, पारांग लोप्पा, बेहरा-बेहरा लोकुना लोप्पा पिल्ला किन जन्म हियाला काजे लोन (शिशु-गृह) पंडमूडायारा। सामूहिक किचन, होटल ओसो गेटेंग हुक्कला काजे लोन पंडसी महिला लोर कियाना काम किन हल्को कियमूडायारा। महिला लोर किन काम कियाला काजे जबरदस्ती कियवा अवु हल्को काम किया परना लेक्काटा सुविधा हियमूडायारा।

राष्ट्रीय ग्रूपकु नडमा मत्ता बंधनकु देगानुंग। समाजवादी समाज लोप्पा “नस्लवाद” पोरोल ता बदे विषय मन्नो आयारा। बोनकिने वेने ओना रंग लेवेके ओना राष्ट्रीयता ता कारण ते सुडला-बेहरा हूडना बंद आयारा। सब्बे राष्ट्रीय समूह किन अविना आर्थिक साधन कुना संगे-संगे अविना साहित्यिक ओसो कलात्मक परंपरांग किन विकसित कियाला मदद कियमूडांता।

लोकतंत्र हर 5 साल ते संसद लोप्पा वरोर प्रतिनिधि काजे वोट कियाना एवनल सीमित आसी मन्नो आंता। इंजे लोकतंत्र इत्तेके हर कारखाना लोप्पा हर हर पारा ते ओसो पिस्वल ता क्षेत्र ते महिला-पुरुष खुद तन्ना ओसो तन्ना देश ता भविष्य ता निर्माण कींतोर। ज्यादा से ज्यादा लोकुर सार्वजनिक पिस्वल ता बदे क्षेत्र लोप्पा नेंगितोर, अगा ओरकिन तन्ना ओसो दूसरो ना सहायदा कियाना जिम्मेदारी एता लागिता। दूसरा जागाने दोरकना लोकतंत्र तुकू बचोनो ज्यादा पूर्ण ओसो बचोनो ज्यादा सही लोकतंत्र मंदिता।

शहर ओसो ग्रामिण ता अंतर खत्म आंता। नाटे मंदाना मजदूर मशीनकुना इस्तेमाल कियाना करियंतोर ओसो तम्मा कार्य-निपुणता ता स्तर किन शहरी मजदूर लोरा बराबर किंतोर। मुन्ने शहर ते दोरकना शिक्षा ओसो सांस्कृतिक सुविधांग इंजे नाहकुना लोप्पा वेने दोरकानुंग।

संक्षेप रूप ते समाजवाद तिंची भौतिक परिस्थितिंग लोप्पा आयना बदलाव कुना पोरों आधार आसी महिला-पुरुष ता दृष्टिकोण ओसो विकास

लोप्या वेने वेल्ले बदलाव आंतांगा। इंजे “नालुंग बगिलता विकास आंता, नालुंग बगिल ता शिक्षा दोरकिता अद्रम आसी सब्बे महिला-पुरुष हर रकम ता काम कियाना लेक्का तैयार आंतोरा।”

महत्वपूर्ण पोल्लो पूंजीवाद तिंची पुटता स्वार्थ ओसो व्यक्तिवादी दृष्टिकोण ता बदला ते लोकरा लोप्या सही सामाजिक दृष्टिकोण ओसो समाज ता बारे ते जिम्मेदारी ता विचार पैदा आंता। मार्क्स ना माटा ने “श्रम पिस्वल-पिस्सना साधने आयवा अदु खुद पिस्वल ता साधन बनेमांता।” समाज ता इद अवस्था ते कम्युनिज्म समाज लोप्या लोकरगडल काम एतला काजे ओरकिन बदे रकम लालच तोहना जरूर मनो आयार, बारांकु इत्तेके इद कालम ता महिला-पुरुष लोरगा समाज ता विकास लोप्या ज्यादा से ज्यादा योगदान हियाला काजे इदिन विडचसी दूसरा बदे दृष्टिकोण मनो आंता।

इदु उंदी कंजकड (सपना) मंताया? इदिन किन बोरू मार्क्सवाद ता भौतिकवादी आधार किन समझेमायोर ओरे कंजकड समझेमांतोरा। माटु दूसरा अध्याय लोप्या इदिना बारे ते वेहतोमे। मानेय ना बदे वेने विशेषता ओसो दृष्टिकोण हमेशाए स्थाई मनो आंता। आदिम समाज ता नेंडु दुनिया ते मत्ता अवशेष कुना लोप्यो वेने इद्रमे दिसिंता। पेरकेटा समाज लोप्या वर्ग वातास्के सामाजिक जिम्मेदारी ता भावना वेने खत्म आत्ता, मति वर्ग काजे जिम्मेदारी ता भावना रूप ते अदु इंजे वेने मंता। पूंजीवादी समाज लोपा सामाजिक जिम्मेदारी ता भावना बिल्कुले खत्म आसोर दांता। इदु व्यवस्था पिस्वल ता “हर मानेय तन्ना-तन्ना स्वार्थ हूडना” मूल सिद्धांत बने किसिंता।

मति पूंजीवादी समाज लोप्या वेने मजदूर लोरा “एकता ता भावना” मंदिंता। इदिन समान हित ओसो समान जिम्मेदारी ता भावना मंदिंता। इदिन भावना किन बोरे बाहरो तिंची तच्ची मजदूर लोरा दिमाग ते वाटताद हिल्ले। मजदूर वर्ग किन बद भौतिक परिस्थिति लोप्या पिस्वल पिस्सा लागिंतायो अदे परिस्थिति तल इदु विचार पैदा आंता। बारांकु इत्तेके मजदूर उंदी तरीका ते काम कीसि मंजी वरोर-दूसरोना मदद कीसि पिस्वल पिस्सिंतोरा। दूसरा बगिल, स्वार्थ काजे बेय्यल आसी मत्ता सामाजिक ओसो सामूहिक जिम्मेदारी ता भावना हिल्ला व्यक्ति वादी मानेय ना सबसे बेसता नमूना पूंजीपतिर मंतोरा। वीरू वरोर-दूसरोर किन हौकसी मंजी पिस्सना कोशिश कींतोर, प्रतिद्वंद्वीरा घेराव लोप्या

मंदितोरा शासक वर्ग ता विचार एकता ता आयवा प्रतियोगिता ओसो होइ ता भावनांग मंतांग, इव भावनांग किन विशेष रूप ते मालिक लोर उचुक विशेष सुविधांग हियाला काजे चुने कीसि मत्ता मजदूर लोरा लोप्पा वेने फैले कींतोरा मति बदे वर्ग ता (व्यक्ति तिंची अलग) दृष्टिकोण ता बुनियादी आधार ओना पिस्वल ता भौतिक परिस्थितिए मंदितांग। ओरू बद्रम तन्ना पिस्वल पिस्संतोर अद्रमे ओरा दृष्टिकोण निश्चित आंता।

अद्रमासी इदिनागडल लोकुरा भौतिक परिस्थितिंग बदले कीसि पिस्वल पिस्सना तरीका बदले कीसि, ओरा दृष्टिकोण किन वेने बदले किया परमूडांता इंदाना निष्कर्ष पेसिंता। इदिना सब से बेसता उदाहरण सोवियत संघ लोप्पा किसान लोरा दृष्टिकोण लोप्पा पुट्टता बदलाव आंदू। जारशाही कालम ता रूसी किसान लोरा बारे ते बोरु रास्तोर, ओरू ओरा स्वार्थ ओसो लालच मत्ता व्यक्तिवादी भावना ता बारे ते वेहतोरा क्रांति ता आलोचना कीसोरे किसान लोर किन बस्के ने समाजवादी बने किया परमूडायो, किसान लोरा कारण ते क्रांति विफल आया र इंजी वेहतोरा। इदु पोल्लो निज्जमे आंदू, बारांकु इत्तेके अदु कालम ते किसान लोरा दृष्टिकोण वेल्ले सीमित आसी मत्ता, पिस्वल पिस्सना पाडना परिस्थितिंग ओरकिन वेल्ले गड्डिग दोहची मत्तांग ओसो ओरा दृष्टिकोण किन हूडतेके ओरू तर्ककुना संगे बस्के वेने समाजवादी बनेमायोर इंजी ओसो ओरकिन बल-प्रयोग कीसि वेने समाजवादी बने किया परमूडायो। मति इद्रम आलोचना कियानोर मार्क्सवादी हिल्ला मत्तोर अदिन काजे ओनकिन किसान लोरा नडमा ता आदर्श फार्म ओसो ट्रैक्टर-स्टेशन खुलेमायार अस्के ओरू बेहरा स्तर ते खेती कितेके ज्यादा ओसो बेसता फसल वांता इंजी तम्मा अनुभव लोप्पा करियानूर इंदाना पोल्लो समझे मायोर आतोर। इद्रम किसान लोर किन खेती ता मशीन ओसो अलग-अलग खेती ता जमीन लोप्पा मत्ता पाडिं किन पाटे कीसि जमीन किन सामूहिक तरीका ते जमीन पोरो पूहना लेक्कटा तरीकांग ना समर्थक बने कित्ताद मत्ता। इद्रम कित्ता पेरके किसान लोरा दृष्टिकोण ता व्यक्तिवादी अलगाव वेने खत्म आत्ता। ओरू सामूहिक पिस्वल पिस्सना शुरू कित्तोर, उंदी पूना तरीका ता किसान - इत्तेके सामूहिक खेती कियाना किसान बनेमातोर। ओरा लोप्पा सामूहिक जिम्मेदारी ता भावना पैदा आत्ता। सामाजिक दृष्टिकोण बगिल इदु पहली बेहरा कदम मत्ता।

बदे देश ते पिस्वल ता भौतिक आधार समाजवादी उत्पादन ओसो वितरण मंदिता, पिस्वल पिस्सना लोकुरा तरीका पूरा समाज काजे काम कियाना मंदिता, अस्के स्वाभाविक रूप ते लोकुरा लोप्पा सामाजिक जिम्मेदारी ता भावना पैदा आंता। लोकुर किन सामाजिक हित किन सबसे पोरो तासना सिद्धांत किन समझे कियाना जरूरत मन्नो आंता। अदेनके मानव स्वभाव लोप्पा मंदना इच्छा-आकंक्षाकुना पोरो बदे नैतिक सिद्धांत लेवेके बदे हवाई कर्तव्य भावना ता जीत हासिल कियाना जरूरत आयो। व्यवहार लेवेके रिवाज खुद “मानव स्वभाव” किन बदली कीसिंता।

इंजे एवनल माटु पूरा दुनिया लोप्पा समाजवादी लेवेके कम्युनिस्ट समाज ता स्थापना आतेके बाताल आयार इंदाना पोल्लो ता बारे ते आल्सतदे हिल्लो मति मार्क्स समाजवादी समाज ता बारे ते हीता विवरण लोप्पटल अस्के युद्ध खत्म आयार इंजी प्रकट आंता। हर देश लोप्पा उत्पादन ओसो वितरण ता संगठन समाजवादी आधार ते आयार अस्के बदे वेने देश लोप्पा दूसरा देश पोरो कब्जा कियाना विचार तासना समूह पिस्सोए आयार। उंदी पूंजीवादी देश तन्ना पेरेके अरता देश कुना पोरो पूंजीवादी व्यवस्था फैले कियाला ओसो महाजनी पूंजीपतिरा समूह ता मुनाफा कमई कियाला पूंजी वाटला काजे पूना हरी पंडला, रेल, जहाज अड्डा बने कियाना, खदान कुना मशीन तैयार कियाला काजे पूना ठेका दोरकना इंजी बद इलाका लोप्पा कच्चा माल दोरकना संभावना मंता ओसो बेगटा हाटुम कुना लोप्पा तम्मा तैयार किता माल वम्मला काजे कब्जा कींता। समाजवादी देश कुना नइमा बस्केने युद्ध ताको आयार, बारांकु इत्तेके युद्ध तिंची ओरा लोप्पाटल बदे वेने ग्रूप किन बदे फायदा दोरको आयार।

अदिन काजे बदे वेने समाजवादी देश बदे वेने पेरेके अरता देश पोरो तन्ना कब्जा तासो आंता। इदिना उल्टा हर देश तन्ना उद्योग-धंधा किन बचोन विकसित कींता ओसो तन्ना सांस्कृतिक स्तर किन बचोन पोरो तेहिंता, अचोने ज्यादा दूसरा सब्बे समाजवादी देश कुना फायदा आयार। दुनियामेंड लोकुरा पिस्वल-स्तर बचोन पोरो तेदियर, पिस्वल अचोने सुंदर बनेमायार। बदु समाजवादी देश औद्योगिक दृष्टि ते विकसित मंदियर अवु पेरेके अरता देशकुना विकास किन रोमी कियवा लेवा, अविना बदे रकम ता शोषण कियवा लेवा हर रकम ता विकास काजे मदद कियानुंग।

इद्रम ता विश्वव्यापी समाजवादी व्यवस्था लोप्पा मानेय बचोन ज्यादा विकास कियानूर इंदानदिना बारे ते नेंडु माटू बिल्कुले आल्सा परवोमा। हर देश ता आर्थिक पिस्वल उंदी योजना पोरो आधार आसी संगठित आयार। विश्व व्यापी उंदी योजना अलग-अलग देश कुना योजनांग लोप्पा समानता स्थापित कियार। वैज्ञानिक ओसो यांत्रिक आविष्कार सब्बे देश कुना सम्पत्ति बनेमायनुंगा। सांस्कृतिक सफलतांग ना आदान-प्रदान बेरसियार। इद्रम ता परिस्थिति ते मानेय निज्जमे बेहरा-बेहरा डाका वाटसोर विकास ता हरीं पंडानूर।

इद विकास बद दिशा ते दांता? मार्क्स इदिना बारे ते बस्केने वेहना कोशिश कीवोर, बारांकु इत्तेके इद्रम ता वैज्ञानिक भाविष्यवाणी काजे उचित परिस्थितिंग ना जानकारी मनवा मंदू। मति दुनियामेंड कम्युनिज्म ता स्थापना आत्तास्के वर्ग-भेद ओसो वर्ग-संघर्ष ता मानव इतिहास खत्म आयार इंदानदु स्पष्ट मंता। मुन्ने वेने बदे पूना वर्ग पैदा आयो, बारं इत्तेके कम्युनिज्म समाज लोप्पा वर्ग पैदा कियाना लेक्कटा बदे चीज मन्नो आयार। मानेय ना उत्पादन शक्ति कम मत्तास्के वर्ग-विभाजन ता कारण ते उचुन संगठन कर्ता लोर ओसो पूना, उच्च स्तर ता उत्पादन-शक्तिंग ना आविष्कार कियाना काम किया परतोर। पूंजीवाद लोप्पा वेने वर्ग-विभाजन इदे काम कियानदु, अद्रमासी उत्पादन ता केंद्रीकरण ओसो उत्पादन-कौशल लोप्पा वेल्ले विकसित कियाला मदद आत्ता।

मति मानेय ना उत्पादन-शक्ति केवल दिव्या तुकु रेंडु घंटांग कीसि सब्बे चीज पैदा किया परना लेक्का मजबूत आत्ता अवस्था ते वर्ग-विभाजन किन खत्म किया परमूडांता ओसो कियाना वेने। इद्रम आतेके मानेय ओसो उंदी बेरा प्रकृति संगे तन्ना संघर्ष शुरू कियानूर, अस्के वेने जीड़ना साधनकु ओनाए कैदे मंदांनुंगा। अस्के ओरू जादू लेवेके मंत्र संगे प्रकृति किन तन्ना कब्जा ते कियाना लेवेके प्रार्थना ओसो दुआ संगे प्राकृतिक बाधांग किन दूर कियाना कोशिश कीवोर आयनूर। ओरू वर्ग संघर्ष ओसो युद्ध नडमा कोंडा हिल्ला लेक्का हरीं परहकोर आयनूर। अस्के ओना लोपा उंदी मजबूत आत्म-विश्वास मदियर। ओरू ओना लोप्पा प्राकृतिक ताकत किन कैद तासना ओसो हमेशाए मुन्ने दायना ताकत मंता इंजी अस्के पुंजी मंदांनूर। मार्क्स वेहता कम्युनिज्म समाज ता मानेय इद्रमे मंदांनूर।

अध्याय सात प्रकृति ता बारे ते मार्क्सवादी दृष्टिकोण

माटू मार्क्सवाद मानेय किन प्रकृति ताए अंग इंजी मानेमांता इंदाना पोल्लो मुन्ने वेहत्ताद मंता। अदिन काजे मानेय ना जन्म बद्रम आत्ता इंजी पुंदाना इत्तेके प्रकृतिता ता विकास लोप्पाने अदिन खोज किया लागियरा। मानेय ना विकास पिस्वल ता मुन्नेटा रूपकुना लोप्पाटले आंता। अद विकास आयनास्के ने विचार ओसो सचेतना व्यवहार जन्म आत्ता। इदिना अर्थ बातल इत्तेके पदार्थ लेवेके अचेतन वास्तविकता मुन्नेटले मत्ता। बुद्धि इत्तेके सचेतन मंदना वास्तविकता पेरके वाता। इदिना अर्थ बतल इत्तेके पदार्थ लेवेके बाहरी वास्तविकता ता अस्तित्व, बुद्धि तिंची स्वतंत्र मंदिता। प्रकृति ता इद समझदारी किने “भौतिकवाद” इंतोरा।

इदिना उल्टा समझदारी इत्तेके बारही दुनिया ता वास्तविकता इंजी आयो, अदिना अस्तित्व सिर्फ मना विचार लोप्पा लेवेके बदे अलौकिक (पेन) शक्ति ता विचार लोप्पा मंदिता, अदिन किन आदर्शवाद इंतोरा। आदर्शवाद बचोनो रकम ता मंता। मति उंदी पोल्लो ओरू सब्बेतोरे वेहितोरा। अदु मूल वास्तविकता बुद्धि आंदू इंजी, अद मानेयना बुद्धि मत्तेकाई लेवेके दूसरा प्राणी ना बुद्धि, ओसो पदार्थ, ताना लोप्पा वास्तविकता ता बदे अंश मत्तेके वेने अद गौण (सेकेंड्री) आंता।

एंगेल्स ना माटा ते, मार्क्सवादीर दृष्टिकोण “भौतिकवादी विश्व दृष्टिकोण, प्रकृति किन अदे रूप ते हूडिंता बद रूप ते अद मंतायो।” बाहरी दुनिया वास्तविक मंता। मना लोप्पा अदिना बारे ते चेतना मंता या हिल्ले, इंदाना पोल्लो तिंची अदिना अस्तित्व स्वतंत्र मंता। अदिना गति ओसो विकास मना

लेवेके बोनाए दूसरोना विचार संगे ताकवा लेवा मंदिता। मति बढ नियमुकनागडल अद ताकसोरे मंदिता अदिन मानेय पूंदा परितोर ओसो अदिन इस्तेमाल किया परितारो।

दूसरा बगिल, आदर्शवाद पदार्थ, बाहरी दुनिया किन वास्तविक मानेयमायोर आंतोर, ओरा तना अस्तित्व किन गौण (संकेडरी) समझेमांतोर, अदिन काजे ओरा विचार वास्तविकता किन समझमायना मावा समझदारी तुकू बाहरो मंता इंजी इंतोर। दुनिया ता “रहस्यपूर्ण गति” किन मानेयना बुद्धि समझेमाया परवो इंतोर।

भौतिकवाद ओसो आदर्शवाद ता बहस मना काजे बारांकु महत्व मंता? बारांकु इत्तेके इदु सिर्फ वेडिय वायना लेक्कटा बहस लेवेके दिमाग तेने आल्सोर मत्ता दुनिया ता सवाल आयो, अदु आखरी विश्लेषण लोप्पा मना व्यवहार ता सवाल, उंदी ठोस सवाल बनेमांता। मानेय बाहरी प्रकृति किन सिर्फ हूडोरे आंतोर, अदिन किन बदले वेने कींतोर अनि अदिन बदले कियाना संगे-संगे तन्ना खुद वेने बदलेमांतोर।

दूसरा भौतिकवादी दृष्टिकोण ता अर्थ मानेय ना बुद्धि ते बाताल मंतायो, बुद्धि लोप्पा बदिना चेतना मंतायो, अदु बाहरी वास्तविकताए मंदिता इंजी वेने आंता। इत्तेके विचार वास्तविकता ताए प्रतिबिम्ब आंदू अविना जन्म बारही दुनिया तले आंता। मति सब्बे विचारकु सही मन्नोंग आंतांग, लेवेके सब्बे विचार कुना लोप्पा वास्तविकता ता सही प्रतिबिम्ब दोरको आंता। वास्तविकता ता ठोस अनुभवे विचार सही मंता या हिल्ले इंजी वेहिंता।

आदर्शवादीर, दूसरा बगिल, शाश्वत ओसो सनातन सिद्धांत कुना पोरो विश्वास कींतोर ओसो इव सिद्धांत कुना वास्तविकता संगे बदे मेल मंता या हिल्ले इंदाना पोल्लो ता परवाह कीवोर आंतोर। नेटा दुनिया लोप्पा इदिना उंदी उदाहरण पूर्ण निराकरणवादी शांति ता दृष्टिकोण मंता। पूर्ण निराकरणवादी शांतिवादी तम्मा नालुंग बगिल ता वास्तविक दुनिया किन हूडोर आंतोर। ओरा काजे पिस्वल ता अनुभव लेवेके वास्तविकता माकिन बल-प्रयोग ओसो हिंसा ता प्रतिरोध किवेके ओसो ज्यादा हिंसा, बल-प्रयोग, आक्रमण, अत्याचार पैदा कींता इंजी वेहिंता - ओरा काजे इद पोल्लो ता वेने बदे महत्व हिल्ले। इद्रमता सम्पूर्ण निराकरणवादी शांतिवाद ता बुनियादी आधार दुनिया ता हर आदर्शवादी

दृष्टिकोण तासना ओसो बाहरी दुनिया लोप्पा अविश्वास तसनाए आंदू इद्रम ता निराकरणवादी-शांतिवादी लोकुर किन तम्मा दार्शनिक दृष्टिकोण बद्रम ता मंता पुनवा मंदानूर बहे, मति इद्रम आतेकाई मना पोल्लो सच्चाई लोप्पा बदे अंतर वायो आंता।

अदिन काजे मार्क्सवाद तन्ना सब्बे सिद्धांत कुना स्थापना दुनिया ता बारे भौतिकवादी-दृष्टिकोण पोरो आधार आसी कींता। इदे दृष्टिकोण तल अदु दुनिया ता अध्ययन कींता ओसो दुनिया किन ताकी कियाना नियम कुना ओसो मानेय वेने वास्तविकता ता अंग मत्तांकु मानव समाज ता गति निर्धारित कियाना नियम कुना खोज कियाना कोशिश कींता। मार्क्सवाद तन्ना हर खोज किन हर निष्कर्ष किन ठोस अनुभव ता परीक्षा तिंची तेंडिंता ओसो बद निष्कर्ष लेवेके सिद्धांत सही हिल्लेंग अविन विडचसी, अविना लोप्पा जरूरी बदलाव कीसिंता।

दुनिया (ताना लोप्पा मानव समाज किन वेने हमेशाए शामिल समझेमायना) ता बारे ते इद दृष्टिकोण ता उचुक आम विशेषतांग मंतांग अविन माने ना दिमाग पैदा कीवो, अदु वास्तविक मंदिंतांग। मार्क्सवादी दृष्टिकोण उंदी वैज्ञानिक दृष्टिकोण आंदू अदु वास्तविकता तले पेसिंता। अदु बोरो होशियार विचारक ना खोज कित्ता “प्रणाली” आयो। अदिन काजे अदिना कोंडा ते केवल दुनिया भौतिकवादी आयवा, ताना लोप्पा ओसो उचुन गुण वेने मंतांग, अविन कुन “द्वन्द्वात्मक भौतिकवाद” इंतोर। साधारण रूप ते द्वन्द्वात्मक भौतिक बदे विचित्र ओसो गुप्त चीज आंदू इंजी समझेमांतोर। मति असल इत्तेके इद्रम बाताले हिल्ले, बारांकु इत्तेके अदु वास्तविक दुनिया ता प्रतिबिम्बे मंदिंता। हर मानेय पुंजी मंदाना रोज ता साधारण चीज कुना बारे ते वेहची “द्वन्द्वात्मक” शब्द ता अर्थ समझे किया परमूडांता।

पहली पोल्लो, प्रकृति ओसो दुनिया, मानव समाज बिल्कुले अलग ओसो स्वतंत्र चीज कुना समूह आयो। इदु पोल्लो हर वैज्ञानिक पुत्तोर अदिन काजे बदे विशेष पदार्थ ता अध्ययन कियानास्के अदिना संबंधित सब्बे महत्वपूर्ण पोल्लोंग ना ध्यान हिंसी-हींसी दोगिंतोर। एरु एरे मंदिंता! मति अदिना तापमान निश्चित बिंदु एवनल बेरसी कीतेके (इदु वायुमंडल ता दबाव संगे बदलेमासोर मंदिंता) अदु भाप बनेमांता, ओसो इदिना तापमान कम किसीतेके इदु बर्फ बनेमांता। रक-रकम ता बाकी पोल्लोंग वेने तीना पोरो वेल्ले प्रभाव कींतांग। हर

साधारण मानेय वेने चीज किन उचुन ध्यान ते हूडसी, दुनिया लोप्पा बदे वेने पदार्थ पूर्ण रूप ते स्वतंत्र सत्ता तासो आंता ओसो हर चीज दूसरा चीज कुना पोरो आधार आसी मंता इंजी समझेमांतोरा।

असल इत्तेके विभिन्न पदार्थ कुना उंदी-दूसरा पोरो निर्भर आसी मंदानादु वेल्ले साधारण ओसो स्पष्ट दिसिंता, अस्के इदिना बगिल ध्यान हियाना बाता जरूरत मंता? इंजी पूछेमायमूडांता। मति असल ते लोकर हमेशा इद पोल्लो किन हूडोर आंतोरा। ओरू उंद रकम ता परिस्थितिंग लोप्पा बद पोल्लो निज्जम मंता, इत्ते अदु दूसरा परिस्थितिंग लोप्पा निज्जम हिल्ला मंदिता, इद्रमता पोल्लो किन सुरता तासोर आंतोरा। लोकर आदत ओरू उंदी रकम ता परिस्थितिंग लोप्पा लागू कीता विचार कुना बिल्कुले अलग परिस्थिति लोप्पा लागू कियाना कोशिश कियाना वेने मंता। उदाहरण तुकू भाषण स्वतंत्रता ता दृष्टिकोण किन हूडाटू। साधारण रूप ते भाषण स्वतंत्रता तल लोकतंत्र किन सहायता दोरकिंता, लोकर घटनांग ना बारे ते तम्मा विचारकु पेश किया परितोर, ओसो इद्रमे समाज ता विकास काजे मदद दोरकिंता। मति फासीवादी भाषण किन स्वतंत्रता पाहिजे आंता, इद फासीवाद सबसे मुन्ने लोकतंत्र किने हौकसिंता, अद्रमासी मुद्दा ता रूपे बदले मांता। फासीवाद किन भाषण हियाना आजादी हीतेके समाज ता विकास रोमिंता। इद्रम ता परिस्थिति लोप्पा मीटू भाषण हियाना आजादी ता पाटांग बचोन पारतेकाई, सामान्य परिस्थिति लोप्पा ओसो लोकतंत्र लोप्पा विश्वास कियाना पार्टींग काजे बदु सिद्धांत सही मंता अदु फासीवादी पार्टींग इत्तेके अविना उद्देश्य मुन्ने लोकतंत्र किन बदनाम कियाना ओसो आखरी ते अदिन नष्ट कियाना पार्टींग काजे सही मन्ने आंता इंजी मानेमाया लागियर।

द्वन्द्ववादी दृष्टिकोण ता अनुसार दुनिया लोप्पा बदे वेने पदार्थ स्थिर ओसो गतिहीन मन्ने आंता। हर चीज गतिवान ओसो परिवर्तनशील मंदिता। अदु बेरसिंता ओसो विकसित आंता लेवेके डोलिंता। मावा पूरा वैज्ञानिक ज्ञान इद पोल्लो तुकू सही मानेमांता। भूमि खुद हमेशा बदलेमासोर मंदिता। पिस्वल मंदाना पदार्थकुन बारे ते इत्तेके इद पोल्लो ओसो वेने स्पष्ट मंता। अदिन काजे वास्तविकता ता निज्जमे वैज्ञानिक अध्ययन कियाला काजे माटु इद परिवर्तन

किन सुरता तासना ओसो पदार्थ हमेशाए शाश्वत ओसो अपरिवर्तनशील मंदितांग इंजी समझेमायनायो।

ओसो वास्तविक दुनिया ता इद गुण इचोन स्पष्ट मत्तास्के इदिना बारे ते इचोन चर्चा कियाना बाता जरूरत मंता? सवाल पैदा आंता। इदिना चर्चा कियाना जरूरत बारांकु मंता इत्तेके लोकुर वास्तविक दुनिया ता बारे ते ओसो विशेष रूप ते मानव समाज ता बारे ते लेवेके अलग-अलग महिला-पुरुष ता बारे ते इदु दृष्टिकोण तासोर आंतोर। बोर मानेय मुनाफा काजे आयना उत्पादन मानव समाज ता स्थायी विशेष आयवा इदु उंदी विशेष अवस्था लोप्पा पैदा आत्ता, विकसित आत्ता ओसो इंजी इदु पतन आया मंता इंजी पुन्नोर, ओरू वास्तविक दुनिया किन पोरो वेहता सरल ओसो स्पष्ट मत्ता दृष्टिकोण ते हूडोर आंतोर। असल इत्तेके “बदु मुन्ने मत्ता, अदु नेंडु वेने मंता ओसो हमेशाए मंदियार” इंदाना विचार किन माटु लगभग हर जागा ते सामना कीतोमा ओसो लोकुर ओसो समाज ता विकास लोप्पा अदिना कारण ते हमेशाए वेल्ले बाधांग वांतांग।

हर पदार्थ बदलेमासोर दांता, विकसित आसोर मंदिता, डोलसोर दांता इंदाना पोल्लो किन स्पष्ट रूप ते मानेमातेके ओसो उंदी निष्कर्ष पेसिंता। अदु बद पदार्थ ता संबंध मावा संगे मंतायो अविना बारे ते, अविना विकास बद अवस्था एवनल आत्ता इंदानदु पुंदाना वेल्ले जरूरी मंता। किसान टाली (गाय) अस्सनास्के सुरता तासिंतोर। लोन अस्सानोर वेने इदिना पूरा ध्यान तासिंतोर। असल पिस्वल पिस्सना रोजता मामूली चीज कुना बारे ते इद आम नियम किन बोरे वेने मंगोर। मति गलति ते, मानेय संस्थांग ना, विशेष रूप ते उत्पादन ता व्यवस्था ओसो अदिना संबंधित विचारकुना सवाल तेहिंतोर, अस्के लोकुर इद नियम किन मंगसिंतोर। इद पोल्लो पोरो माटु मुन्ने हंजी विस्तार ते विचार क्रियाकाल, एय्या।

पदार्थ ता उंदी-दूसरा पोरो निर्भर मंदाना ओसो हमेशाए बदलेमासोर मंदाना, वास्तविक दुनिया ता रेंडु स्पष्ट गुण आंदुंगा। वास्तविकता ता बारे ते “द्वन्द्ववादी” दृष्टिकोण ता तीसरा विशेषता वेल्ले स्पष्ट हिल्ले, अदिन काजे उंदी बेरा अदिन वेहतेके इदु बिल्कुले निज्जम आंदु इंजी समझेमायना मुश्किल आयो आयर।

तीसरा विशेषता-पदार्थ ता विकास हमेशाए सरल ओसो हल्कोए आयो आयवा, अदु नड़मा-नड़मा देगिंता ओसो विस्फोट आसी मंता। सरल ओसो हल्कोए विकास वेल्ले दिव्या एवनल ताका परिंता, अद विकास आयनास्के सिर्फ उंदे खास गुण ता मात्रा बेरसोर दायना बदलाव आंता। उदाहरण काजे एर किन हूडमूडांता। एर किन गरम कीतेके वेल्ले टोईम एवनल अदु एर लेक्काने मंदिता, ताना लोप्पा एरद सब्बे साधारण लक्षण मंदानुंग, केवल अदिन गरमी बेरसोरे दायर। अद्रमे एर किन ठंडा कीतेके वेने उंदी टाईम एवनल एर लेक्काने मंदिता मति अदिना गरमी कम आसोर दांता।

मति उंदी निश्चित बिंदु पोरों एवतास्के बदलाव ता क्रम तन्ना-तन्नाए देगिंता। ठंडा लेवेके गरम बिंदु पोरों एवता इत्तेके ने एरद गुण एकदम बदलेमांता। एर, एर लेक्का मन्नो आंता। अदु भाप बने मांता लेवेके बर्फ बनेमांता। वास्तविक दुनिया ता इद गुण रसायन विज्ञान लोप्पा वेशिष रूप ते स्पष्ट मंता, अगा बदे वेने विशेष अंश ता मात्रा लोप्पा बढ़ोत्तरी लेवेके कमी आंता अस्के पदार्थ ता पूरा रूपे बदलेमांता।

मानव समाज लोप्पा उंदी लम्बा कालम एवनल तीरम-तीरम परिवर्तन आसोर मंता ओसो समाज ता रूप लोप्पा बदे बुनियादी बदलाव वायो आंता। अस्के इद क्रम तन्ना-तन्ना बद्रम देगिंता, क्रांति आंता, समाज ता पाइना व्यवस्था नष्ट आंता ओसो उंदी पूना व्यवस्था बनेमांता अनि ताना विकास क्रम शुरू आंता। इद्रमे उत्पादन स्थानीय इस्तेमाल काजे मंदाना सामंती समाज लोप्पा, अतिरिक्त पैदावार किन वम्मना-अस्सना कीतेके, हाटुम लोप्पा वम्मला काजे आयना उत्पादन शुरू आत्ता ओसो अदिनगडल पूंजीवादी उत्पादन ता शुरूआत आत्ता। इदु सब्बे तीरम-तीरमे आयाना विकास ता रूप ते आत्ता। मति उंदी अवस्था लोप्पा पूंजीपति वर्ग सामंती व्यवस्था संगे टक्करे माता, अदु अद अवस्था किन पलटे किसिता ओसो उत्पादन ता पूरा स्वरूप किन बदली किसिता। सामंतावाद ता जागा पूंजीवादी समाज वाता ओसो मुन्नेटुकू बचोनो ज्यादा स्पीड ते विकास आत्ता।

द्वन्द्ववाद ता चौथा विशेषता - इद सार्वभौमिक विकास बारांकु आंता इंजी वेहिंता। पदार्थ ता द्वन्द्वात्मक समझदारी माकिन बदे वेने पदार्थ सरल मन्नो इंजी वेहिंता। बदिनाए उंदी लेक्का रूप मन्नो आंता, हर पदार्थ ता उंदी सकारात्मक

पहलु मंदिता ओसो उंदी नकारात्मक पहलु। हर पदार्थ लोप्पा उचुन गुण विकसित आसोर मंदितांग ओसो दूसरा गुण पोरो दबाव वाटसोर मंदितांग, उचुन गुण खत्म आसोर दांतांग, अविना जोर कम आसोर दांता। उंद गुण हमेशाए बेरसोर दांता, दूसरा गुण इदिना बेरसानादिन रोमी कींता। इव आपसी विरोधी तत्व कुना संघर्ष ताकसोरे मंदिता। इविना लोप्पा उंदी विकास आसोर मत्ता तत्व, दूसरा तत्व ता प्रभुत्व किन नष्ट कियाला काजे संघर्ष कींता। मुन्नेटले दबाव ते मत्ता पूना तत्व ता विकास किन रोमी कियाला काजे संघर्ष कींता। इदु संघर्षे परिवर्तन ता पूरा प्रक्रिया ता सार आंदू, इदिन आखरी परिणाम उंदी विस्फोट लोप्पा मंदिता।

इद पोल्लो सबसे ज्यादा स्पष्ट रूप ते मानव समाज लोप्पा दिसिंता। मानव समाज ता हर एतिहासिक युग लोप्पा समाज वर्ग ता रूप ते बटेमासी मत्ता। ताना लोप्पा उंदी वर्ग विकसित आसोर दांता ओसो दूसरा वर्ग ता जोर घटेमासोर दांता। सामंती समाज लोप्पा इद्रमताए परिस्थिति मत्ता, बारांकु इत्तेके पूंजीवाद ता विजा बेरसोर मत्ता, अनि बेरसना संगे-संगे सामंतवाद संगे ज्यादा से ज्यादा टकरे मासोर मत्ता। पूंजीवादी समाज लोप्पा वेने इद्रम ताए परिस्थिति मत्ता, बारांकु इत्तेके बदिना कैदे “भविष्य” मत्तायो अद्रम ता मजदूर-वर्ग विकास आसोर मत्ता तत्व लेक्का मुन्ने वाता। पूंजीवादी समाज पूरा उंदी लेक्का हिल्व मत्ता। पूंजीपतिर बेरसतेके मजदूर लोर वेने बेरसितोर। इव वर्ग कुना नडमा संघर्ष ताकिंता। इदे संघर्ष तिंची पूंजीवाद इदे “अंतरविरोध” तल ओसो इद वर्ग विभाजन तिंचे पैदा आयना संघर्ष कुना कारण तेने आखरी ते विस्फोट आंता, क्रांति वांता।

इंजे माटु “द्वन्द्वात्मक भौतिकवाद” लोप्पा वायना सब्बे विचारकुन उंदी जागा जमा किया परितोम। इद द्वन्द्वात्मक भौतिकवाद दृष्टिकोण वास्तविकता मना चेतना तुकू अलग मंता इंजी मानेमांता, इद वास्तविकता अलग-अलग आयवा उंदी-दूसरा पोरो आधार आसी मंदिता। इद वास्तविक दुनिया स्थिर मनवा लेवा हमेशाए गतिमान मंदिता ओसो अदिना उचुक तत्व बेरसोरे मंदितांग अनि उचुक मायसोर दांतांग। इदु वास्तविक दुनिया ता विकास उंदी बिंदू एवनल तीरम-तीरम आंता ओसो तन्ना-तन्नाए देगिंता अनि बदि पूना तत्व पैदा आंता।

इदु विकास अंदरूनी संघर्ष ता कारण ते आंता ओसो क्रम-भंग आत्तास्के विकास आयना तत्व, पतन आयना तत्व पोरो जीत हासिल कींता।

मानव समाज संगे दुनिया ता दृष्टिकोणे मार्क्सवाद किन वास्तविकता ता बाकी दृष्टिकोण कुनगडल अलग कींता। बदे डावुट हिल्ला द्वन्द्वात्मक भौतिकवाद वास्तविक दुनिया तुकू पोरो बाताले हिल्ले। अदु बदे अलग ते बने कीता, विचार वाता लेक्का आविष्कार कीता लेक्काट ओसो तीना सांचा लोप्पा दुनिया फिट आयनाए जरूरी मंदाना लेक्काट दृष्टिकोण आयो। इदिना उल्टा, द्वन्द्वात्मक भौतिकवाद, मानेय ना इंजे एवनल ता ज्ञान सो अनुभव तल पेस्ता दुनिया ता समझदारी सबसे सही मंता इंजी वेहिंता। अदु मार्क्सवादी ना दिमाग ते सिर्फ बाहरी जगत ते मत्तांके मंदिता। निज्जमे दुनिया ता वास्तविक “स्वरूप” इद्रमे मंदिता।

विज्ञान ता खोज ओसो पूना आविष्कार ज्यादा से ज्यादा इदे दृष्टिकोण किन सही साबित कींता। वैज्ञानिक द्वन्द्ववादी दृष्टिकोण तल प्रकृति ता अध्ययन किंतोर ओरकिन इद दृष्टिकोण पूना तथ्य कुन हूडला काजे मदद कींता, इदिना सहयता ते ओरु मुन्ने बिल्कुले समझेमायवा पोल्लोंग वेने समझेमाया परितोर। मति मानव समाज विकास ता वर्तमान अवस्था लोप्पा पूरा द्वन्द्वात्मक भौतिकवादी दृष्टिकोण ता सबसे ज्यादा महत्व मानव समाज ता संबंध ते ने मंता।

इद अध्याय लोप्पा मुन्ने हीता उदाहरण कुगडल समाज ता विकास ओसो अदिनगडल पैदा आयना विचार कुना बारे ते, मार्क्सवादी ओसो गैर-मार्क्सवादी दृष्टिकोण ते बातल अंतर मंता इंजी स्पष्ट आंता। दूसरा अध्याय कुना लोप्पा ओसो वेने उदाहरण हीताद मंता। मति, वास्तविकता ता स्वरूप ता सवाल मानेय ना पिस्वल ओसो काम काजे वेल्ले ठोस महत्व मंदिता। अदिन काजे गंभीरता ते अदिना अध्ययन कियाना जरूरी मंता।

माटु पोरो भौतिकवादी दृष्टिकोण इतेके पदार्थ, बाहरी वास्तविकता मुख्य मानेमांतोम ओसो पदार्थ पोरो आधार आसी विकसित आत्ता विचार किन गौण मानेमांतोम इंजी वेहतोम। इदिनगडल मानेय ना शारीरिक अस्तित्व, अस्तित्व आधार आसी मत्ता तरीकांग मुन्ने वांतांग इंदाना निष्कर्ष पेसिंता। दूसरा माटा ते व्यवहार मुन्ने वांता या सिद्धांत पेरके। मानेय मुन्ने पिस्वल दोरकी कींतोर, वेल्ले पेरके ताना बारे ते आल्सना शुरू किंतोर। मति इद विचार वेने मानेय तन्ना कार्य

संबंध तेने विकसित कितोर, इत्तेके सिद्धांत ओसो व्यवहार संगे-संगे ताकतांगा। इदु शुरूआती युग काजेने आयवा सब्बे युग कुना काजे सही मत्ता। मानेय ना विचार कुना आधार ओरा पिस्वल पिस्सना असली तरीका मंदिता। ओरा राजनीतिक विचार वेने इदे आधार तिंची पैदा आंता। ओरा राजनीतिक संस्थांग बदे वडियते मत्ता सिद्धांत कुना पोरो आधार आसी नितसी मन्नोंग आंतांग, अणु उत्पादन ता व्यवस्था ता रक्षा कियाना व्यवहार तिंची बनेमांतांग। हर युग संस्थांग ओसो विचार अद युग ता व्यवहार ता प्रतिबिम्ब मंदितांग। अविना बदे स्वतंत्र इतिहास मन्नो आंता। अणु इद्रम विकसित आयवा उंदी विचार पेरेके दूसरा विचार तन्ना-तन्नाए वायवा लेवा उत्पादन ता भौतिक तरीका बदलेमातास्के ने विचार विकसित आंतांग। पाइना रिवाज ता जागा ते पूना रिवाज वांता, अदिनगल पूना विचार पैदा आंता।

मति पूना संगे पाइना विचार, ओसो संस्थांग वेने नितसी मंदितांग। उत्पादन ता सामंती व्यवस्था तल बद विचार पैदा आंता, बादशाह ओसो प्रभु-वर्ग ता आदर कियाना लेक्काटा विचारकु, वीरा पूंजीवादी ब्रिटेन लोप्पा इंजे एवनल वेने महत्व मंता। इवु उत्पादन ता पूंजीवादी व्यवस्था तिंची विकसित आत्ता विचारकु आंदुंग। उचुक पाइना विचार कुना बदलेमाता रूपकु इत्तेके अमीर लोकुरा सम्मान कियाला लेकड्ठावु। इदे आयवा समाजवादी विचार वेने मंतांग, इवु बुनियादी रूप ते पूंजीवाद लोप्पा उत्पादन ज्यादा से ज्यादा सामाजिक रूप ते कियाना, ज्यादा से ज्यादा सामूहिक आसोर दायना वास्तविकता तले पैदा आतांग, इविना सब्बे अंग उंदी-दूसरा पोरो निर्भर आंतांग। इस्सल ता समाज लोप्पाप इवु मूंडासी रकम ता विचारकु दोरकितांग। इविना लोप्पाटल बदे वेने आखरी ओसो पूर्ण रूप ते सही मानेमयमूंडायोः इविना लोप्पाटल बदे वेने दीर्घकालीन मानेमायमूंडायो।

इत्तेके मार्क्सवाद अविन समान रूप ते अवास्तविक मानेमांता इंजी आयो। इदिना उल्टा, मार्क्सवाद सामंती विचार कुन पूराए पाइना विचार कुना रूप ते हूडिंता, ताना लोप्पा पूंजीवादी विचार पतन आसोर मंदितांग ओसो समाजवादी विचार सही साबित आसोर दांतांग। नवम्बर 1917 तल समाजवादी विचार कुना वास्तविक अनुभव ते आंकलन किया परमूंडांता। इंजे इव अनुभव कुना पोरो आधार आसी विचार वास्तविकता संगे मेल आंतांग इंजी साबित किया

परमूडांता। इदु उत्पादन ता विशाल ओसो जटिल आधुनिक मशीन ता वेने मुनाफा काजे आयवा मानव उपयोग काजे संगठन किया परमूडांता इंदाना मुख्य विचार इंजे कार्य रूप ते सही साबित आत्ता। इद अनुभव, इद्रम कीतेके उत्पादन लोप्पा वेल्ले बढोत्तरी आयार, आर्थिक संकट बंद आयर, लोकुरा पिस्वल-स्तर पोरो तेदसोर दायार इंजी तोहचिता। दूसरा माटा ते समाजवादी विचार, इत्तेके मार्क्स आर्थिक, सामाजिक विकास ता तन्ना अध्ययन तल वाता वैज्ञानिक रूप ते विकसित समाजवादी विचारकु, 1917 एवनल उंदी वैज्ञानिक परिकल्पना बनेमासी मत्तांग. मति इंजे अनुभव अविन किन सही साबित किसिता।

रूसी कम्युनिस्ट पार्टी ता दृष्टिकोण मार्क्सवादी मत्ता। अदिना सचेत कार्रवाई पाडना व्यवस्था किन तेहकसी वाटसिता अनि पूना व्यवस्था ता स्थापना कीता। अस्केने रूसी जनता-तम्मा दृष्टिकोण ते वेल्ले गैर-मार्क्सवादी मत्तोर ओरू पूना व्यवस्था ता अनुभव दोरकी कियालाता, इत्तेके व्यवहार लोप्पा समाजवादी बनेमायालातोर। इदिना पोरो आधार आसी समाजवाद ता सिद्धांतिक समाजवादी ता शिक्षा संबंधित सचेतन काम ता तुरंत फायदा दोरकता, इंजे व्यवहार ओसो शिक्षा कलियसी वेल्ले स्पीड ते पूरा जनता ना दृष्टिकोण बदले किया मंतांग।

इगा मार्क्सवाद दुनिया ता बारे ते तन्ना दृष्टिकोण-द्वन्द्वात्मक भौतिकवाद विज्ञान ता हर क्षेत्र लोप्पा जांचकर्ता लोर किन तथ्य किन हूडला ओसो समझेमायला काजे मदद कींता इंजी ज्यादा वेहो इंजी स्पष्ट किसियाना। ज्ञान दोरकी कियाला काजे हर क्षेत्र ता विशेष अध्ययन किया लागिंता इंजी विवरण हीवो आंता। मार्क्सवाद अलग-अलग तथ्य कुना अध्ययन किसी वेने वैज्ञानिक सच्चाई ता वेल्ले बेहरा भंडार जमा किया परमूडांता इंजी मानेमांता। मति अदु तथ्य कुना अध्ययन अविना आपस ता संबंध कुन, अविना विकास किन, अविना परिमाण तल गुण ते बदलेमायना बदलाव किन, अविना आंतरिक विरोध किन सुरता तासीसि कीतास्के वैज्ञानिक सच्चाई दोरकिंतायो अदु बचोनो ज्यादा मूल्यवान ओसो सही मंता इंजी वेहिंता।

अदु समाजिक विज्ञान काजे वेने सही मंता। अलग-अलग लोकुरा लेवेके विशेष देश ओसो काल ता पूरा समाज ता वेने अध्ययन कितास्के पेस्ता निष्कर्ष कुना सिर्फ सीमित मूल्य मंदिंता। दूसरा लोकुर लेवेके दूसरा समाज पोरो लेवेके

बदे दूसरा काल ता अदे समाज पोरो इव निष्कर्ष किन लागू किया परमूडायो। समाज ता मार्क्सवादी अध्ययन ता विशेष महत्व बारांकु मंता इत्तेके अदु केवल नेटाए समाज बद्रम मंता इंजी हूडवा लेवा अदु मुन्नेटा समाज बद्रम मत्ता ओसो तन्ना अंतरविरोध कुना कारण ते अदु बद दिशा ते दाया मंता इंदाना पोल्लो किन हूडिंता (निश्चित रूप ते इदु जरूरी मंदिता)। इदिनगडल पहली बेरा लोकर किन वास्तविक दुनिया ते ताकसोर मत्ता ऐतिहासिक क्रिया संगे मेल आयना लेक्काटा काम क्रियाना लेक्का मौका दोरकियर लेवेके मार्क्स माटा ते “मावा कोंडा मुन्ने आसोर मत्तावु”, ओसो माटू कोशिश कीतेके हूडा परितोमा इदिन लोप्पाटल माकिन काम काजे मार्ग-दर्शन दोरकिंतांग, इवु बदे वडियते वेलियना सिद्धांत कुनगडल लेवेके बदे पाइना कालम ता बदे स्थिर दृष्टिकोण ता प्रतिनिधित्व कियना समझदारी तिंची दोरकोंग आंतांगा।

अध्याय आठ कार्य-क्षेत्र लोप्पा मार्गदर्शन

मार्क्स तन्ना उंदी शुरूआती रचना लोप्पा रासी मत्तोर - “दार्शनिक लोर संसार ता बारे ते बचानो तरीका ते वेहतोर, मति सवाल इत्तेके इदिन बदले बद्रम कियाना इंजी मंता।” मार्क्स काजे इदु ओना पूरा विश्व दृष्टिकोण ता मूल पोल्लो मत्ता। “मार्क्सवाद” ओना काजे सिर्फ आकडमिक विज्ञान हिल्ला उंदी ज्ञान ता बेहरा भंडार मत्ता, इदिना इस्तेमाल मानेय, दुनिया किन बदले कियाला काजे क्रिया परितोर।

केवल पूंजीवाद उंदी बदलेमासोर मत्ता अवस्था आंदू, ताना पेरके समाजवाद ता जरूर वांता इंजी पुंदानदे हालोए। इद काम तन्ना-तन्नाए केवल आर्थिक परिवर्तन ता कारण ते आयो इंजी वेने स्पष्ट मंदिता। बचोन आर्थिक संकट वातेकाई पूंजीवाद पोरो बचोन मुश्किल वातेकाई, पूंजीवाद तन्ना-तन्नाए 32 डिगरी (फारेनहाइट) एवनल तापमान कम आत्ता पेरके एर बर्फ बने मायना लेक्का, समाजवादी लोप्पा बदलेमायो आंता। मानेय ना व्यवहार तिंचिए उत्पादन ता उंदी व्यवस्था दूसरी व्यवस्था लोप्पा बदलेमांता। मार्क्सवाद, वैज्ञानिक समाजवाद मानेयकुना अनुभव तल निष्कर्ष तेंडिसी ज्ञान पुष्टिकिता, अदे ज्ञान मानेय ना व्यवहार किन इद दिशा बगिल दायला मार्गदर्शन ता काम कींता।

समाज किन बदले कियाला काजे साधारण रूप ते बद्रम ता काम ता जरूरत मंता इंजी दूसरा अध्याय लोप्पा वेहत्ताद मंता। इद काम काजे वर्ग-संघर्ष, वर्तमान अवस्था लोप्पा पूंजीपति-वर्ग ता खिलाफ मजदूर-वर्ग संघर्ष ता जरूरत मंदिता। मति इदिन ठोस सिद्धांत किन विस्तार ते समझेमायला काजे ठोस अनुभव कुना अध्ययन क्रिया लागियर। अविन विभिन्न

अवस्थांग लोप्पा ओसो विभन्न देशकुना परिस्थितिंग ने लागू कियाना लागियर।

मार्क्स लगातार इद समस्या पोरो काम किसोर मत्तोर। पोरो-पोरो आयवा अदिना कालम ते घटेमासोर मंदाना घटनांग ना अध्ययन किसी ओसो तन्ना राय ते सब्बे मुन्ने वायना काम निर्भर आसी मंदाना विभिन्न तरीका ता मजदूर संगठन कुना निर्माण लोप्पा मदद किसी अध्ययन कित्तोर। 1848 ता कम्युनिस्ट घोषणा पत्र कम्युनिस्ट लीग ता घोषणापत्र मत्ता। मार्क्स बचोनो सालकु इद संगठन लोप्पा सक्रिय रूप ते शामिल मत्तोर। “अन्तरराष्ट्रीय मजदूर संघ” इंजे प्रथम अंतरराष्ट्रीय संघ इंजी मंता, मार्क्स ना कोशिश संगेने 1864 ते स्थापना आसी मत्ता। मार्क्स तन्ना कालम ता ब्रिटिश मजदूर आंदोलन तल ओसो दूसरा देशकुना मजदूर वर्ग ता आंदोलन कुना संगे सम्पर्क ते तासानोर।

अस्के मजदूर यूनियनकु ओसो सहयोग समीतिंग लोप्पा वेने मजदूर वर्ग ता उचुने हिस्सा संगठित मत्ता। बदे वेने देश लोप्पा प्रभावशाली लेवेके बेस ताकत मंदना मजदूर वर्ग ता पार्टी हिल्ला मत्ता। ज्यादातर देशकुना लोप्पा मजदूर वर्ग वेने इंजे पूरा बनेमाताद हिल्ला मत्ता। ब्रिटेन तुकू बाहर पूंजीवादी उद्योग इंजे शुरूआत ता अवस्था ते मत्ता, वेल्ले देश कुना लोप्पा मोडियसोर मत्ता पूंजीपति वर्ग इंजे सामंती वर्ग ओसो अदिन अवशेष कुना खिलाफ संघर्ष किसोरेने मत्ता। 1848 ते यूरोप लोप्पा क्रांतिंग शुरू आत्तास्के मार्क्स ओसो समाजवादी सहयोगिरा संबंध निरंकुशता-विरोधी संघर्ष संगे मत्ता। एंगेल्स जर्मन लोप्पा जनवादी सेना ते शामिल आसी प्रशा ता बादशाह ना फौज कुना संगे टक्करे मातोर।

मति समाजवाद ओसो अदिन स्थापना कियाना मजदूर क्रांति ता जरूरत पोरो जोर हीसी मत्ता कम्युनिस्ट घोषणापत्र 1848 ता शुरू तेने छपेमासी मत्ता। बोरू मार्क्सवाद किन कट्टरवादी लेक्का हूडितोर, ओरा काजे मजदूर क्रांति ता सिद्धांत किन मानेमायनोर, पूंजीपतिर ओसो निम्न

पूजीपतिर, मध्यम वर्ग ता लोकुरा नेतृत्व ते ताकना जनवादी संघर्ष कुना लोप्पा बद्रम शामिल आयार परितोर इंजी समझमायना मुश्किल आयार।

इद संघर्ष ता उद्देश्य समाजवाद आयवा मोडियसोर मत्ता पूंजिपति वर्ग ता तत्काल फायदा एता परना इंजी बद्रमाई पार्लिमेंटरी लोकतंत्र ता स्थापना कियाना मंदिता। मति मार्क्स ना मुन्ने इदु सवाल स्पष्ट मत्ता। ऐतिहासिक क्रम ता इत्तेके मजदूर वर्ग इतिहास किन मुन्ने ओयला काजे केवल जनता ना दूसरा हिस्सांग संगे कलियसी मुन्ने हंजोर मत्ता हर्दे ताकसिए मदद किया परितो। मजदूर वर्ग रणनीति ता तात्कालिक लक्ष्य सामंती परिस्थितिंग पोरो आधार आसी मत्ता निरंकुश राजशाही किन नष्ट कियाना मत्ता। इदिनकु मुन्ने संघर्ष लोप्पा बचोन ज्यादा सफलता दोरकियार, अचोने जल्दी संघर्ष दूसरा मंजिल ते दायार।

ब्रिटेन लोप्पा अस्के मजदूर यूनियकु ओसो सहकार समितिंग वेल्ले बनेमासी मत्तांग, मति मजदूर वर्ग ता बदे राजनीतिक पार्टी हिल्ला मत्ता। समाजवादीर सुडला-सुडला दल ते मत्तोर, मति आम मजदूर इंजे एवनल रेडिकल (पूजीवादी उग्रवाद ताए उंदी हिस्सा) संगे संबद्ध मत्तोर। अदिन काजे तात्कालिक उद्देश्य पूजीवादी पार्टींग नगडल अलग कियाना लेक्काटा मजदूर-वर्ग ता पार्टी बने कियाना मत्ता।

हत्ता शताब्दी खत्म आसोर मंदानास्के यूरोप ता बचोनो देशकुना लोप्पा मजदूर वर्ग ता राजनीतिक पार्टींग बनेमासी मत्तांग। अविना प्रतिनिधि पार्लिमेंट कुना लोप्पा वेने एवसी मत्तोर। ब्रिटेन लोप्पा वेने पूना शताब्दी ता शुरूआत ते लेबर पार्टी ता स्थापना आत्ता, मति इदिना नेतालोरा दृष्टिकोण समाजवादी कम ओसो रेडिकलवादी ज्यादा मत्ता।

वर्तमान शताब्दी ता शुरू ते पूजीवाद (चौथा अध्याय लोप्पा वेहत्ताद मंता) समाजवादी अवस्था ते एवसी मत्ता ओसो “युद्ध अनि क्रांतिंग ना युग” शुरू आसी मत्ता अस्के मार्क्स-एंगेल्स ता पिस्वल कालम ता तुलना ते बचोनो ज्यादा विशद रूप ते मजदूर वर्ग ता रणनीति ओसो कार्यनीति

किन स्पष्ट ओसो विकसित किया लागता। साम्राज्यवाद ता युग लोप्पा मार्क्सवादी किन लागू कियाना काम किन लेनिन पूरा कितोर।

इद युग ते लेनिन वेहतोर- मजदूर वर्ग ता काम पाड़ना राजनीतिक पार्टी संगे इत्तेके सिर्फ पार्लामेंटरी लोप्पा लेवेके प्रचार ता कियाना पार्टी संगे ताको इंजी। इंजे सवाल पूंजीवाद किन मायहानदु मत्ता। अदिना काजे उंदी पार्लायमेंट लोप्पा काम कियाना संगेने कारखाना लोप्पा ओसो सड़क पोरो वेने संघर्ष ताकी कियाना लेक्काटा पूना रकम ता पार्टी ता जरूरत मत्ता। इदिना उद्देश्य पूंजीवाद किन तेहकसी वाटना ओसो समाजवाद ता स्थापना कियाना संघर्ष लोप्पा मजदूर वर्ग ता नेतृत्व कियाना मंदिता।

बद वर्ग बदे पाड़ना शासक वर्ग ता सत्ता पलटे कींता अदिन जनता ना बाकी हिस्सांग किन वेने तन्ना संगे तन्ना कार्य-क्षेत्र लोप्पा तत्ता लागिंता इंदाना पोल्लो पोरो मार्क्स बार-बार जोर वाटतोर। मजदूर वर्ग जीरो (शून्य) मन्नो आंता। अद उंदी वेल्ले ठोस ओसो वास्तविक दूनिया लोप्पा नालुंग बगिल मत्ता घेराव लोप्पा मंता, ताना लोप्पा बचोनो वर्ग ओसो वर्ग कुना विभिन्न स्तर ता लोकर मंतोर, अविना रूप कु देश ओसो काल ता अनुसार अलग-अलग मंदितांग। पूना तरीका ता मजदूर वर्ग ता पार्टी किन तन्ना रणनीति बने कियाला काजे अद कालम ते अदिना देश लोप्पा सामाजिक प्रगति किन रोमी कियान मुख्य ताकत कुना खिलाफ जनता मना बाकी हिस्सांग किन बद्रम उंदी संयुक्त संघर्ष लोप्पा तत्ताना जरूरी मत्ता।

उदाहरण तुकू मार्च 1917 एवनल जारशाही रूस किन हूड़ाटू। रूसी मजदूर वर्ग अद कालम ते वेल्ले कम संख्या ते ओसो नालुंग बगिल किसान लोरा घेराव ते अरसी मत्ता। किसान निरंकुश जारशाही ना विरोधी मत्तोर ओसो ओरकिन जमीन ता जरूरत मत्ता। अदिन काजे लेनिन ना नेतृत्व ते ताकना रूसी सोशल डेमोक्रेटिक (सामाजिक जनवादी) पार्टी ता बोलशेविक (बहुसंख्यक) हिस्सा काजे अदु परताचोन पूरा किसान वर्ग किन मजदूर वर्ग संगे उंदी संयुक्त मोर्चा ते तत्ता, बारांकु इत्तेके धनी किसान कम मत्तोर ओसो बाकी सब्बे गरीब किसान मत्तोर। मजदूर ओसो कास

लोरा संयुक्त शक्ति, मार्च 1917 ते जार ता सत्ता किन पलटे कियाला सफलता दोरकी कीता, सामाजिक विकास ता मुख्य दुश्मन हारे मात्तोर। मति जार ना पतन पेरके उंदी अस्थाई सरकार ता स्थापना आत्ता, इदु पूंजीपतिरा हितकुना प्रतिनिधित्व कियानदु। इंजे सामाजिक विकास ता मुख्य दुश्मन पूंजीपति वर्ग मंता। मति किसान लोरा लोप्पा सब्बे तोर पूंजीपति वर्ग किन तन्ना दुश्मन मानेमायोरा। इदिना उल्टा धनी किसान, इत्तेके मेहनत कियानोर, व्यापार कियानोर ओसो सट्टेबाजी कियानोर, इद सरकार किन तम्मा सरकार लेक्का मानेमायनोर। अदिना काजे इद अवस्था ते मजदूर वर्ग पूरा किसान-वर्ग संगे संयुक्त मोर्चा बने किया परवो आत्ता, इंजे केवल गरीब किसान ओसो भूमिहीन खेत मजदूर लोरा संगे ने मोर्चा बने कियाना संभव मत्ता। 1917 ता नवम्बर क्रांति किन इदे मोर्चा शहर ओसो नाहकु लोप्पा सफल बने कींता। मति मुन्नेटा ज्यादा व्यापक मोर्चा हिल्ला मत्तेके मार्च लोप्पा जार किन पलटे कियाना असंभव आसी मनवड अनि नवम्बर क्रांति काजे आवश्यक परिस्थिति बस्केने तैयार आया परवो आसी मनवड।

मुख्य दुश्मन ना खिलाफ जनता ना दूसरा हिस्सांग संगे मजदूर वर्ग ता संयुक्त मोर्चा बने कियाना सिद्धांत किन लेनिन रूसी परिस्थितिगं लोप्पा कार्य रूप ते विकसित कीसी मत्तोर। मजदूर आंदोलन ता मार्ग-दर्शन ता रूप ते मार्क्सवाद किन विकसित कियाला काजे इद सिद्धांत वेल्ले महत्वपूर्ण काम कीता।

पूंजीवाद ता खिलाफ लगातार ओसो डटेमासी लडेमायाना वर्ग सिर्फ मजदूर वर्गे मंदिता। पूंजीवाद ता विस्तार संगे-संगे इग वर्ग वेने बेरसिंता। पूंजीपति वर्ग सीधा ओरा शोषण कींता। दूसरा बगिल, किसान लोरा सीधा संघर्ष जर्मीदार लोरा संगे मंता ओसो बद्रम-बद्रम पूंजीवाद फैलेमासोर दांता, अद्रम-अद्रम किसान लोरा वर्ग छिन्न-भिन्न आसोर दांता। गरीब किसान मजदूरी कियाना (खेत-मजदूर लेक्का) मजबूर आंतोर। धनी किसान, खुद पूंजीपति बनेमांतोर ओसो मजदूर लोर किन नौकर तासिंतोर। अदिन

काजे पूंजीपति वर्ग ता खिलाफ संयुक्त मोर्चा बने क्रियाला काजे इद मोर्चा ता मोर्कुल, इदिना नेता मजदूर वर्ग मंदाना जरूरी मंता। मति मोर्चा जरूरत मजदूर-वर्ग किने मंता। मोर्चा ता जरूरत ज्यादा बारांकु मंता इत्तेके अदु पूंजीपति वर्ग संगे संघर्ष कींता अस्के दूसरा वर्ग लेवेके मजदूर वर्ग ता बगिल ओल्लिंता लेवेक पूंजीपतिरा बगिला बदे वेने वर्ग-समूह किन मजदूर वर्ग संगे तत्तना इत्तेके पूंजीपतिर किन ओर मदद दोरको इंजी आंता।

पूंजीवाद ता एकाधिकारी अवस्था लोप्पा आर्थिक (राजनैतिक) शक्ति दिव्या-दिव्या तुकू मुट्टोमेंड लोकुरा कैदे दांता। अदिन काजे इद अवस्था लोप्पा मुख्य दुश्मन ता खिलाफ मजदूर ओसो दूसरा वर्ग कुना विशाल मोर्चा बने क्रियाना ओसो वेने हल्को आंता। पूंजीपति वर्ग लोप्पा हमेसाए उचुन मुल ज्यादा धनी ओसो उचुन मुल कम धनी मंदिंतोर। मति विश्वव्यापी एकाधिकारी कम्पनिंग ना युग ते ज्यादातर सुडला पूंजीपतिर ओसो एकाधिकारी पूंजीपतिरा नडमा ता गुमिया वेल्ले बेहरा आसोर दांता। एकाधिकार पूंजीपतिर उद्योग-धंधा ओसो व्यापाक ओरा मुट्टा ते मंदाना, शोषण क्रियाला काजे पूना इलाका दोरकना इंजी कोशिश कींतोर। दूसरा देशकु तम्मा पोटी आसोरे मंदानोर संगे (हाटुम तूसना ओसो कीमत तय क्रियाना समझौतांग कींतोर, हिल्वेके टैक्स ओसो चुंगी वार्तिंतोर अनि खुल्लमखुल्ला युद्ध शुरू कीसिंतोर) संघर्ष कींतोर। इव पोल्लोंग लोप्पा ओरा हितकु सुडला पूंजीपतिर ओसो सुडला दुकानदार लोरा हितकु टकरेमांतांग। सुडला पूंजीपतिर, एकाधिकार पूंजीपतिर ओरा गुडंगा पोया मंतोर ओरकिन तम्मा पिस्वल पिस्सला हीवोर इंजी आल्सिंतोर। उंदी पेरके दूसरा सवाल पैदा आंता। ओसो अलग-अलग ओसो व्यक्तिगत रूप ते, पेरके पूरा समूह ता रूप ते सुडला दुकानदार ओसो सुडला पूंजीपति एकाधिकारि किन तम्मा मुख्य दुश्मन मानेमांतोर।

इगा विरोध केवल आर्थिक कारण तेने आंता इंजी समझेमायना जरूरी मंता। आर्थिक एकाधिकार, मजदूर वर्ग कीने मंता, औपनिवेशिक जनता ओसो सुडला पूंजीपतिरा पोरो हमला कींता, तन्ना देश लोप्पा ओसो

विदेश ते प्रतिक्रियावादी नीतिंग लागू कींता। सुडला पूंजीपति ओसो मध्य वर्ग ता लोकुर विभिन्न पेशांग सदस्य ओसो ज्यादातर बुद्धिजीविर, शुरूआत ता पूंजीवादी काल ता उदारवादी ओसो जनवादी परम्परांग लोप्पा पिस्ससोर वातोर। एकाधिकारी पूंजीपति इव परम्परांग ना उल्लंघन कींतोर, अस्के वीर सब्बे स्तर कुना लोकुर ओरा खिलाफ आंतोर। उचुन देशकुना लोप्पा एकाधिकारी पूंजीपति, खुल्ला, निरंकुश फासीवादी तानाशाही ता स्थापना कींतोर, सब्बे जनवादी संगठनकु ओसो संस्थांग किन नष्ट कींतोर ओसो मानवतावाद ता सिद्धांत ता अवहेलना कियाना शुरू कींतोर अस्के इद विरोध ओसो वेने मजबूत आंता।

इद परिस्थिति ते विभिन्न वर्ग कुना लोकुर फासीवाद किन शांति ओसो सामाजिक विकास ता मुख्य दुश्मन समझेमांतोर अस्के मजदूर वर्ग ओसो मध्यम वर्ग ता लोकुरा हित उंदी आंता ओसो फासीवाद खिलाफ उंदी विशाल संयुक्त मोर्चा “जन मोर्चा” बनेमायना संभव आंता।

असली संयुक्त मोर्चा केवल मजदूर लोरा हित जनता ना बाकी हिस्सांग ना हितकुना संगे कलियसी मंदाना अस्के आंता। संयुक्त मोर्चा बने कियाला काजे मजदूर लेवेके ओरा सहयाक वर्ग तम्मा विशेष हितकुन त्याग कियाना लेवेके तम्मा सहयोगिर किन अंधविश्वास ते तासना ओसो तम्मा असली उद्देश्य किन मकी कीसी तासना जरूरी हिल्ले। इद्रम कियाना फासीवाद ता तरीका मंदिता। वर्ग कुना संयुक्त मोर्चा ता मूल तत्व उचुन कालम काजे ओसो उंदी विशेष परिस्थिति लोप्पा मोर्चा ते शामिल मंदाना सब्बे लोकुरा हित उंदी मंदानादु मंता। इदे पोल्लो 1936 ते स्पेन ता मजदूर, किसान, मध्यम वर्ग, निम्न पूंजीपतिर ओसो राष्ट्रवादी दल किन जनरल फ्रांको ना समर्थक बडे जमींदार ओसो सावकार, विदेशी आक्रमणकरिरा खिलाफ उंदी संयुक्त मोर्चा ते दोहता।

व्यापक ओसो विशाल संयुक्त मोर्चा केवल फासीवाद ता खिलाफ बने कियाना आंता इंजी समझेमायना वेने गलत आंता। इतिहास लोप्पा इदिना बचोनो उदाहरणकु मंतांगः देश किन गुलाम बनायेकियानोरा

खिलाफ लेवेके हमला कियोरा खिलाफ जनता ना लगभग सब्बे हिस्सांग “राष्ट्रीय मोर्चा” बने कीतांग। दूसरा विश्वयुद्ध लोप्पा वेने इद्रमे आत्ता। विदेशी साम्राज्यवादी शासन तल मुक्ति दोरकी कियाला काजे औपनिवेशिक जनता हमेशाए “राष्ट्रीय मोर्चा” बने कीतांग। मुद्रमेंड बड़े जमींदार, सावकार ओसो बड़े पूंजीपतिर विडचसी विदेशी साम्राज्यवादिर मदद ते जनता पोरो शोषण जारी तासना कोशिश कींतोर अस्के वेने इद संघर्ष जनता ना हित तेने मंदिता। शुरू ते राष्ट्रीय स्वतंत्रता ता आंदोलन कुना नेतृत्व मोडिसोर मत्ता पूंजीपतिर कींतोर। मति औपनिवेशिक देश लोप्पा पूंजीवाद ता विकास आत्तास्के ओसो विदेशी साम्राज्यवादिरा कार्रवाईंग ना कारण ते उंदी मजदूर वर्ग वेने पैदा आंता। अदिना संख्या ओसो संगठन बद्रम बेरसिंता अद्रमे अदु मुन्ने हंजी स्वतंत्रता संग्राम ता नेतृत्व ते ज्यादा हिस्सा एतिंता। मार्क्सवादी पार्टिंग बनेमातेके इद प्रक्रिया तुकू मदद दोरकिंता। संगेने स्वतंत्रता आंदोलन लोप्पा शामिल आयना पूंजीपतिरा उंदी हिस्सा उचुन दिया पेरके साम्राज्यवादिरा संगे सौदा कींता अनि जनता खिलाफ ओरा समर्थन कींता। अद्रमासी स्वतंत्रता आंदोलन लोप्पा मजदूर वर्ग ता महत्व ओसो जोर वेने स्पीड ते बेरसिंता।

चीन ता उदाहरण तल इद पोल्लो समझेमायार। 1911 ते विदेशी साम्राज्यवाद मदद कीसोर मत्ता पाड़ना सांमती शासक लोरा खिलाफ “पूंजीवादी” क्रांति उंदी निश्चयात्मक मोड़ ते एवसी मत्ता। बीसवीं शताब्दी ता दूसरा दशक ता शुरू ते चीन ता औपनिवेशिक शहर ओसो एर जहाज कुना अड्डांग लोप्पा मजदूर वर्ग ता संख्या ओसो संगठन वेल्ले बेरसिस मत्ता। 1922 ते कम्युनिस्ट पार्टी ता स्थापना आत्ता। इद पूरा काल ते राष्ट्रीय स्वतंत्रता आंदोलन ता मुख्य ताक क्वोमिंगतांग पार्टी मत्ता, अदिन स्थापना सुनयात-सेन 1912 ते किसी मत्तोर। मति इंजे विदेशी साम्राज्यवादीरा संगे सबसे मुन्ने हंजी टक्कर हियाना लेक्का ताकतवर मजदूर वर्ग बनेमाया मंता। अदु 1924-1925 ओसो 1926 ते मुख्य औद्योगिक केंद्र लोप्पा बेहरा-बेहरा हड़तालकु ओसो प्रदर्शन कीता। 1925 ते सुनयात-सेन डोलता पेरके

मजदूर वर्ग ओसो कम्युनिस्ट पार्टी ता पूरा समर्थन मत्ता क्वोमिंगतांग ता सेनांग कैन्टन तल उत्तर बगिल हत्तांग। अविन कार्यक्रम चीन किन उंदी कियाना ओसो सामाजिक सुधार कियाना मत्ता। मति अप्रैल 1927 ते क्वोमिंगतांग ता सेनांग ना सैनिक नेता च्यांग काई-शेक विदेशी साम्राज्यवादीरा संगे समझौता कितोर, अनि कम्युनिस्ट पार्टी ओसो मजदूर वर्ग ता खिलाफ हत्तोर। अस्के चीन ता राष्ट्रीय स्वतंत्रता आंदोलन ता नेतृत्व क्वोमिंगतांग आयवा कम्युनिस्ट पार्टी किसोर मत्ता, अद्रमासी जापानी आक्रमणकारिरा मुकाबला कियाला काजे ओसो उंदी बेरा संयुक्त राष्ट्रीय मोर्चा बनेमाता।

मुख्य दुश्मन ता खिलाफ जनता ना दूसरा हिस्सांग संगे मजदूर वर्ग ता संयुक्त मोर्चा बने कियाना सिद्धांत मार्क्स वेहची मत्तोर। लेनिन इदिन विकसित कितोर। पूंजीवादी ओसो औपनिवेशिक, अर्ध-औपनिवेशिक देशकिना संघर्ष कुना वास्तविक अनुभव तले इद सिद्धांत किन तेंडसी मत्तोर। असल इत्तेके सब्बे मार्क्सवादी सिद्धांतकु वास्तविक अनुभव तिंचिए पेस्तांग अनि दूसरा सब्बे वैज्ञानिक सिद्धांत कुनाए लेक्का मुन्नेटा अनुभव तल अविना विकास लेवेके संशोधन आसोर मर्दियार। दूसरा विश्वयुद्ध ताकनास्के विशेष रूप ते युद्ध खत्म आत्तास्के वेल्ले देशकु पूना अनुभव दोरकी कींतांग। अविनगडल समाजवाद स्थापना कियाना लडाई लोप्पा मजदूर वर्ग ता रणनीति ओसो तम्मा काजे (दूसरा वर्ग कुना) सहायता दोरकी कियाना सिद्धांत लोप्पा पूना ओसो वेल्ले महत्वपूर्ण विकास आतांग।

लडाई ताकनास्के यूरोप बव देश कुना पोरो जर्मन नात्सी साम्राज्यवादिर कब्जा तास्तोर, अव देश कुना उंदी अवस्था वातास्के राष्ट्रीय प्रतिरोध आंदोलन तेदातांग। इव आंदोलनकुना लोपा उचुन मूल देशद्रोहिर लेवेके “गद्दार” लोर किन विडचसी जनता ना सब्बे हिस्सांग शामिल आतांग। मति ओरा ताकत ता मुख्य आधार मजदूर-वर्ग मत्ता ओसो कम्युनिस्ट पार्टी अदिन नेतृत्व कीसोर मत्ता। देशद्रोहीरा लोप्पा मुख्य

बड़े जमींदार ओसो पूंजीपतिर मत्तोर। वीरे तम्मा विशेषाधिकार ओसो मुनाफा किन बचे कियाला काजे नात्सी लोरा संगे समझौता कित्तोर। दूसरा बगिल ज्यादातर निम्न पूंजीपति ओसो मध्यम वर्ग नात्सी शासन खिलाफ ओसो तम्मा देश किन मुक्त कियाला काजे मजदूर वर्ग ओसो किसान लोरा समर्थन कियालासी मत्तोर।

युद्ध लोप्पा नात्सिरा फौज हारेमातांकु ज्यादातर देशकु स्वतंत्र आतांकु हर देश लोप्पा इद विशाल राष्ट्रीय मोर्चा मजदूर वर्ग ता पार्टिंग, कम्युनिस्ट ओसो सोशलिस्ट पार्टिंग ना ताकत मत्ता अस्थाई सरकार कुना स्थापना ता आधार बनेमाता। स्थानीय लेवल ते विशाल संयुक्त कमेटींग बनेमातांग, इविना आधार राष्ट्रीय मोर्चाए मत्ता, मति मेहनतकश जनताना ज्यादा गर्रे मत्तांग। इविनगडल वेने मजदूर वर्ग ता प्रभाव मजबूत आत्ता अनि पाड़ना बड़े जमींदार ओसो पूंजीपतिरा स्थानीय प्रभाव वेल्ले नष्ट आत्ता। इव सब्बे ना कारण ते इव सरकारकुना कार्यक्रम साधारण रूप ते वेल्ले प्रगतिशील मत्तांग। पूर्वी यूरोप ते बेहरा-बेहरा जमींदार लोरा जागीर कुन ऊंदसी ओरा जमीनकिन ऊंदसी किसान लोप्पा तूसना, स्थानीय, राष्ट्रीय स्तर ते जनवादी शासन ता स्थापना कियाना वेने सरकारी कार्यक्रम लोप्पा शामिल मत्ता। पूर्वी यूरोप ता देश कुना लोप्पा “जनवादी लोकतंत्र” ता इदु पहली मंजिल मत्ता।

इव देश कुना कम्युनिस्ट पार्टिंग इद पूना तरीका ता सरकार ओसो राजसत्ता किन विकसित किसी, पूंजीवाद किन खत्म किसी समाजवाद स्थापना कियाना हथियार ता रूप ते इस्तेमाल कियाना आंता इंजी हूडतांग। इव देश कुना लोप्पा उंदी बगिल पूंजीवादी ओसो किसान पार्टिंग ना ओसो सोशलिस्ट पार्टिंग ना नेता बुनियादी सामाजिक परिवर्तन कुना पूना विचार कीवोर आयानोर। ओरू जनता ना दबाव ते वासी सरकार कुना शुरूआती कार्यक्रम किन मानेमाया लागता इंजी आल्सानोर, अदु अद्रमे रोममी कियाना इंजी वेहानोर। दूसरा बगिल शहर, ग्रामीण ता मेहनतकश जनता फासीवाद ओसो तन्ना पाड़ना शासक वर्ग पोरो जीत दोरकी कीतांकु

गिर्दाते मत्ता। इदिन पहली बेरा पूर्ण रूप राजनीतिक अधिकार दोरकी किसी मत्ता। अदे मोर्चा ता दूसरा पार्टिंग ना समर्थक मत्तेकाई कम्युनिस्ट पार्टी जोर हीसोरे मत्ता मौलिक ओसो बेहरा सुधार कुना पूरू समर्थन कियानदु।

इद्रमे, संयुक्त मोर्चा लोप्पा शामिल दूसरा पार्टिंग ना नेतालोरा तम्मा पार्टिंग ना समर्थक मेहनतकश जनता लोप्पाटल प्रभाव कम आसोर हत्ता। अस्के ओरू तम्मा देश तुकू बाहर तल साहारा परहकतोर। अमेरिका, ब्रिटेन ता सैनिक, कूटनीतिक प्रतिनिधिरा संगे कलियसी षड्यंत्र, साजिशकु कित्तोर। इव षड्यंत्र कुना उद्देश्य पाड़ना व्यवस्था किन ओसो उंदी बेरा स्थापना कियाना सो देश किन समाजवाद बगिल दायाना तुकू रोमी कियाना मत्ता। इव षड्यंत्र कुना पर्दाफाश आत्तास्के वेल्ले नेतालोरा तम्मा पार्टिंग ना सदस्य लोरा पोरोटल वेने मेयता असर हत्ता। सदस्य लोर पूना नेता चुने कित्तोर, ओरू सब्बे मेहनतकश लोकुरा हित ते कम्युनिस्ट पार्टी पेश कीता प्रस्ताव कुना पूर्ण रूप ते समर्थन कियानोर। इदु जनवादी लोकतंत्र ता विकास ता उंदी पूना मंजिल मत्ता। इदिनगडल समाजवाद ता निर्माण आयना शुरू आत्ता। सोशल डेमोक्रेटिक पार्टी कम्युनिस्ट ते शामिल आत्ता। इद्रमे मजदूर वर्ग ता संयुक्तम मार्क्सवादी पार्टी बनेमाता, अदिन दूसरा पार्टिंग ना पूर्ण समर्थन दोरकता, बारांकु इत्तेके इवु दूसरा पार्टिंग वेने इंजे केवल मेहनतकश जनता ना हितकुनाए प्रतिनिधित्व कियानवु। जनता ना व्यापक बहुमत ता समर्थन पोरो आधार आसी आम सभा बचोनो उद्योग-धंधा ओसो व्यापार कुन राज्य तन्ना कैदे पोय्याना लेक्काटा कानून पास किता अनि उंदी योजना पोरो आधार सी आर्थिक व्यवस्था ता गठन आयाना शुरू आत्ता। सामूहिक खेती ता शुरूआत आत्ता। शासन व्यवस्था लोप्पा बचोनो सुधार आतांग, इविना लोप्पा सेना, सरकारी मशीन ओसो राष्ट्रीय उद्योग, व्यापार लोप्पा प्रमुख पद कुना पोरोटल पूंजीवादी समर्थक लोर किन गुच्ची किसी, ओरा जागा ते समाजवाद ता समर्थक लोर किन चुने क्रिया आत्ता। अद्रमे ज्यादातर जनता काजे सही लोकतंत्र मंता मति माटू हेय्युंगासी अध्याय कुना लोप्पा वेहता लेक्का अदु जनता ना विरोधिर किन ओसो तोड़-फोड़ कियानोरा काजे अधिनायकशाही शासन ता वेने काम कियाना मजदूर वर्ग ता शासन सशस्त्र संघर्ष लेवाए पूर्ण रूप ते स्थापना आत्ता। पाड़ना शासक वर्ग इव देश कुनालोप्पा वेने विदेशी साम्राज्यवाद ता मदद ते विकास किन रोमी कियाना

ओसो नष्ट कियाना पूरा कोशिश किया मंता। विकास ता हर कदम इव कोशिश कुन नाकाम किसी मुन्ने दाया मंता, मति रूस ता सोवियत क्रांति लेक्का इव देशकुना लोप्पा वेने मजदूर- वर्ग ता शासन स्थापना कियाला काजे हथियारबंद लड़ाई ता जरूरत आयो आत्ता।

जनवादी लोकतंत्र संगे समाजवाद एवनल एव्वना संभव आत्ता इत्तेके इदु समाजवादी सोवियत संघ ता सहायता तेने आत्ता। नात्सी सेनांग किन सोवियत सेना ओसो हर देश ता राष्ट्रीय स्वतंत्रता आंदोलन गुंडा कीतासंके स्वतंत्रता आंदोलन संगे स्थापना आत्ता अस्थाई सरकार तन्ना कार्यक्रम किन अमल कियाला सफल आत्ता, साम्राज्यवादीर इदिना लोप्पा तुड़बुड़ किया परवो आतोर। सोवियत सरकार किन शुरुआती दिव्याने बद्रम ता साम्राज्यवादी तुड़बुड़ ता सामना किया लागता अदिना तिप्पल इव अस्थाई सरकार कुन वायो आत्ता। सोवियत सरकार अस्के वर्राए मत्ता, दूश्मन ता घेराव ते मत्ता, वर्राए समाजवाद ती निर्माण किया लागता। इदिना उल्टा जनवादी लोकतंत्र, बाहरी सशस्त्र तुड़बुड़ तल सुरक्षित मत्तांग। सोवियत संघ तल अविन तिंदान-उंडाना सामान ओसो मशीन कुना मदद दोरकानदु। इदे आयवा सोवियत संघ आर्थिक, राजनीतिक, सामाजिक समस्यांग किन समाजवादी तरीका ते हल कियानास्के दोरकी कीता अनुभव कुना भंडार वेने मत्ता।

इव जनवादी लोकतंत्र लेक्का विकास, दूसरा विश्वयुद्ध पेरके जापानीरा हार आत्ता पेरके चीन लोप्पा आत्ता। लड़ाई ता कालम ते जापानीरा खिलाफ राष्ट्रीय एकता काजे कम्युनिस्ट लोरा अपील ता कारण ते च्यांग काई-शेक ओसो उत्तर-पश्चिम चीन लोप्पा मत्ता कम्युनिस्ट सरकार नडमा सशस्त्र संघर्ष रोमी कियाना समझौता आता। मति लड़ाई खत्म आत्तास्के च्यांग-काई-शेक चीन लोप्पा संयुक्त जनवादी सरकार बने कियाना कम्युनिस्ट पार्टी ता कोशिश ता विरोध कित्तोर। अनि अमेरिका सरकार ता हीता फौज ओसो आर्थिक मदद ते कम्युनिस्ट सरकार खिलाफ हथियारबंद लड़ाई ओसो उंदी बेरा शुरू कित्तोर। 1949 ते च्यांग काई-शेक लड़ाई ते हारेमातोर तन्ना पूरा प्रभाव हत्तादु हूडसी फार्मोसा वित्तोर, कम्युनिस्ट पार्टी पूना सरकार बने कियाला काजे “जनता ना सलाहकार काउंसिल” केयता। चीनी जनता ना लोकतंत्र बनेमाता। अदु पूना सरकार मजदूर वर्ग, किसान, शहरी निम्न-पूंजीपति वर्ग ओसो “राष्ट्रीय” (इत्तेके

देशभक्त) पूंजीपतिरा संयुक्त मोर्चा पोरो आधार आसी मत्ता। इदिना उल्टा “नौकरशाही” ओसो एकाधिकारी पूंजीपतिरा दल च्यांग काई-शेक ना संगे मत्ता। इद्रम पूरा राष्ट्र मुट्टामेंड मत्ता, जनता किन लूटे किसी तम्मा सम्पत्ति डगी कीता, अमेरिका साम्राज्यवादीरा कैदे कठपुतली बनेमाता देशद्रोहिरा खिलाफ उंदी आत्ता। जर्मीदार लोरा जमीन किन किसान लोरा लोप्पा तूसमूडाता। उद्योग-धंदांग ओसो व्यापार लोप्पा पूना जीवा वात्ता लेक्का आत्ता। अविना पोरो सरकार ता नियंत्रण निर्माण आत्ता अस्के वेने लोकुरा नीजि सम्पत्ति मत्तांग। शहर ओसो नाहकुना लोप्पा जनवादी संस्थांग निर्माण आत्तांग। संयुक्त ओसो जनवादी चीन लोप्पा जनता ना लोकतंत्र मजबूती ते निर्माण आत्ता अनि कम्युनिस्ट पार्टी ता नेतृत्व ते बनेमाता राष्ट्रीय एकता ता संयुक्त सरकार ता देखरेख ते देश ता आर्थिक बदलाव शुरू आत्ता। अद्रमासी समाजवाद बगिल दायाला काजे आवश्यक परिस्थितिंग तैयार आयना शुरू आतांग।

पूर्वी यूरोप, चीन लेक्कटा अर्धऔपनिवेशिक देशकुना इद्रम ता अनुभव कुनगडल इंजे समाजवाद बगिल दायना समस्या पैदा आंता इंजी दिस्ता, अविन हल कियाला काजे पूना परिस्थितिंग तैयार आतांग। पूंजीवाद आम संकट ता कालम ते एकाधिकारी समूह जनता ना लूट-कसोट किन जारी तासला काजे ज्यादा से ज्यादा चीन-विरोधी काम कीता। फासीवादी निर्माण आंता, युद्ध शुरू आंता, मेहनतकश जनता ना परिस्थिति जबरदस्ती खराब आंता - इदु इदिना उंदी पहलू आंदू दूसरा पहलू दुनिया ता समाजवादी शिविर वेल्ले स्पीड ते विकसित आंता, मजदूर, औपनिवेशिक जनता ना प्रतिरोध बेरसिंता। मार्क्सवादी दृष्टिकोण तासना कम्युनिस्ट पार्टींग ना, केवल मजदूर वर्ग किने आयवा जनता ना बहुमत किन एकाधिकारीरा खिलाफ संघर्ष ते पिडंगना क्षमता बेरसिंता। एकाधिकारीरा जन-विरोधी दमनकारी काम वेल्ले दिव्या एवनल जनता ना विकास रोमी किया परवो आंता। एकाधिकारीरा जनता पोरो प्रभाव खत्म आंता अस्के ओरू वेल्लेए वरोरे आंतोर। दूसरा बगिल शांति, राष्ट्रीय स्वतंत्रता, लोकतंत्र ओसो बेसता पिस्वल ता संघर्ष ते जनता ना मोर्चा ओसो विस्तृत अनि मजबूत आसोर दांता। समाजवाद बगिल विकसित कियाला जनवादी लोकतंत्र ओसो जनता ना सरकार ता स्थापना कियाना संभव आंता।

मति एकाधिकारिरा पोरों जीत दोरकी कियाना पहली शर्त मजदूर आंदोलन लोप्पा अवसरवाद किन इत्तेके इस्सल अदिना पूना पोरोंल तास्तद मंता, प्रजातांत्रिक समाजवाद इंजि इदिन किन हारे किसियाना। बारांकु इत्तेके इतिहास ता ओसो मजदुर वर्ग ता आधारभूत अनुभव, मार्क्सवाद पोरों आधार आसी मत्ता निष्कर्ष माकिन मानव समाज ता अवस्था एवनल एव्वला काजे मार्ग वर्ग-संघर्ष लोप्पा तैयार आंता पाड़ना रूढीवादी समाज ता शासक लोरा सहयोग किसी आयो इंजी वेहिंता। इगा बदे “दोगली” नीति संगे इत्तेके अदु स्थानीय मत्तेकाई लेवेके विदेशी मत्तेकाई काम ताको। इगा मजदूर वर्ग ता नीति ता जरूरत मंता ओसो एकाधिकारिरा नीति खिलाफ सक्रिय संघर्ष ता जरूरत मंता। अदेनगडल मजदूर वर्ग लोप्पा जीड़ना इच्छा-शक्ति ओसो दृढ़ता पैदा आयर इदिना पोरोंने आधार आसी ओरू तम्मा ऐतिहासिक कार्य किन पूरा किया परनूर।

हरीं इंजे मुन्ने तुकू हल्को मंता मति मार्क्स ओसो लेनिन ना मुन्नेटा अनुभव तल दोरकता बुनियादी शिक्षांग नेंडु वेने निज्जमें मंतांग। समाज किन नेटल पोरोटा अवस्था ते एवसी कियाना हरीं उंदे मंता अदु पूंजीवाद ओसो साम्राज्यवाद विरोध ते संघर्ष कियाना हरीं समाज ता पूना, उच्च अवस्था किन निल्पी किसी तासना वेने उंदे हरीं मंता। अदु देश लोप्पाटा पाड़ना शासक वर्ग ता अवशेष ओशो विदेशी साम्राज्यवादीरा खिलाफ संघर्ष ताकि कियाना हरीं समाज किन बदले कियाना उंदे हरीं मंता - अदिन काजे मुन्ने राजनीतिक सत्ता पोरों कब्जा किया लागियर। इदिना काजे मजदूर वर्ग ता नेतृत्व ते मेहनकश जनता ना उंदी संयुक्त मोर्चा बने कियाना जरूरी मंता। मजदूर वर्ग वर्ग-संघर्ष ता अनुभव किन ओसो मार्क्स-लेनिन शिक्षा किन पूर्ण रूप ते ग्रहण किसी मत्ता राजनीतिक पार्टी ता नेतृत्व ते काम कियाना। इग इंजे सोवियत संघ ता दीर्घकालीन अनुभव तल ओसो जनवादी लोकतंत्रकुनगडल ओसो जनवादी चीन ता अनुभव कुनगडल वेने रोज पूना ओसो अलग तरीका ते साबित आया मंता।

जनवादी लोकतंत्रकुना संगे पूंजीवाद तल समाजवाद बगिल दायना अनुभव पूंजीवादी लेवेके विदेशी साम्राज्यवादी शासन दोड़ दबेमासी मत्ता देश कुना काजे वेल्ले महत्व मंदिंता। दुनिया ता वर्तमान परिस्थितिंग सब्बे जागाने

इदिन इस्तेमाल कियाना संभव किसितांग, इदु हर देश ता ठोस परिस्थितिंग पोरो इत्तेके अगा बदिना पोरो आधार आसी संयुक्त मोर्चा बने कितेके जनवादी लोकतंत्र निर्माण आया परियार इंदाना पोल्लो पोरो आधार आसी मंदिता। पूना राज्य ता स्वरूप बदरम मंदियार ओसो बचोन स्पीड ते समाज बदलेमाया परियार इंदाना पोल्लो पोरो आधार आसी मंदिता।

ब्रिटेन ता कम्युनिस्ट पार्टी ब्रिटेन काजे समाजवाद ता हरी पोरोल ता कार्यक्रम पेश कीता। ताना लोप्पा अदिना पोरो आधार आसी व्यापक ओसो संयुक्त संघर्ष आया परना ओसो अदिना संगे जनता ना सरकार बनेमाया परना इंजी लेबर-कम्युनिस्ट मजदूर वर्ग एकता ता आह्वान कीताद मत्ता। इदु सरकार जनता ना समर्थन पोरो आधार आसी उद्योग-धंधा ना समाजवादी राष्ट्रीयकरण किसी एकाधिकारीरा आर्थिक ताकत किन देहियर। अदु सब्बे महत्वपूर्ण पद कुने “जनता ना सरकार ता वफादार (इमानदार) ओसो अदिन मजबूत कियाना क्षमता तासानोर” किन चुने कियार ओसो इद्रमे अदु शासन सत्ता ता स्वरूपे बदले किसियार। अदु उपनिविशे कुन राष्ट्रीय स्वतंत्रता हिंसी वर्तमान साम्राज्य किन आजाद देश ता जनता ना समानता पोरो आधार आसी बनेमाता संघ लेक्का बदले कियार। अदु उंदी व्यापाक सामाजिक कार्यक्रम किन लागू कियार। बडे पूंजीपतिरा हर रकम ता प्रतिरोध ता खिलाफ अदिन उद्देश्य संयुक्त आंदोलन ता मदद ते मुन्ने दायार।

इद्रमाताए तरीका ते कार्यक्रम भारतीय कम्युनिस्ट पार्टी वेने पेश कीता। अदिना पोरो आधार वेने मजदूर वर्ग, किसान ओसो जनता ना सब्बे सामंती-विरोधी, साम्राज्यवाद-विरोधी जनवादी हिस्सांग संगे विशाल संयुक्त मोर्चा बने कियाना मंता। कार्यक्रम ता लक्ष्य भारत किन “विकास, सांस्कृतिक विकास ओसो स्वतंत्रता ता हरदे” मुन्ने ओया परना राष्ट्रीय लोकतांत्रिक सरकार ता स्थापना कियाना मंता।

दूसरा कम्युनिस्ट पार्टींग वेने इद्रमाताए कार्यक्रम बने कीतांग। इविना लक्ष्य समाजवाद ता हर्दा पहली मंजिल ता रूप ते जनवादी लोकतंत्र स्थापना कियाना मंता।

इद्रमे वास्तविक अनुभव पोरो आधार आसी विकसित आत्ता मार्क्सवादी सिद्धांत, मजदूर वर्ग किन बद कार्यपद्धति हियाना लेक्का परिता अदिने लागू

किसी मजदूर वर्ग, दुनिया ता वर्तमान परिस्थितिंग लोप्पा सबसे ज्यादा हल्को ओसो जल्दी समाज किन समाजावादी रूप हिया परिंता।

मति इद विकास ता पहली शर्त मजदूर वर्ग ओसो अदिना सहयोगी साम्राज्यावादी देशकुना एकाधिकारी समूह ता तीसरा महायुद्ध शुरू कियाना कोशिश कुन विफल कियाना मंदिता।

इद महायुद्ध ता तैयारी काजे अमेरिका ता एकाधिकारी पूंजीपति, तन्ना उत्पादन ता बेहरा साधन ओसो मरावा अच्चोन मुनाफा ता इस्तेमाल किया मंतोर। इविन किन ओरू दूसरा महायुद्ध ताकनास्के अदिना पेरके डगी किसी मत्तोर। अविना संगे ओरू ब्रिटेन ओसो फ्रांस लेक्काट दुनिया ता बाकी पूंजीवादी देश कुना पोरों तम्मा आर्थिक ओसो राजनीतिक कब्जा बने किया मंतोर। संयुक्त राष्ट्र संघ लोप्पा बहुमत ओरा कैदा कठपुतली बनेमासी मंता। अविना संगे ओरू संयुक्त राष्ट्र संघ किन कोरिया लोप्पा आक्रमणकारी युद्ध ताकी कियाला काजे तम्मा हथियार बने कीता। पश्चिमी यूरोप ता पूंजीवादी राज्य किन ओरू उत्तरी अटलांटिक गुट ते शामिल कीसी तास्तोर। इव देशकु बेहरा-बेहरा फौजकु अमेरिका किन हियला मजबूर कीतांगा। इवु फौजकु वायना अमेरिका युद्ध लोप्पा उंदी अमेरिका सेनापति ना नेतृत्व ते लड़ेमायनुंग। जर्मनी किन ओरू टुकड़ंग किस्तीतोर। पश्चिमी जर्मनी लोप्पा नात्सिर किन ओसो जापान लोप्पा अगाटा प्रतिक्रियावादिर् किन ओरू ओसो उंदी बेरा युद्ध ता तैयारी कियाला पूरा सुविधा हीसी मत्तोर। दुनिया मेंड ओरू तम्मा फौजी छावनींग बने किसी जाली वाटसी मत्तोर।

उंदी ब्रिटेन लोप्पाने ओरा बीस तुकू ज्यादा छावनिंग मंतांगा। तम्मा गुलाम लोर किन समाजवादी देश संगे व्यापाक कियाला हीवोर ओसो ओरा दूसरा हाटुम ते वेने ओरू तम्मा मोद्दोल वाटा मंतोर।

इद्रमे नेंडु अमेरिका साम्राज्यवादीरा कब्जा मत्ता सब्बे देश कुना लोप्पा शांति ता रक्षा ता संघर्ष अमेरिका ता नियंत्रण किन ओसो अमेरिका ता सेना किन देश तल गुच्ची कियाना संघर्ष संगे जुड़ेमांता।

मार्क्सवाद ता वर्ग दृष्टिकोण मजदूर वर्ग किन युद्ध ता अंधाधुंद प्रचार किन समझेमासी युद्ध ता षडयंत्र पंडसोरे मंदना ताकतकुनु ओसो शांति काजे कोशिश किसोरे मंदना ताकत किन स्पष्ट रूप ते चिन्हे कियाना अक्ल हींता। उंदी बगिल साम्राज्यवादी समूह मंता, विशेष रूप ते तन्ना साम्राज्य विस्तार कियाना ओसो अमेरिका ता साम्राज्यवादीरा समूह दुनिया ता समाजवादी हिस्सा किन ओसो उंदी बेरा पूंजीवाद काजे जीड़ना कोशिश किसोर मत्ता। दूसरा बगिल समाजवादी राज्य मंता, इदिना विकास शांति निर्माण कियाना पोरो आधार आसी मंता,

औपनिवेशिक देशकुना जनता इत्तेके स्वतंत्रता काजे संघर्ष किसोरे मत्ता जनता किन ओसो खुद पूंजीवादी देश कुना ज्यादातर जनता शामिल मंता। इदु युद्ध तल ओसो युद्ध ता तैयारिग ना आर्थिक ओसो राजनीतिक परिणाम कुनगल सिर्फ तिप्पले दोरकिंता।

साम्राज्यवाद हमेशाए युद्ध शुरू कियाना कोशिश ते मंदिता। इद्रम इत्तेके पूंजीवाद ओसो समाजवाद संगे शांतिपूर्वक मंदा परमूडायो? इंजी आयो। दूसरा महायुद्ध तुकू मुन्ने या लगभग बीस साल कुना अनुभव उंदी अपेक्षाकृत कमजोर समाजवादी देश वेने वेल्ले लम्बा समय एवनल पूंजीवादी दुनिया संगे शांति संगे मंदा परता ओसो अविना संगे सामान्य तरीका ते व्यापार संबंध वेने तासा परता इंजी वेहिंता। नेंड वेने इदु संभव मंता। साम्राज्यवादी अमेरिका मुन्नेटा बदे वेने पूंजीवादी राज्य तुकू ज्यादा आक्रमणकारी ओसो युद्ध काजे तैयार साम्राज्यवाद आंदू इंदानदु निज्जमे। मति संगेने समाजवादी देश मुन्नेटुकू वेल्ले ताकतवर आत्ता ओसो शांति ता आंदोलन नेंडु बचोन शक्तिशाली मंता अचोन मुन्ने बस्केने हिल्ला मत्ता इंदानदु वेने निज्जमे। युद्ध ता नीति ओसो अदिना विनाशकारी परिणाम हर महीना ते ज्यादा स्पष्ट आसोर दांता। अविना संगे पूंजीवादी देश कुना जनता पूर्व ओसो पश्चिम नडमा ता असली कच्ची ता पर्दा इंदाना “झूठा प्रचार ता जाल” तिंची मुक्त आया मंतांग। जनता लोप्पा नेंडु साम्राज्यवाद ता युद्ध शुरू कियाना योजना किन विफल किया परनाचोन ओसो शांति ता रक्षा कियानाचोन ताकत मंता। शांति इत्तेके जनवादी लोकतंत्र ओसो समाजवाद बगिल दायला काजे परिस्थितिंग अनुकूल आसोर दायना वेने आंता।

बेगा पूंजीपति वर्ग राज स्थापना कींता अव देश कुना लोप्पा युद्ध ता खतरा मंदिता। अविनना लोप्पा आर्थिक संकट वासोरे मंदिता। अगा सामाजिक विकास रोमसी मंदिता। अगाटा वायना कालम हीकट ओसो वेरीं वेस्सना लेक्का मंदिता।

मति बद देशकुना लोप्पा मार्क्सवाद लोकुरा मार्गदर्शन कित्ता अव देश कुना लोप्पा युद्ध कियाना आवाज वेने तेदो, अगा उद्योग-धंधा ओसो खेती वेल्ले विकास आसोर मंता। इदिनगडल ओसो वेने स्पीड ते सामाजिक विकास ता आधार तैयार आया मंता। सोवियत संघ लोप्पा महान रचनात्मक योजना ना रूप ते समाजवाद तल कम्युनिज्म बगिल दायाना दिशा ते पहली कदम वाटा

मंता। अगा नालुंग बगिल आशा ओसो विश्वास ता वेइच मंदिता। उज्जवल भविष्या सब्बे लोकर किन प्रेरित किया मंता।

रेडु दुनिया ना नइमा इद्रम ता बेहरा अंतर हर साल ओसो गहरा आसोर दांता। इद, जनता उंदी बेरा तन्ना मार्ग-दर्शन ता रूप ते मार्क्सवाद किन लागू कींता अस्के ताना लोप्पा बदिन वेन्ने जीइना शक्ति पैदा आंता, इंदाना पोल्लो ता साक्षी मंदिता।



एमिल बर्न्स

16 अप्रैल 1889 – 29 नवंबर 1972

" ओरु कियाना खोज ता उद्देश्य मानव, समाज ता नेटा रूप इद्रम बारांकु मंता, ताना लोप्पा बदलाव बारांकु आंता, ओसो वायना कालम ते मानव जाति ता बदलाव बद्रम आयार इंदानदु मत्ता। तन्ना अध्ययन संगे ओरु इद बदलाव - बाहरी प्रकृति लोप्पा वायना बदलाव लेक्का अचानके आयवा, इदु उचुक विशिष्ट नियमानुसार आंतांग इंजी खोज कित्तोर। इद सच्चाई ता खोज कित्ता पेरके मानव समाज ता बारे ते, मानव जाति ता वास्तविक अनुभव कुना पोरो आधार आसी मंदाना वैज्ञानिक सिद्धांतकु पुट्टतांग। इद सिद्धांत मुन्ने ने धार्मिक विश्वास, नस्ल ओसो ताना संगे जुडेमासी मत्ता वंशानुक्रम, व्यक्तिगत भावनांग, पड़ियोर किन मोड़कना लेवेके काल्पनिक सपनांग पोरो आधार आसी समाज ता बारे ते बनेमाता अस्पष्ट मत्ता धारणांग कुनगडल अलग मत्ता। "